

SAN MATEO

*Jesucristo ñekūsāmarā ããrĩturiamurĩridea
(Lc 3.23-38)*

¹ Jesucristo ñekūsāmarā iripoegue marā ãsũ ããrĩnerā ããrĩmá. Jesucristo, David parāmi ããrĩturiagu ããrĩdi ããrĩmí. David, Abraham parāmi ããrĩturiagu ããrĩdi ããrĩmí.

² Abraham Isaac pagu, Isaac Jacob pagu, Jacob Judásã pagu ããrĩdi ããrĩmí.

³ Judá pūrã Fares, Zara wãikurã ããrĩnerā ããrĩmá. Ñgũsã pago Tamar wãikudeo ããrĩmó.

Fares Esrom pagu, Esrom Aram pagu,

⁴ Aram Aminadab pagu, Aminadab Naasón pagu, Naasón Salmón pagu, ⁵ Salmón Booz pagu ããrĩdi ããrĩmí. Ñgũ pago Rahab wãikudeo ããrĩmó.

Booz, Obed pagu ããrĩdi ããrĩmí. Ñgũ pago Rut wãikudeo ããrĩmó.

Obed Isai pagu ããrĩdi ããrĩmí.

⁶ Isai Israel bumarã opu David pagu ããrĩdi ããrĩmí. David, Urías marãpo ããrĩdeo merã Salomón wãikugure pūrãkudi ããrĩmí.

⁷ Salomón Roboam pagu, Roboam Abías pagu,

Abías Asa pagu, ⁸ Asa Josafat pagu,

Josafat Joram pagu, Joram Uzías pagu,

⁹ Uzías Jotam pagu, Jotam Acáz pagu,

Acáz Ezequías pagu, ¹⁰ Ezequías Manasés pagu,

Manasés Amón pagu, Amón Josías pagu,

11 Josías, Jeconíasã pagu ããrĩdi ããrĩmí. Īgūsã ããrĩripoere Israel bumarãrẽ Babilonia marã gapu ñeã, Īgūsãya nikũgue ãñãnerã ããrĩmá.

12 Irasirigu, Jeconías Babilonia nikũgue Salatiel wãikugure pũrãkudi ããrĩmí.

Salatiel Zorobabel pagu, 13 Zorobabel Abiud pagu, Abiud Eliaquim pagu, Eliaquim Azor pagu,

14 Azor Zadoc pagu, Zadoc Aquim pagu, Aquim Eliud pagu, 15 Eliud Eleazar pagu,

Eleazar Matán pagu, Matán Jacob pagu,

16 Jacob, José pagu ããrĩdi ããrĩmí.

José, María marãpu ããrĩdi ããrĩmí. María, Jesús masakare taubu “Cristo” wãikugu pago ããrĩdeo ããrĩmó.

17 Abraham merã keopurori, Daviguere marĩ keotũnumakũ, ããrĩpererã Abraham parãmerã ããrĩturiarã catorce burigora masãporewãgãnerã ããrĩmá. David merã Īgũ parãmerã ããrĩturiarãrẽ keomakũ, Babiloniague Israel bumarãrẽ Īgūsã ãñaburo dupuyuro keotũnumakũ, catorce burigora masãporewãgãnerã ããrĩmá. Dupaturi Babiloniague Īgūsã ejadero puru, Īgūsã parãmerã ããrĩturiarãrẽ keopurorimakũ, Cristo deyoadero puru keotũnumakũ, catorce burigora masãporewãgãnerã ããrĩmá doja.

Jesucristo deyoadea

(Lc 2.1-7)

18 Jesucristo deyoaburi ãsũ waayuro. Īgũ pago María, José merã marãpukũbo iriyupo. Īgūsã suro merã ããrĩrikũburo dupuyuro Ōãgũ deyomarĩgũ turari merã nijĩpo ããrĩnũgãsiayupo. 19 José igo merã mojõsiabu diayemarẽ irigu ããrĩyupu. Irasirigu,

igo nijīpo āārīrīrē masīgū, masaka iūrōgue igore: “Ñerō irideo āārīmó”, ārī weresādūabi, īgūsā masībirimakūta igore béobu iriadiyupū. ²⁰ Irire īgū gūñaripoe Marīpūre wereboegū, kērōgue īgūrē deyoa, āsū ārīyupū:

—José, David parāmi āārīturiagu, Maríare ñerō gūñabirikōāka! Igo, Ōāgū deyomarīgū turari merā nijīpo āārīnūgāsiamo. Irasirigū gūiro marīrō igo merā mojōsiaka! ²¹ Igo majīgūrē pūrākūgokumo. Īgū īgūyarā masakare īgūsā ñerī iridea wajare taubu āārīgukumi. Irasirigū īgūrē “Jesús”^{*} wāiyegukoa, ārīyupū Marīpūre wereboegū Josére.

²² I āārīpereri Marīpū īgūya kerere weredupuyudire gojadorederosūta waayuro. Āsū ārī gojasūdero āārībú:

²³ Sugo nomeō ūmū merā āārībirikerego, sugū majīgū pūrākūgokumo. Īgū “Emanuel” wāikūgukumi, ārī gojasūdero āārībú.[☆] “Emanuel”, ārīrō: “Marīpū marī merāta āārīmi”, ārīdūaro yáa.

²⁴ José kārīadi yobeja, pūru Marīpūre wereboegū īgūrē doreaderosūta María merā mojōsiayupū.

²⁵ Irasirikeregu, igo magūrē pūrākūburo dupuyuro igore marāpokūbi irirosū āārīkōāyupū. Igo pūrākūadero pūru, majīgūrē “Jesús” wāiyeyupū.

2

Masīrīmasā Jesúre iārā waadea

¹ Herodes wāikūgu, Judea nikū marā opu āārīripoe Jesús iri nikūma makā Belēgue

^{*} **1:21** “Jesús”, ārīrō: “Marī Opū marīrē taumi”, ārīdūaro yáa.

[☆] **1:23** Is 7.14

deyoayurũ. Īgũ deyoadero purũ, abe murĩiro garũ marã neñukãrẽ õãrõ masĩĩmasã Jerusalẽgue ejañurã. ² Irogue eja, iri makã marãrẽ sërẽñañurã:

—Sugũ majĩgũ deyoadi judío masaka opũ ããĩbu, ¿noógue ããĩrĩ? Gũaya nikũgue gũa ããĩmakũ, abe murĩiro garũ neñukãmũ ĩgũ deyoarire ĩmugũ boyopũrorimakũ ĩãbũ. Irasirĩã ĩgũrẽ buremurã aarirã iriabu, ãrĩñurã.

³ Opũ Herodes ĩgũsã irasũ ãrãdeare pébokagũ, buru gũñarikayurũ. ããĩpererã Jerusalén marãde gũñarikũñurã. ⁴ Irasirigũ Herodes ããĩpererã paía oparãrẽ, Moisés doredeare buerimasãdere siiu neeõ, ĩgũsãrẽ sërẽñayurũ:

—Cristo, Marĩpũ iriubu, ¿noógue deyoabu ããrãyuri? ãrĩyurũ. ⁵ Īgũ irasũ ãrĩmakũ, ãsũ ãrĩ yũjũñurã:

—Judea nikũma makã Belẽgue deyoagũkumi. Iripoegue Marĩpũya kerere weredupuyudi ãsũ ãrĩ gojadi ããĩmĩ:

⁶ Belén wãikũri makãgue sugũ Opũ deyoagũkumi.

Īgũ Marĩpũyarã Israel bumarãrẽ korebu ããĩgũkumi.

Irasiriro Belén Judea nikũ ããĩrĩ makãrĩ watope ubu ããĩrĩ makã ããĩkerero, gajĩ makãrĩ nemorõ ããĩrokoa, ãrĩ gojadi ããĩmĩ, ãrĩ wereñurã Herodere.✧

⁷ Īgũsã irasũ ãrĩmakũ pégu, Herodes masĩĩmasãrẽ siiu, masaka péberogue sërẽñayurũ:

—¿Naásũ ããĩmakũ neñukãmũ deyoari? ãrĩyurũ.

⁸ “Irinugue deyoami”, ãrĩ yũjũmakũ pégu, ĩgũsãrẽ Belẽgue ãsũ ãrĩ iriuyurũ:

✧ 2:6 Mi 5.2

—Iro marārē: “¿Noógue āārīrī, majīgū deyoadi?” ārī sērēñarā waaka! Īgūrē bokajarā, ōōta goedujarika, yure Īgū āārīrōrē weremurā! Yude Īgūrē buremugū waaduakoa, ārīyupu Īgūsārē.

⁹⁻¹⁰ Īgū irasū ārīmakū pé, Belēgue waakōāñurā. Maague waamakū, neñukām, abe mūrīro gapu boyoadi Īgūsā dupuyuro waadupuyuyupu, Īgūsā waarí maarē ĩmugū. Īgūsā neñukāmūrē ĩārā, buru usuyañurā. Neñukām Īgūsā dupuyuro waa, majīgū Īgū āārīrī wii weka dujanugājayupu.

¹¹ Irasirirā iri wiigüe ñajārā, majīgūrē, Īgū pago María merā āārīgūrē bokajañurā. Īgūrē ĩā, Īgū puro ñadukupuri merā ejamejā: “Ōātarimi”, ārī buremuñurā. Īgūsā āiadea kūmarīrē tūpā: oro, incienso, mirra wāikuri sūrōrī wajaparire Īgūrē sīñurā. ¹² Puru Īgūsā kārīpoe Marīpu kērōgue wereyupu:

—Musāya makāgue goedujáarā, Herodes puro waarí maarē dujáabirikōāka! Gaji maa gapu dujáaka! ārī wereyupu. Irasirirā gaji maa gapu goedujáañurā.

José, María merā majīgūrē Egiptogue āiduriadea

¹³ Masīrīmasā goedujáadero puru, Marīpore wereboegu Josere kērōgue deyoa, āsū ārī wereyupu:

—Yobeka! Majīgūrē, Īgū pago merā Egipto nikūgue āiduriwāgāka! Yu mūrē: “Dujarika!” ārī weremakūgue dujarika! Herodes majīgūrē āmabu yāmi Īgūrē wējēbu, ārī wereyupu.

¹⁴ Īgū irasū ārīmakū pégu, José yobe, majīgūrē āi, pago merā ñamita Egiptogue waakōāyupu.

¹⁵ Herodes okaropā iroque āārīñurā. Irasiriro

Marĩp̄ya kerere weredupuyudi Marĩp̄ magũrẽ ĩgũ ãrĩdeare gojaderosũta waayuro. Marĩp̄ ãsũ ãrĩdi ããrĩmĩ: “Ȳ magũrẽ Egiptogue ããrĩgũrẽ siiub̄”.

Herodes ũma pũrãrẽ wẽjẽbéodoredea

¹⁶ Herodes, masĩrĩmasã ĩgũ p̄ro goe-dujáabirimakũ ĩãgũ, guatariakõãyupũ. Irasirigũ Belén marãrẽ, iri makã t̄ro ããrĩrãdere ũma pũrãgãrẽ wẽjẽpeokõãdoreyupũ. Masĩrĩmasã ãrĩdeare gũñagũ: “Õõpãta majĩgũ masãkumi”, ãrĩ gũñayupũ. Irasirigũ pe bojori oparãrẽ, pe bojori doka oparãrẽ wẽjẽbéodoreyupũ. ¹⁷ ĩgũ irasiriri Jeremías Marĩp̄ya kerere weredupuyudi gojaderosũta waayuro. ãsũ ãrĩ gojadi ããrĩmĩ:

¹⁸ Ramá wãĩk̄rogue b̄ro bujawereri merã d̄jaritua, orerãkuma. Raquel parãmerã ããrĩturiarã Israel bumarã nome ĩgũsã pũrãrẽ b̄ro orerãkuma.

Ĩgũsã pũrãrẽ wẽjẽmakũ ĩãrã, bujawereduúbirimakũ, gajerã ĩgũsãrẽ gũñaturamakũ iri-masĩbirikuma, ãrĩ gojadi ããrĩmĩ.✧

¹⁹ Herodes boadero p̄r̄, Marĩp̄re wereboegu Josere Egiptogue ããrĩgũrẽ k̄rõgue deyoa, ãsũ ãrĩyupũ doja:

²⁰ —Majĩgũrẽ wẽjẽd̄anerã boapereakõãma. Irasirigũ majĩgũrẽ, pago merã Israel bumarãya nikũgue ãĩ dujáaka doja! ãrĩyupũ.

²¹ ĩgũ irasũ ãrĩmakũ pégu, José yobe, majĩgũrẽ, pago merãta Israel bumarãya nikũgue ãĩãkõãyupũ.

²² José gap̄ Judea nikũgue ejagu, Herodes magũ Arquelao wãĩk̄gu ĩgũ pagũ dagũre gorawayudi

✧ 2:18 Jer 31.15

ããrĩmi, ãrĩrĩ kerere pégu, güiyupũ. Irasirigu, kërõgue Marĩpũ ãgũrẽ werederosũta Judea nikũrẽ taria, Galilea nikũgue waakõãyupũ. ²³ Iri nikũguere Nazaret wãikũri makãgue eja, ããrĩyupũ. Irasiriro Marĩpũya kerere weredupuyunerã gojaderosũta waayuro. Æsũ ãrĩ gojanerã ããrĩmá: “‘Cristo, Marĩpũ iriudi Nazaretmũta ããrĩmi’, ãrĩrãkuma masaka”, ãrĩ gojanerã ããrĩmá.

3

Juan masakare wãiyerimasũ buedea

(Mr 1.1-8; Lc 3.1-9, 15-17; Jn 1.19-28)

¹ Iripoere Juan masakare wãiyerimasũ Judea nikũ masaka marĩrõgue ãgũ pũro ejarãrẽ Marĩpũyare buenũgãyupũ. ² Æsũ ãrĩ werenayupũ:

—Musã ñerõ iririre bujawereka! Musã gũñarĩrẽ gorawayuka! Mérõ duyáa, Marĩpũ ãgũyarãrẽ doreri ejaburo, ãrĩ werenayupũ.

³ Iripoeguemu Isaiás Marĩpũya kerere weredupuyudi, Juan iriburire ãsũ ãrĩ gojadi ããrĩmĩ:

Sugũ, masaka marĩrõgue bũro gainĩrĩ merã: “Marĩ Opũ aariburi dupuyuro ãgũ aariburi maarẽ diayema maa õãrĩ maa ãmurã irirosũ diayemarẽ irika!” ãrĩ weregũkumi, ãrĩ gojadi ããrĩmĩ.*

⁴ Juãya surĩro camellu poari merã suadea surĩro ããrĩyuro. ãgũya yujwẽñarĩdade waibu gasiro merã irideada ããrĩyuro. Poreroa, mume makãnũũ marãyare baarikũyupũ. ⁵ Jerusalén marã, ããrĩperero Judea nikũ marã, dia Jordán

* 3:3 Is 40.3

wāikūdiya turo marāde ĩgūrē pérā ejañurā. ⁶ ĩgūsā ñerō irideare bujawere, Marĩpũ weretarimakū ĩāgũ, ĩgūsārē deko merā wāĩyeyupũ dia Jordán wāikūdiyague.

⁷ Juan, wárā fariseo bumarā, saduceo bumarā ĩgūrē wāĩyedorerā ejamakū ĩāgũ, āsũ ārĩyupũ:

—Musā āña irirosũ ñerā āārā. ¿Noā musārē ōōguere aaridoreari? “Marĩpũ, gũā ñerō iriri waja gũare wajamoābirikōāburo”, ārĩrā, ¿yũre wāĩyedorerā aarari? ⁸ Musā: “Gũā ñerō irideare bujawere, gũñarĩrē gorawayuabũ”, ārĩrā, musā ñerō irideare piri, ōārĩ gapũre irika! Musā irasirimakū, Marĩpũ musārē wajamoābirikumi. ⁹ Musā: “Gũā Abraham parāmerā āārĩturiarā āārĩmakū, Marĩpũ gũare wajamoābirikumi”, ārĩ gũñabirikōāka! Yũ musārē āsũ ārā: “Musā gũñarĩrē gorawayubirimakū, musā Abraham parāmerā āārĩturiari wajamáa. Marĩpũ i ũtāyeri merā Abraham parāmerā āārĩturiarā waamakū irimasĩmi”. ¹⁰ Musā ñerĩ iririre piribirimakū ĩāgũ, Marĩpũ musārē béogukumi. Sugũ yukũ ñerĩ dukakũdire ĩā, kōme merā nugūrĩgue merāta diti, peamegue soebéorosũ musārē béogukumi. ¹¹ Musā ñerō irideare bujawere, musā gũñarĩrē gorawayumakū ĩāgũ, yũ musārē deko merā wāĩyegũkoa. Yũ purũ aarĩgũ, yũ nemorō turagu āārĩmi. Yũ gapũ ubu āārĩgũ, ĩgūrē neō sũropebirikoa. ĩgũ musārē Ōāgũ deyomarĩgũ merā, peame merā wāĩyegũkumi. Irasirĩgũ Ōāgũ deyomarĩgūrē musā merā āārĩnĩmakū irigũkumi, ñerĩrē soebéorosũ musārē ñerĩrē béoburo, ārĩgũ. ¹² Trigo gasirire korobéogu irirosũ āārĩmi.

Gasire koro odo, iri yerire baari duripíri wiigue duripígũ irirosũ òãrõ irirãrẽ ìgũ p̄rogue ãĩagukumi. Gasiri gap̄re peamegue soebéogũ irirosũ ñerõ irirãrẽ peamegue béogukumi. Iri peame neõ yaribirikoa, ãrĩ werenayup̄ Juan masakare.

Juan Jesúre deko merã wãiyedeá
(Mr 1.9-11; Lc 3.21-22)

¹³ Juan masakare dia Jordán wãĩkũdiyague deko merã wãiyeripoe Jesús Galileague ããrãdi ìgũrẽ wãiyedoregũ waayup̄. ¹⁴ Iroque ejamakũ, Juan ìgũrẽ wãiyedũabiradiyup̄:

—¿Mũ gap̄re yũre wãiyerono irigũ yũre wãiyedoregũ aarĩri? ãrĩyup̄.

¹⁵⁻¹⁶ Jesús gap̄re ìgũrẽ yũjũyup̄:

—Yũre wãiyeka! Marĩrẽ ããrĩpereri Marĩp̄ dorederosũta iriro gããmea.

Ìgũ irasũ ãrĩmakũ pégũ: “Jáũ”, ãrĩ, Jesúre wãiyeyup̄. Wãiyẽ odomakũ, Jesús diague níadi majãũgãmakũta, ãmũgasi tũpãkõãyuro. Õãgũ deyomarĩgũ buja irirosũ deyogũ dijari, ìgũ weka ejabejamakũ ãyup̄. ¹⁷ Marĩp̄ ãmũgasigue ããrĩgũ ãsũ ãrĩyup̄ Jesúre:

—Ìĩ yũ magũ, yũ maĩgũ ããrĩmi. Ìgũ merã bũro ãsũyáa, ãrĩyup̄.

4

Wãtĩ Jesúre ãrĩmesãdidea
(Mr 1.12-13; Lc 4.1-13)

¹ P̄rũ Õãgũ deyomarĩgũ Jesúre masaka marĩrõgue ãyup̄, wãtĩ ìgũrẽ ãrĩmesãburo, ãrĩgũ.

² Iroguere Jesús cuarenta nũrĩ, cuarenta ñamĩrĩgora baabiriyurũ. Pũrũ ñaboakõãyurũ. ³ Ĩgũ ñaboamakũ ĩãgũ, wãtĩ ĩgũ pũro eja, ãsũ ãrĩyurũ:

—Diyeta Marĩrũ magũ ããrĩgũ, mũ turaro merã i ãtãyerire pã duparu waamakũ irika! ãrĩyurũ.

⁴ Jesús garũ ĩgũrẽ yũjũyurũ:

—Yũrũya werenĩrĩ gojadea pũgue: “Baari dita masakare okamakũ iribea. ããrĩpereri Marĩrũya werenĩrĩ garũ ĩgũsãrẽ okamakũ yãa”, ãrĩ gojasũdero ããrĩbũ, ãrĩ wereyurũ Jesús wãtĩrẽ.

⁵ Pũrũ wãtĩ Marĩrũya makã Jerusalẽgue Jesũre ãã, Marĩrũya wii wekague ãĩmũrĩa, ⁶ ĩgũrẽ ãsũ ãrĩyurũ:

—Diyeta Marĩrũ magũ ããrĩgũ, yebague parimadijaka! Ĩgũya werenĩrĩ gojadea pũgue: Marĩrũ ĩgũrẽ wereboerãrẽ mũrẽ koredoregũkumi, neõ ãtãyegue meébejabirikõãburo, ãrĩgũ, ãrĩ gojasũdero ããrĩbũ, ãrĩ wereyurũ wãtĩ Jesũre.✧

⁷ Jesús ĩgũrẽ yũjũyurũ:

—Yũrũya werenĩrĩ gojadea pũgue: “Bũremurĩ marĩrõ Marĩrũre: ‘Mũ turari merã yũre gajino iri ĩmuka!’ ãrĩbirikõãka!” ãrĩ gojasũdero ããrĩbũ, ãrĩ wereyurũ Jesús wãtĩrẽ.

⁸ Pũrũ wãtĩ Jesũre ãmarĩ buũru wekague ãĩmũrĩayurũ doja. Irogue ããrĩpereri i ãmũma makãrĩrẽ, masaka oparidere ĩmupeokõãyurũ.

⁹ Irire ĩmupeo, Jesũre ãsũ ãrĩyurũ:

—Mũ ñadũkũpuri merã ejamejãja, yũre: “Mũ, yũ Orũ ããrã”, ãrĩ bũremumakũ, i ããrĩpererire mũrẽ sĩgũra, ãrĩyurũ.

✧ 4:6 Sal 91.11-12

10 Īgũ irasũ ārĩmakũ, Jesús āsũ ārĩyupũ:

—Satanás, yũ pũrore wirika! Yũpũya werenírĩ gojadea pũgue: “Marĩpũ direta buremuka! Īgũ doreri direta irika!” ārĩ gojasũdero āārĩbú, ārĩ wereyupũ Jesús wātĩrẽ.

11 Īgũ irasũ ārĩmakũ pégu, wātĩ waakõāyupũ. Īgũ waadero pũrũ, Marĩpũre wereboerã Jesúre iritamurã ejañurã.

Jesús Galilea nikũgue masakare buenũgãdea
(Mr 1.14-15; Lc 4.14-15)

12 Juārẽ peresu iridea kerere pégu, Jesús Galilea nikũgue waakõāyupũ. 13 Iro āārĩrĩ makã Nazarere tariwãgã, Capernaum wãĩkũri makãgue ejayupũ. Galilea wãĩkũri ditaru tũro āārĩbú Capernaum. Iri makã Zabulón bumarãya nikũ, Neftalí bumarãya nikũ āārĩunadero āārĩbú. 14 Jesús irogue ejagũ, iripoeguemũ Marĩpũya kerere weredupuyudi Isaías gojaderosũta iriyupũ. Āsũ ārĩ gojadi āārĩmĩ:

15 Zabulón bumarãya nikũ, Neftalí bumarãya nikũ āārĩunadero, judío masaka āārĩmerãya nikũ āārã. Ditaru tũro, dia Jordán wãĩkũdiya abe ñajārõgue Galilea wãĩkũri nikũ āārã.

16 Iro marã, nãitĩārõgue āārĩrã irirosũ Marĩpũyare masĩbema. Īgũsã masĩbiri waja peamegue waabonerã āārĩma. Irasũ āārĩkererã, siãgorire iārã irirosũ Īgũsãrẽ taubure iārãkuma. Īgũta Īgũsãrẽ Marĩpũre masĩmakũ irigũ aarigũkumi. Irasirirã boyorogue āārĩrã irirosũ āārĩrãkuma, ārĩ gojadi āārĩmĩ.✧

✧ 4:16 Is 9.1-2

17 Jesús irogue ããrĩgú, masakare ãsũ ãrĩ buenũgãyupũ:

—Musã ñerĩ iririre bujawereka! Musã gũñarĩrẽ gorawayuka! Mërõ duyáa, Marĩpũ ãgũyarãrẽ doreri ejaburo, ãrĩyupũ.

Jesús wapikũrã waaí wějěrĩmasãrẽ siiudea
(Mr 1.16-20; Lc 5.1-11)

18 Jesús Galilea wãikũri ditaru tũrogue ejagũ, Simõrẽ, ãgũ pagũmũ Andrere bokajayupũ. Simõta “Pedro” wãikũyupũ. ãgũsã waaí wějěrĩmasã ããrĩñurã. Ditarugue ãgũsãya buidire meéyorã iriñurã. 19 Jesús ãgũsãrẽ:

—Náka, yũ merã! Daporare musãrẽ waaí wějěrĩmasã ããrĩrĩrẽ piri, Marĩpũya kerere wererimasã ããrĩmakũ irigũkoa, ãrĩyupũ.

20 ãgũ irasũ ãrĩmakũ pérã, mata ãgũsãya buiriyukure píkõã, Jesús merã waakõãñurã.

21 Pũrũ Jesús yoaweyaro waa, Santiagore, ãgũ pagũmũ Juãrẽ bokajayupũ. ãgũsã Zebedeo wãikũgũ pũrã ããrĩñurã. ãgũsãya doódirugue ãgũsã pagũ merã ãgũsãya buiriyukure ãmurã iriñurã. Jesús ãgũsãrẽ: “Náka, yũ merã!” ãrĩ siiuyupũ. 22 ãgũ irasũ ãrĩmakũ pérã: “Jáũ”, ãrĩ, ãgũsãya doódirure, pagure píkõã, Jesús merã waakõãñurã.

Jesús wárã masakare buedea
(Lc 6.17-19)

23 Jesús ããrĩperero Galilea nikũrẽ judío masaka nerẽrĩ wiirigue buegorenayupũ. Õãrĩ kerere, Marĩpũ ãgũyarãrẽ doregũ ããrĩrĩrẽ bueyupũ. Irasũ ããrĩmakũ pũrĩrikũrãrẽ ããrĩpereri ãgũsã pũrĩrĩrẽ tauyupũ. 24 ãgũ irasiriri kerere

ãārĩperero Siria nikũ marã masĩpereakõãñurã. Irasirirã gajerosũperi sĩrĩrĩ oparãrẽ, pũrĩrikarãrẽ, wãtẽa ñajãsũnerãrẽ, ñamasĩrĩrĩ oparãrẽ, waamasĩmerãdere Jesús pũrogue ãĩãñurã. Irasirigũ ããrĩpererãrẽ tauyupũ Jesús.

²⁵ Ìgũ irasirimakũ ããrã, wãrã Galilea nikũ marã, Decápolis wãikũri nikũma makãrĩ marã, Jerusalén marã, Judea nikũ marã, dia Jordán wãikũdiya abe marĩriro gapũ marã ìgũ merã waañurã.

5

Jesús buúrugue masakare buedea

¹ Jesús, masaka wãrã ìgũ pũro ejamakũ ããgũ, buúrugue marĩa, eja doayupũ. Ìgũ irogue doamakũ, ìgũ buerã ìgũ pũro nerẽnugãjamurã. ² Ìgũsã nerẽnugãjamakũ ããgũ, Jesús ìgũsãrẽ ãsũ ãrĩ buerũroriyupũ:

*“Ãsũ irirãno ʘSʘyama”, ãrĩ buedea
(Lc 6.20-23)*

³ —“Marĩpũ iritamubirimakũ, ìgũ gããmerĩrẽ irimasĩña marĩbokoã”, ãrĩ gãñarãno, ʘmugasigue Marĩpũ ìgũyarãrẽ dorerogue waarãkuma. Iroguema ìgũsãya ããrã. Irasirirã ʘSʘyama.

⁴ ’Bujawereri merã ããrĩrãrẽ Marĩpũ ìgũsãrẽ gãñaturamakũ irigũkumi. Irasirirã ʘSʘyama.

⁵ “Gajerã nemorõ ããrã”, ãrĩ gãñamerã, Marĩpũ ìgũsãrẽ: “I nikũrẽ sĩgũrã”, ãrĩdeare oparãkuma. Irasirirã ʘSʘyama.

⁶ Marĩpũ gããmerĩrẽ iridũarã, ʘaboarã baadũarã, ñemesiburã iiridũarã irirosũ ããrĩma. Marĩpũ ìgũsãrẽ iritamugũkumi, ìgũ gããmerĩrẽ iriburo,

ãrĩgũ. Īgũsãrẽ iritamugũ, iirĩ, baayapianerã irirosũ
ããrĩmakũ irigũkumi. Irasirirã usuyama.

7 'Gajerãrẽ bopoñarĩ merã ĩãrãrẽ Marĩpũ ĩgũsãrẽ
bopoñarĩ merã ĩãgũkumi. Irasirirã usuyama.

8 'Ñerĩ opamerã Marĩpũre ĩãrãkuma. Irasirirã
usuyama.

9 'Gajerãrẽ õãrõ siuñajãrĩ merã ããrĩmakũ
iriduarãrẽ Marĩpũ ĩgũsãrẽ: “Yu pũrã ããrĩma”,
ãrĩgũkumi. Irasirirã usuyama.

10 'Marĩpũ gããmerĩrẽ iriri waja, gajerã ĩgũsãrẽ
ñerõ tarĩmakũ irisũrã ãmũgasigue Marĩpũ
ĩgũyarãrẽ dorerogue waarãkuma. Iroguema
ĩgũsãya ããrã. Irasirirã usuyama.

11 'Yure mũsã buremurĩ waja gajerã mũsãrẽ
ñerõ wereníkerepũrũ, mũsãrẽ ñerõ irikerepũrũ,
ããrĩpereri gajerosũperi ñerĩ kere ãrĩkerepũrũ,
usuyaka! 12 Marĩpũya kerere weredupuyunerãrẽ
mũsã dupuyuro ããrĩnerãrẽ ãsũta ñerõ irinerã
ããrĩmã. Irasirirã mũsãrẽ ñerõ irikerepũrũ, õãrõ
usuyari merã ããrĩrikũka! Pũrũguere wãro õãrĩ
oparãkoa ãmũgasiguere, ãrĩyupũ Jesũs.

*I ãmũguere Marĩpũyare irirã moã, sĩãgori irirosũ
ããrĩma, ãrĩ buedea*

(Mr 9.50; Lc 14.34-35)

13 Irasũ ãrĩ odo, Jesũs ãsũ ãrĩ buenemoyupũ:

—Mũsã i ãmũguere Marĩpũyare irirã moã okari
irirosũ ããrã. Moã okadea okabirimakũ, dupaturi
okamakũ irimasĩbirikoa. Béokõãkoa. Béoadero pũrũ,
masaka kũrawasiribéokõãkuma. Irasirirã mũsã
moã okari irirosũ Marĩpũyare irinikõãka!

14 'Mũsã i ãmũ marãrẽ sĩãgori irirosũ ããrã.
Irasirirã Marĩpũyare mũsã irimakũ ĩãrã, ĩgũrẽ

masĩrākuma. Buúru wekague āārĩrĩ makārē duúmasĩña máa. ¹⁵ Masaka sĩāgodirure sĩāgorā, dupa kũma dokague pĩbirikuma. Sĩāgo, wii dekogue siukuma, iri wii marā āārĩpererā ōārō boyorogue āārĩburo, ārĩrā. ¹⁶ I irirosũ musāde Marĩpuyare ōārō iriri merā masakare musā ĩgũyarā āārĩrĩrē masĩmakũ irika, ĩgũrē ũmugasigue āārĩgũrē: “Ōātarigu āārĩmi”, ārĩ buremuburo, ārĩrā!

Jesús Moisés doredeare buedea

¹⁷ 'Musā yure āsũ ārĩ gũñabirikōāka: “Marĩpu Moisére doreri pídeare, irasũ āārĩmakũ Marĩpuya kerere weredupuyunerā gojadeare béogu aarigú irikumi”, ārĩ gũñabirikōāka! Irire béogu aarigú meta iribu. Iri āārĩpererire keoro iriyuwarikugũ aarigú iribu. ¹⁸ Diayeta musārē werea. Ūmugasí, i nikũ āārĩrōpāta Marĩpu neō mérōgā su wāĩ ĩgũ doreri pídeare béobirikumi. Āārĩpereri ĩgũ: “Āsũ irigura”, ārĩdeare keoro iriyuwarikugukumi. ¹⁹ Iri dorerire su wāirē tarinugārāno, gajerārē: “Gua irirosũ irika!” ārĩ buerā, ũmugasigue Marĩpu ĩgũyarārē dorerogue ĩgũ ĩāmakũ ubu āārĩrā āārĩrākuma. Gajerā gapu iri dorerire ōārō irirā, gajerārē ĩgūsā irirosũ iridorerā, ũmugasigue ĩgũyarārē dorerogue ĩgũ ĩāmakũ oparā irirosũ āārĩrākuma. ²⁰ Ire musārē werea. Musā, Moisés doredeare buerimasā, fariseo bumarā nemorō Marĩpu gāāmerĩrē iribirikererā, Marĩpu ĩgũyarārē doreroguere neō waabirikoa.

Jesús masaka guarimarē buedea (Lc 12.57-59)

21 'Marĩpu musã ñekũsãmarãrẽ doredeare musã pénerã ããrĩbú. Īgũsãrẽ ãsũ ãrĩdi ããrĩmí: “Masakare wějẽbirikõãka! Gajigũre wějẽdinorẽ wajamoãka, Īgũ wějẽdea waja!” 22 Yũ gapũ musãrẽ werea. Sugũ Īgũyagũ merã guagũ, wajamoãsũgũkumi. Īgũyagũre: “Mũ wajamáa”, ãrĩ bũridagũnorẽ marĩ oparã wajamoãrãkuma. Īgũyagũre: “Waibũ irirosũ pémasĩrĩ opabea mũ”, ãrĩgũnorẽ peamegue waamagoegorãa.

23 'Irasirĩã Marĩpũya wiima soepeorogue Īgũrẽ bũremurã gajino pĩrã waamurã: “Yaagũ yũ merã guami”, ãrĩ gũñabokarã, 24 Marĩpũre sĩburire pĩkõã, musãyagũ pũroque waa: “Yũ mũrẽ ñerõ irideare kãtika!” ãrĩ sērẽka Īgũrẽ! Musã gãme ãmuadero pũrũ, dupaturi Marĩpũya wiigue musã sĩdũadeare Īgũrẽ sĩrã waaka!

25 'Sugũ musãrẽ weresãdũagũ, weresãrĩrẽ beyerimasũ pũroque musãrẽ ãĩdũamakũ, mata maague Īgũ merã waarã, Īgũ musãrẽ weresãrĩrẽ ãmuka! Īgũ merã õãrõ ãmubirimakũ, beyerimasũguere musãrẽ weresãgũkumi. Īgũ musãrẽ weresãmakũ pégu, beyerimasũ musãrẽ suraraguere wia, peresu iridoregũkumi. 26 Diayeta musãrẽ werea. Beyerimasũ musãrẽ wajaridoredeare wajaripeobirimakũ, neõ musãrẽ wiubirikumi.

Jesús: “Gajigũ marãpo merã ñerõ iribirikõãka!” ãrĩ buedea

27 'Iripoegue marã weredeare musã pénerã ããrĩbú. ãsũ ãrĩnerã ããrĩmá: “Gajigũ marãpo merã ñerõ iribirikõãka!” 28 Yũ gapũ musãrẽ werea. Sugũ nomeõrẽ ñerõ iridũari merã ĩãgũ, Īgũ gũñarĩgue igo merã ñerõ irisiami.

29 'Irasirirã mʉsãya koyeru diaye gapumarũ merã ãã, ñerõ irirã, irirure goreweabéorosũ iri ñerõ iririre pirika! Mʉsã koyerure béomakũ, iriru dita dediria. Ñerõ iririre pirimerã ããrĩpereri mʉsãya dupu merã peamegue béosũrãkoa. 30 Mʉsãya diayema mojõ merã ñerõ irirã, iri mojõrẽ dítitã béorosũ iri ñerõ iririre pirika! Mʉsãya mojõrẽ béomakũ, iri mojõ dita dediria. Ñerõ iririre pirimerã ããrĩpereri mʉsãya dupu merã peamegue béosũrãkoa.

Jesús masakare: “Mʉsã marãposã nomerẽ béobirikõãka!” ãrĩ buedea
(Mt 19.1-12; Mr 10.11-12; Lc 16.18)

31 'Iripoegue marã idere ãrĩnerã ããrĩma: “Sugũ ãgũ marãpore béoduagu: ‘I waja merã mure béoa’, ãrĩ gojari pũrẽ sũrõ gããmea”, ãrĩnerã ããrĩmã. 32 Yu gapu mʉsãrẽ werea. Sugũ, ãgũ marãpo gajigu merã ñerõ iribirikerepuru igore béogu, igore gajigu merã marãpukumakũ irigu, igore ñerõ irimakũ irikumi. Irasũ ããrĩmakũ, ãgũ béodeo merã marãpokugude ñerõ irigu irikumi.

Jesús: “Ãsũ irigura”, ãrĩrĩmarẽ buedea

33 'Iripoegue marãrẽ weredeare mʉsã pénerã ããrĩbũ. Ãsũ ãrĩ werenerã ããrĩmã ãgũsãrẽ: “‘Marĩpu wã merã ãsũ irigura’, ãrĩderosũta marĩ Opu ãũrõ keoro irika!” 34 Yu gapu mʉsãrẽ werea. Mʉsã gajerãrẽ: “Ãsũ irigura”, ãrĩrã, Marĩpore wãipeobirikõãka! “Ûmugasima merã ãsũ irigura”, ãrĩbirikõãka! Ûmugasi, Marĩpu doaro ubu ããrĩrõ meta ããrã. 35 I nikũma merãdere wãipeobirikõãka! I nikũ Marĩpuya nikũ ããrã. Irasirio ãgũ kũraña

doanírõ irirosũ ããrã. Jerusalén merãdere wãipeobirikõãka! Jerusalén marĩ Opũ turatarigũya makã ããrã. ³⁶ “Yaa dipuru merã ãsũ irigũra”, ãrĩ wãipeobirikõãka! Mũsã irasũ ãrĩrĩ merã neõ mũsãya dipuruma poarire ñírĩda, o borerida waamakũ irimasĩbirikoa. ³⁷ “Ãsũ irigũra”, o “Ãsũ iribirikoa”, ãrĩrã, wãipeoro marĩrõ su diayeta wereka! Wãipeori merã: “Ãsũ irigũra”, ãrĩrã, wãtĩ gããmerĩrẽ irirã yáa.

*Jesús masaka ñerõ iri gãmirĩmarẽ buedea
(Lc 6.29-30)*

³⁸ 'Iripoegue marã weredeare mũsã pénerã ããrĩbũ. Ãsũ ãrĩnerã ããrĩmã: “Mũrẽ gajigũ mũya koyerure pátĩãderosũta mude ãgũya koyerure pátĩã gãmika! Mũya guikarure ãgũ pãnuaderosũta mude ãgũya guikarure pãnuã gãmika!” ãrĩnerã ããrĩmã. ³⁹ Yũ gapũ mũsãrẽ werea. Mũsãrẽ ñerõ iridire irasũ ããkõãka! ãgũrẽ ñerõ iri gãmibirikõãka! Sugũ mũsãya wayupãrã diaye gapũre pãmakũ, kũgapũma wayupãrãdere pãdoreka! ⁴⁰ Sugũ mũrẽ weresãrĩrẽ beyerimasũ pũro ãã: “ãgũya surĩrore sĩdoreka, ãgũ yũre ñerõ iridea waja”, ãrĩ weresãmakũ, irĩnerẽ sĩka! Irasũ ããrĩmakũ, mũya wekamañedere sĩnemoka ãgũrẽ! ⁴¹ Sugũ surara gajinorẽ su kilómetro mũrẽ ãĩwãgãdoremakũ, gajĩ kilómetro ãĩwãgãnemobosaka doja! ⁴² Sugũ mũrẽ gajinorẽ sẽrẽmakũ, sĩka ãgũrẽ! Gajino mũrẽ wayumakũ sĩka ãgũrẽ! “Wayubirikoa”, ãrĩbirikõãka!

*Jesús: “Mũsãrẽ ããturirãrẽ mãĩka!” ãrĩ buedea
(Lc 6.27-28, 32-36)*

⁴³ 'Gaji iripoegue marã weredeare musã pénerã ããrĩbú. Ásũ ãrĩnerã ããrĩmá: “Musã merãmarãrẽ maĩka! Musãrẽ iãturirã gapure iãturi doo, gãmika!” ãrĩnerã ããrĩmá. ⁴⁴ Yu gapu musãrẽ werea. Musãrẽ iãturirãrẽ maĩka! Musãrẽ ñerõ werenírãrẽ: “Õãrõ ããrĩburo”, ãrĩka! Musãrẽ iãturi doorãrẽ õãrõ irika! Musãrẽ ñerõ ãrĩ buridamakũ, musãrẽ ñerõ irimakũ, ãgũsãya ããrĩburire Marĩpũre sërëbosaka! ⁴⁵ Irasirirã Marĩpũ ãmugasigue ããrĩgũ pũrã ããrĩrãkoa. Marĩpũ ñerãrẽ, õãrãdere abe asimakũ yámi. ãgũ dorerire irirã pũro, irimerã pũrodere deko merëmakũ yámi. Irasirirã musãde ãgũ irirosũta masakare sũrosũ õãrõ irika! ⁴⁶ Musãrẽ maĩrã direta maĩrã, ¿ñeénořẽ ãmugasigue wajatabokuri? Romano marã opure niyeru wajaseabosarimasãde ñerã ããrĩkererã, ãgũsãrẽ maĩrãrẽ maĩma. ⁴⁷ Musãyarã direta õãrõ bokatĩrĩñeãrã, ¿ñeéno õãrĩrẽ gajerã nemorõ iribokuri? Marĩpũre masĩmerãde ãgũsãyarãrẽ õãrõ bokatĩrĩñeãma. ⁴⁸ Irasirirã, Marĩpũ ãmugasigue ããrĩgũ neõ ñerĩ marĩgũ ããrĩrõsũta musãde neõ ñerĩ marĩrã ããrĩka! ãrĩ wereyupũ Jesús.

6

Jesús õãrõ iririkũrimarẽ buedea

¹ Jesús ãsũ ãrĩ werenemoyupũ:

—“Õãrĩrẽ irirã ããrã”, ãrĩrã, masaka iũrõ musã iririre iri ãmubirikõãka! Musã irire irasirimakũ, Marĩpũ ãmugasigue ããrĩgũ musã irasiridea wajare sĩbirikumi. ² Irasirirã boporãrẽ iritamurã, ããrĩpererãrẽ werebirikõãka! Irigatorimasã irirosũ iribirikõãka! ãgũsã boporãrẽ iritamurã, marĩ nerẽrĩ wiirigue nerëanerã, makã dekogue ããrĩrã

ĩũrõ: “Õãrã ããrĩma”, ãrĩburo, ãrĩrã, iri ĩmuma. Di-
ayeta mʉsãrẽ werea. Masaka ĩgũsãrẽ õãrõ ãrĩrĩ
merã wajatari opasiama. ³ Mʉsã gapʉ boporãrẽ
gajino sĩrã, masaka ĩãberogue sĩka! ⁴ Marĩpʉ,
mʉsã irasirimakũ ĩãgũ, mʉsãrẽ õãrõ wajatamakũ
irigʉkumi.

Jesús Marĩpʉrẽ sãrẽrĩrẽ buedea

(Lc 11.2-4)

⁵ 'Marĩpʉrẽ sãrẽrã, irigatorimasã irirosũ
iribirikõãka! ĩgũsã marĩ nerẽrĩ wiirigue, makã
dekogue masaka ĩãburo, ãrĩrã, sãrẽ ĩmuma. Diayeta
mʉsãrẽ werea. Masaka ĩgũsãrẽ ĩãrĩ merã wajatari
opasiama. ⁶ Mʉsã gapʉ Marĩpʉrẽ sãrẽrã, mʉsãya
taribugue ñajãa, disipʉro bia, gajerã ĩãberogue
ĩgũrẽ sãrẽka! ĩgũ deyomarĩgũ ããrĩkeregʉ, mʉsã
merã ããrĩgʉkumi. Irasirigʉ, gajerã ĩãberogue mʉsã
ĩgũrẽ sãrẽmakũ ĩãgũ, mʉsãrẽ õãrõ wajatamakũ
irigʉkumi.

⁷ 'Marĩpʉrẽ sãrẽrã, ubu ããrĩrĩ werenĩrĩ merã
dupaturi sãrẽdujabirikõãka! Marĩpʉrẽ masĩmerã
irasũ yãma. “Wãri werenĩrĩ merã gʉa sãrẽmakũ,
gʉare pégʉkumi”, ãrĩ gũñama. ⁸ ĩgũsã irirosũ
iribirikõãka! Mʉsã sãrẽburo dupuyuro Marĩpʉ
mʉsã gããmerĩrẽ masĩsiami. ⁹ Irasirirã ãsũ ãrĩ sãrẽrõ
gããmea Marĩpʉrẽ:

Gʉapʉ ũmʉgasigue ããrĩgũ, ããrĩpererã mʉrẽ goepe-
yari merã bʉremuburo.

¹⁰ Mʉ ããrĩpererãrẽ doreri aariburo. ũmʉgasigue
marã mʉ gããmerõ irirosũta i nikũ marãde
iriburo.

¹¹ ũmʉrikʉ gʉare baari sĩka!

- 12 Gajerã guare ñerõ irideare gua kãtirosũta mude
gua ñerõ irideare kãtika!
- 13 Gua ñerõ iridumakũ kãmutaka! Ñegũ guare
ñerĩ ãrĩmesãrĩrẽ tau kãmutaka! Mu suguta
guare doregu, turatarigu, gua baremugũ
ããrĩnigukoa, ãrĩ sërẽka Marĩpũre!
- 14 'Gajerã musãrẽ ñerõ irideare musã kãtimakũ
ĩãgũ, Marĩpũ ãmugasigue ããrĩgũ musã ñerõ iri-
deare kãtigukumi. 15 Gajerã musãrẽ ñerõ iri-
deare musã kãtibirimakũ, Marĩpũ musã ñerõ iri-
deare kãtibirikumi.

Jesús bererimarẽ buedea

- 16 'Marĩpũre baremurã bererã, irigatorimasã
irirosũ iribirikõãka! Ìgũsã bererã, ìgũsãya diapure
bujawererã irirosũ iri ìmuma, masaka ìgũsã
bererire ìãmasĩburo, ãrĩrã. Diayeta musãrẽ werea.
Masaka ìgũsãrẽ ìãrĩ merã wajatari opasiana.
- 17 Musã gapũ bererã, musã irinarõsũta irika!
Musãya diapure waakoe, õãrõ wũũapukõãka!
- 18 Musã irasirimakũ, gajerã musã bererire
masĩbirikuma. Marĩpũ gapũ deyomarĩgũ ããrĩkeregũ,
musã merã ããrĩmi. Ìgũ dita musã gajerã ìãberogue
iririre ìãgũ, musãrẽ õãrõ wajatamakũ irigukumi.

*Jesús marĩ ãmugasigue wajatapurire buedea
(Lc 12.33-34)*

- 19 'Wári i nikũmarẽ sea neõ duripĩbirikõãka! I
nikũma borewiji boakõãrokoa. Boabirimakũ, bu-
rua baadediukõãrãkuma. Baadediubirimakũ, ya-
jarimasã ñajãa, yajakõãrãkuma. 20 Irasirirã musã
ãmugasima opaburi gapũre gũñaka! Ñmugasima
neõ borewiji boabirikoa. Iroguere burua musã

opaburire neō baadediubirikuma. Yajarimasāde neō ñajāa, yajabirikuma. ²¹ Mᵁsā i ũmᵁma di-reta: “Opadᵁakoa”, ārī gũñarā, irire bᵁro maĩrākoa. Ƴmᵁgasima garᵁre: “Opadᵁakoa”, ārī gũñarā, irire bᵁro maĩrākoa.

Jesús masakaya koye sīāgodiru irirosū āārīrē buedea

(Lc 11.34-36)

²² 'Mᵁsāya koye mᵁsāya gũñarīguere sīāgodiru irirosū āārā. Mᵁsā ōārī koye oparā irirosū āārīmakū, mᵁsāya gũñarīguere ōārō sīāgoro irirosū āārā. Irasirirā Marīᵁyare masīa. ²³ Mᵁsā ñerī koye oparā irirosū āārīmakū, mᵁsāya gũñarīguere naĩtīārō irirosū āārā. Marīᵁyare masībea. I naĩtīārī, ñetaria. Irire masībirimakū ñegoroāa.

Jesús: “Niyerure maĩrā, Marīᵁre maĩbema”, ārī buedea

(Lc 16.13)

²⁴ 'Neō sugᵁ moāboerimasū pērā oparārē moāboemasībirikumi. Sugᵁ opᵁre maĩgū, gajigᵁ garᵁre maĩbirikumi, o sugᵁ opᵁre bᵁremugū, gajigᵁ garᵁre yᵁjᵁbirikumi. Niyerudere maĩtarigᵁ, Marīᵁ garᵁre maĩbemi.

Jesús, Marīᵁ ᵁgᵁ pūrārē korerimarē buedea

(Lc 12.22-31)

²⁵ 'Irasirigᵁ mᵁsārē ire weregᵁra. Mᵁsā āārīrikurire gũñarā, “¿Ñéonorē baarākuri, ñéonorē iirīrākuri, ñéonorē sāñarākuri?” ārī gũñarikᵁbirikōāka! Marī okari garᵁ, baari nemorō wajakᵁa. Marīya dupᵁ, surī nemorō wajakᵁa. ²⁶ Mirārē ũmarōgue wᵁrārē ĩāka! Īgᵁsā baadᵁarā, otebema. Otedea dukare seabema. Baari

duripíri wiiridere opabema. Marĩpu ãmugasigue ããrĩgá gapu ãgũsãrẽ baari sími. Musã gapu, mirã nemorõ wajakutarinugãa. ²⁷ Musã buru gũñarikuri merã neõ mérõgã masãnemobirikoa. Musã irasũ gũñarikuri wajaãa.

²⁸ Irire masĩkererã, ¿nasirirã musã suri sãñaburire gũñarikuri? Makãñũma goori masãrĩrẽ gũñaka! Iri moãbirikerero, suabirikerero õãrĩ suri sãñarõ irirosũ deyoa. ²⁹ Musãrẽ werea. Opu Salomón suri õãrĩ sãñadero nemorõ iri goori gapu õãrĩ deyoa. ³⁰ Iri goorire Marĩpu õãrĩ goori deyomakũ irikerepu, mérõgã pu ñãĩdija pereakõãa. Gajinu gapu peamegue soebéokõãsũa. Iri mata pereburi ããrĩkerepu, Marĩpu iri goorire õãrĩ deyomakũ yãmi. Iri goorire õãrĩ ããrĩmakũ irirosũ nemorõ musãrẽ õãrõ irigukumi. Surire sígukumi. Musã gapu ãgũrẽ mérõgã buremurĩ opãa. ³¹ Irasirirã: “¿Ñeonorẽ baarãkuri, ñeonorẽ iirĩrãkuri, ñeonorẽ sãñarãkuri?” ãrĩ gũñarikubirikõãka! ³² Marĩpure masĩmerã buru gũñarikuri merã irire ãmaníkõãma. Marĩpu ãmugasigue ããrĩgá gapu ããrĩpereri musã gããmerĩrẽ masĩsiami. Irire musãrẽ sígukumi. ³³ Irasirirã, Marĩpu musã Opu ããrĩrĩrẽ, ãgũ gããmerĩrẽ, ãgũ dorerire, ããrĩpereri nemorõ gããmepurorika! Musã irasirimakũ, ããrĩpereri musã baa, iirĩburire, musã suri sãñaburidere síwekapeogukumi. ³⁴ Irasirirã: “¿Naásũ waarokuri ñamigãrẽ?” ãrĩ gũñarikubirikõãka! Gajinumarẽ musã ñerõ tariburire gũñarikudupuyubirikõãka! Dapagãma direta gũñaka! Dapagãrẽ musã ñerõ tariburi ããrĩsiãa, ãrĩ wereyupu Jesús.

7

*Jesús, gajerārē: “Ñerã ããrĩma”, ãrĩ
werewɥabirikõãka! ãrĩ buedea
(Lc 6.37-38, 41-42)*

¹ Jesús irire ãrĩ odo, ãrĩnemoyurɥ doja:

—Gajerārē: “Ñerã ããrĩma”, ãrĩ
werewɥabirikõãka! Mɥsã werewɥabirimakũ ããgũ,
Marĩɥ mɥsārē: “Ñerã ããrĩma”, ãrĩ ããbirikumi.

² Gajerārē: “Õãrõ iribema”, ãrĩ ããrõsũta Marĩɥ
mɥsārē ããgukumi. Gajerārē: “Ãsũ ããrĩma”,
ãrĩ ããrõsũta Marĩɥ mɥsārē ããgukumi.

³ Mɥsã ñerõ irideia, koyerugue wãri turu oparosũ
ñetariri ããrĩrĩrē gũñabirikererã, mɥsãyagɥ ñerõ
irideia, koyerugue nikũyegã oparosũ ããrĩrĩrē:

“Ñegorãa”, ãrĩ gũñãa. ⁴ Irasirirã mɥsã ñerõ
irideia, koyerugue wãri turu oparosũ ããrĩrã,
mɥsãyagɥre ããgũya koyerugue ããrĩrĩ nikũyegãrē:
“¿Ãĩbéosi?” ãrĩmasĩbea. ⁵ Mɥsã ñerõ iririkurã,
irigatorikurã ããrã. Mɥsãya koyerugue ããrĩrĩ turu
garɥre ããbéorɥroriro irirosũ mɥsã ñerõ iririre
piripɥrorika! Irasiri odo, mɥsãyagɥre: “Mɥ ñerõ
iririre pirikõãka!” ãrĩ masĩa.

⁶ Marĩɥre ñerõ ãrĩ buridarārē ããgũya kerere
werebirikõãka! ããgũsãrē wererã, diayéare õãrĩrē
sĩrã, o yeseare ñãgũda wajaparidare sĩrã
irirosũ iribokoa. Diayéa guarã, õãrĩ sĩkereɥurɥ,
gãmenugã kũrĩkõãkuma. Yesea iridare noó gããmerõ
kɥrawasiribéokuma. ããgũsã irirosũ ããrĩrãrē,
ubugorata Marĩɥya kerere werebirikõãka!

*Jesús: “Marĩɥre sērērã, ãsũ ãrĩ sērēka!” ãrĩdea
(Lc 11.9-13; 6.31)*

7 'Marĩpuᵑe sērēka! Īgūrē sērēmakū, sīgukumi. Ōārĩrē āmarā, bokarākoa. Wiigue ñajāduarā oemakū, Marĩpuᵑu disipuro tũpā ñajādoregu irirosũ musā sērērĩrē pégukumi. 8 Īgūrē sērērānorē sīgukumi. Āmarāno, bokarākuma. Wiigue ñajāduarā oerā irirosũ Īgūrē sērēmakū ĩāgũ, ĩgūsārē ñajādoregu irirosũ ĩgūsā sērērĩrē ōārō pégukumi.

9 'Musā pũrā pārē sērēmakū, ũtāyere sĩbirikoa. 10 Waaĩ sērēmakũdere, āñarē sĩbirikoa. 11 Ñerā āārĩkererā, musā pũrārē ōārĩrē sĩmasĩa. Marĩpuᵑu ũmugasigue āārĩgũ gapu, musā nemorō ōārĩrē sĩmasĩmi. Irasirigu ĩgūrē sērērārē irire sīgukumi.

12 'Musā, gajerā musārē ōārō irimakū gāāmerōsũta musāde ĩgūsārē ōārō irika! Moisés gojadea pũgue, Marĩpuᵑya kerere weredupuyunerā gojadea pũguedere irasũta iridoredero āārĩbũ.

*Jesús eyabiri disipurore ñajāri keori merā buedea
(Lc 13.24)*

13 'Marĩpuᵑu puᵑogue ñajāduarā ĩgũyare irika! Irogue ñajāmakū diasagorāa. Eyabiri disipuro ñajārō irirosũ āārā. Peamegue waaró gapu eyari disipuro ñajārō, eyari maarē waaró irirosũ āārā. Iri maarē waamakū diasabea. Irasirirā wārā masaka irogue waarā yāma. 14 Marĩpuᵑu puᵑo gapure waamakū diasagorāa. Irasirirā mērāgāta masaka, eyabiri disipuro ñajārōrē, irogue eyabiri maarē bokama. Irogue waarā, Marĩpuᵑu merā ōārō āārĩrākuma.

*Jesús yukure dũka merā ĩāmasĩsũa, ārĩ buedea
(Lc 6.43-44)*

15 'Ōārō pēmasĩka! “Marĩpuᵑya kerere weredupuyurimasā āārā”, ārĩgatorārē pébirikōõka!

Īgūsā oveja guamerā, ōārīrē irirā irirosū mūsā p̄rogue ejarākuma. Irasirikererā, Īgūsā gūñarīguere diayéa makānūu marā guarā irirosū, ñerā āārīma. ¹⁶ Īgūsā ñerō irimakū mūsā Īgūsārē: “Ñerā āārīma”, ārī iāmasīrākoa. Poragu iguire dukakubirikoa. Ñaagūde higo wāikurire dukakubirikoa. ¹⁷ Ōādi yukū ōārīrē dukakūa. Ñedi gapū ñerīrē dukakūa. ¹⁸ Yukū ōādi ñerīrē dukakubirikoa. Ñedide ōārīrē dukakubirikoa. ¹⁹ Ōārī dukakubiridire pábéo, peamegue soekōāma. ²⁰ Irasirirā: “Marīp̄uya kerere weredupuyurimasā āārā”, ārīgatorārē Īgūsā iriri merā: “Ārīgatorikurā āārīma”, ārī iāmasīrākoa mūsā.

Jesús āārīpererā masaka Marīp̄u p̄rogue waabirikuma, ārī buedea
(Lc 13.25-27)

²¹ 'Wārā yure: “Muta āārā guā Opū”, ārīkererā, āārīpererā ūmugasigue Yurū Īgūyarārē dorerogue ñajābirikuma. Yurū ūmugasigue āārīgū gāāmerīrē irirā dita Īgū āārīrōguere ñajārākuma. ²² Yurū āārīpererā ñerārē wajamoārīnū ejamakū, wārā yure: “Guā Opū, mūyare masakare buebū. Mū wāi merā wātēārē béowiu, wāri ōārīrē iri ĩmubū”, ārīrākuma. ²³ Īgūsā irasū ārīkererū: “Mūsārē neō masībiribū. Ñerīrē irirā āārā mūsā. Irasirirā yū p̄rore wirika!” ārīgukoa.

Jesús pe wii keori merā buedea
(Mr 1.22; Lc 6.47-49)

²⁴ 'Yū werenīrē p̄duripígūno, yū dorerire irigūno, ōārō pémasīgū āārīmi. Sugū ūtāyegue

ũkũãrĩ goberi máñajãa, wii õãrõ núdi irirosũ ããrĩmi. ²⁵ Pũũ deko merẽ, dia wáro yura, mirũ buro wẽjẽpukerepũũ, iri wii ãkũãrõ núdea wii ããrĩsĩã, neõ mirũabirikoa. ²⁶ Yũ werenírĩrẽ pékeregũ, yũ dorerire iribi gapũ sugũ ìmparogue wii iridi irirosũ ããrĩmi. ²⁷ Pũũ deko merẽ, dia wáro yura, mirũ buro wẽjẽpumakũ, mata õjẽdija, kõmopereakõãkoa, ãrĩ wereyupũ Jesús.

²⁸ Ìgũ bue odomakũ, masaka ìgũ buerire pégũkari merã: “Õãtariro buemi”, ãrĩ gũñañurã. ²⁹ Moisés gojadeare buerimasã irirosũ buebiriypũ. Sugũ doregũ irirosũ bueyupũ Jesús.

8

Jesús kãmi boagũre taudea (Mr 1.40-45; Lc 5.12-16)

¹ Jesús buúrũgue ããrãdi dijarimakũ ìãrã, wárã masaka ìgũrẽ tayañurã. ² Sugũ kãmi boagũ Jesũre ìãgũ, ìgũ pũro ñadukũpuri merã ejamejã, ìgũrẽ sêrẽyupũ:

—Yũ Opũ, mũ yũ pũrĩrikũrere taudũagũ taumasã, ãrĩyupũ.

³ Ìgũ irasũ ãrĩmakũ pégu, Jesús ìgũya mojõ merã ìgũrẽ moãñayupũ.

—Mũrẽ taugũra. Kãmi marĩgũ dujaka! ãrĩyupũ.

Ìgũ irasũ ãrĩmakũta, kãmi yariakõãyuro.

⁴ Irasirigu Jesús ìgũrẽ ãrĩyupũ:

—Gajerã masakare mũ tariadeare werebirikõãka! Paí pũroque mũrẽ kãmi yariadeare ìgũrẽ ìmugũ waaka, ìgũ mũrẽ: “Kãmi marĩgũ ããrĩmi”, ãrĩburo, ãrĩgũ. Ìgũ irasũ ãrãdero pũũ, Moisés gojadea pũgue sĩdoredeare sĩka! Mũ irire

irimakū ĩārā, masaka mūrē kāmi yariadeare masĩrākuma, āĩyurũ Jesús ĩgūrē.

*Jesús surara opũre moãboegũre taudea
(Lc 7.1-10)*

⁵ Pũrũ Jesús Capernaugue ejamakū, romano marā surara opũ ĩgũ pũro ejanugā, ĩgūrē iritamurĩ sērēyurũ:

⁶ —Gũa Opũ, yũre moãboegu bũro pũĩrikugũ yaa wiigũe oyami. Bũari merā bũro pũĩsũgũ iriami, āĩyurũ.

⁷ Jesús ĩgūrē āĩyurũ:

—ĩgūrē taugũ waagũra.

⁸ Surara opũ ĩgūrē yũjũyurũ:

—Yũ Opũ, yaa wiire mūrē: “Ñajārika!” āĩ masĩbirikoa. Yũ ubu āārĩgũ āārā. Irasingũ mũ õõgueta doreri merā yũre moãboegu tarigakumi.

⁹ Gajerā oparā yũre dorema. Yũde gajerā surarare dorea. Yũ sugũre: “Waaka!” āĩmakū, waami. Gajigũre: “Aarika!” āĩmakū, aarĩmi. Yũ, yũre moãboegũre: “Ire irika!” āĩmakū, irire yāmi, āĩyurũ.

¹⁰ Jesús surara opũ irasũ āĩĩrĩrē pégũ, pégũkakõāyurũ. ĩgūrē tũyarārē āsũ āĩyurũ:

—Diayeta mũsārē werea. ĩĩ surara opũ Israel bumũ āārĩbirikeregũ, yũre bũremumi. ĩĩ irirosũ yũre bũremugũ neõ sugũ Israel bumārē boka-jabiribũ. ¹¹ Mũsārē werea. Wārā masaka ĩĩ irirosũ yũre bũremurākuma. ĩgũsā āārĩperero marā judío masaka āārĩmerā āārĩkererā, ũmũgasigue Marĩpũ ĩgũyarārē dorerogue eja, marĩ ñekũsāmarā

Abraham, Isaac, Jacob merā doa, baarākuma.

12 Gajerã judío masaka: “Gua Opu ããrĩrõgue waamuraã ããrã”, ãrĩkerepuru, ãgũsã buremubiri waja Marĩpu ãgũsãrẽ naĩĩrõrõgue béodediugakumi. Iroguere pũrĩsũrã buro ore, bujawereri merã ãgũsãya guikare kũrĩduútũrãkuma, ãrĩyupu Jesús.

13 Irasũ ãrĩ odo, surara opure ãrĩyupu:

—Dujáaka muya wiigue! Mu buremurõsũta waarokoa murẽ moãboegure, ãrĩyupu.

Ãgũ irasũ ãrĩripoeta, ãgũrẽ moãboegure pũrĩrĩ tariakõãyuro.

Jesús, Pedro máñekõrẽ taudea

(Mr 1.29-31; Lc 4.38-39)

14 Puru Jesús Pedroya wiigue waayupu. Iri wiigue ñajãgũ, Pedro máñekõrẽ peyarogue buro nimakurikugo oyagore bokajayupu. 15 Irasirigu igoya mojõrẽ moãñayupu. ãgũ moãñamakũta, nimakuri tariakõãyuro. Iri tarimakũ wãgãnugã, ãgũsãrẽ baari ejoyupo.

Jesús wárã pũrĩrikurãrẽ taudea

(Mr 1.32-34; Lc 4.40-41)

16 Naĩmejãripoe ããrĩmakũ, masaka wárã wãtẽa ñajãsũnerãrẽ Jesús purogue ãĩjañurã. ãgũ werenĩrĩ merã wãtẽa ãgũsãguere ñajãnerãrẽ béowiyupu. Irasũ ããrĩmakũ, ããrĩpererã pũrĩrikurãrẽ tauyupu.

17 Irire irigu, iripoeguemu Marĩpuya kerere weredupuyudi Isaías gojaderosũta iriyupu. Åsũ ãrĩ gojadi ããrĩmĩ: “Marĩ turabirire, marĩ sĩrĩrĩrẽ marĩrẽ taubosami”, ãrĩ gojadi ããrĩmĩ.

Gajerã Jesũre: “Murẽ tuyadũakoa”, ãrĩdea

(Lc 9.57-62)

18 Jesús wárã masaka ïgũ pũro nerẽmakũ ïãgũ, ïgũ buerãrẽ:

—Náka, ditaru sikoerũgue taribujarã! ãrĩyurũ.

19 ïgũ irasũ ãrĩmakũ, sugũ Moisés gojadeare buerimasũ Jesús pũro eja, ãrĩyurũ:

—Buegũ, mũ noó waaró mũrẽ tũyagũra, ãrĩyurũ.

20 Jesús ïgũrẽ yũjũyurũ:

—Makãnúũ marã diayéa ïgũsã kãrĩrĩ toreri opama. Mirãde ïgũsã kãrĩrõ opama. Yũ ããrĩpererã ïgũ gapũ kãrĩrõ opabea, ãrĩyurũ.

21 Gajigu ïgũ buerire tũyagu ïgũrẽ ãrĩyurũ:

—Yũ Opũ, yũrũ boamakũ ïgũrẽ yáa odo, mũrẽ tũyagũra, ãrĩyurũ.

22 Jesús ïgũrẽ yũjũyurũ:

—Yũre tũyadũagu, daporata yũ merã aarika! Yũre bũremumerã, boanerã irirosũ ããrĩrãta boanerãrẽ yáaburo, ãrĩyurũ.

Jesús mirũ, makũrĩrẽ toemakũ iridea

(Mr 4.35-41; Lc 8.22-25)

23 Irasũ ãrĩ odo, doódirugue ïgũ buerã merã mũrĩñajãyurũ. 24 ïgũsã mũrĩñajãa, taribujaripoe ditarure mirũ bũro waayuro. Makũrĩ doódirure páñajãmiũkõãdiyuro. Irasũ waaripoere Jesús gapũ kãrĩgũ iriyurũ. 25 Irasirirã ïgũrẽ yobeñurã:

—Gũa Opũ, gũare tauka! Marĩ mirĩmurã yáa, ãrĩñurã.

26 ïgũsã irasũ ãrĩmakũ, Jesús yũjũyurũ:

—¿Nasirirã bũro gũiri mũsã? Yũre mérõgã bũremurĩ opáa mũsã, ãrĩyurũ.

Irasũ ãrĩgũta wãgãñgã: “Mirũ, makũrĩ iropãta, toeaka!” ãrĩyurũ. ïgũ irasũ ãrĩmakũ, mirũ,

makūrīde toedijapereakōāyuro. ²⁷ Īgū irasirimakū iāguka, āsū ārī gāme werenīñurā:

—¿Ñeémuno masakū āārīrī īi? Mirū, makūrīde ĩgūrē tarinugābea, ārīñurā.

*Jesús Gadara marārē wātēa ñajānerārē béowiudea
(Mr 5.1-20; Lc 8.26-39)*

²⁸ Pꝛꝛꝛ Jesús ditarure taribuja, Gadara marāya nikūgue ejayupꝛ. Irogue ejamakū, pērā ūma masāgoberi watopegue āārānerā ĩgūrē bokatīrīñurā. Īgūsā wātēa ñajāsūnerā goerā āārīñurā. Irasirirā iro waarī maarē masaka neō waabiriñurā. ²⁹ ĩgūrē bokatīrī, āsū ārī gainīñurā:

—Jesús, ūmagasigue marā Opꝛ magū, ¿nasirigu aarigú yári mꝛ gꝛa pꝛoguerē? ¿Īgū āārīpererā ñerārē wajamoārīñꝛ ejabirikerepꝛꝛ, gꝛare po-yarikumakū irigu aariri mꝛ? ārīñurā.

³⁰ Īgūsā koregue wārā yesea āma baarā iriñurā.

³¹ Irasirirā wātēa Jesúre āsū ārī sērēñurā:

—Gꝛare béowiugꝛ, sīisā yeseaguere ñajādoreka! ārīñurā.

³² —Jáu, ĩgūsārēta ñajārā waaka! ārīyupꝛ Jesús.

Īgū irasū ārīmakū, ĩgūsā pērā ūmaguere āārānerā yeseaguere ñajāñurā. Īgūsā ñajāmakūta, yesea dupaturugue ūma mirēbuáa, ditarugue meébia dijáa, mirī boapereakōāñurā.

³³ Irasū waamakū iārā, yeseare korerimasā gꝛkari merā makāgue ūmadujáa, āārīpereri ĩgūsā iādeare, irasū āārīmakū wātēa ñajāsūnerārē waadeare wereñurā. ³⁴ Irire pērā, iri makā marā āārīpererā Jesús pꝛogue waa, ĩgūrē iārā, turaro merā ĩgūsāya nikūrē wiridoreñurā.

9

Jesús dupu buadire taudea
(Mr 2.1-12; Lc 5.17-26)

¹ Irasirigu Jesús doódirugue marĩñajãa, ditarure taribuja, ãgũya makãgue ejayupu. ² Iroguere sugu dupu buadire ãgũ peyaro merã Jesús puro ãijañurã. Jesús, ãgũsã ãgũrẽ buremumakũ ããgũ, dupu buadire ãsũ ãrĩyupu:

—Gũñaturaka! Yu, mu ñerõ irideare kãtia, ãrĩyupu.

³ ãgũ irasũ ãrĩmakũ pérã, surãyeri Moisés gojadeare buerimasã ãsũ ãrĩ gũñañurã: “ãgũ werenĩrĩ merã Marĩpure ñerõ werenĩmi”. ⁴ Jesús gapu ãgũsã gũñarĩrẽ ããmasĩ, ãsũ ãrĩyupu:

—¿Nasirirã yure ñerõ gũñarĩ musã? ⁵ ¿Naásũ ãrĩrĩ gapu diasaberi ñi buadire: “Yu, mu ñerõ irideare kãtia”, ãrĩrĩ, o “Wãgãnuãgã, waaka!” ãrĩrĩ gapu diasaberi? ⁶ Yu ããrĩpererã tĩgũ i ãmugue ããrĩrãrẽ ãgũsã ñerõ irideare Marĩpu dorero merã kãtimasã. Irasirigu ñi buadire taugura, musãrẽ irire masĩdoregu, ãrĩyupu. Irasũ ãrĩ odo, buadire ãrĩyupu:

—Wãgãnuãgã, mu oyaderore ãĩ, muya wiigue waaka! ãrĩyupu.

⁷ ãgũ irasũ ãrĩmakũ pégu, buadi ããrãdi wãgãnuãgã, ãgũya wiigue waakõãyupu. ⁸ Masaka, ãgũ irasũ waarire ããrã, ããgukakõãñurã. Marĩpure: “Õãtaria, mu turari masakure sĩrĩ”, ãrĩ, usuyari sĩñurã.

Jesús Mateore siiudea
(Mr 2.13-17; Lc 5.27-32)

⁹ P_uru Jesús iro merã waa, y_ure ããbokami. Y_u Mateo*, romano marã op_ure niyeru wajaseabosagu ããrĩbú. Jesús, y_u moãrĩ taribugue doag_ure ãã, y_ure: “Náka, y_u merã!” ãrĩmi. Ìgũ irasũ ãrĩmakũ pégu, wãgãngã, Ìgũ merã waakõãb_u.

¹⁰ P_uru yaa wiigue Jesús ìgũ buerã merã baaripoe wárã niyeru wajaseabosarimasã, gajerã ñerõ irirãde baarã ejama. ¹¹ Ìgũsã merã Ìgũ baamakũ ããrã, fariseo bumarã gap_u Ìgũ buerãrẽ sêrẽñama:

—¿Nasirig_u musãrẽ bueg_u niyeru wajaseabosarimasã, ñerõ irirã merã baari? ãrĩma.

¹² Ìgũsã irasũ ãrĩmakũ pégu, Jesús ãrĩmi:

—Pũrĩrĩ marĩrã kúririmasũrẽ ãmabema. Pũrĩrikurã gap_u Ìgũrẽ ãmama. ¹³ Marĩp_uya werenĩrĩ gojadea pũgue Ìgũsã gojadeare buerã waaka! Æsũ ãrĩ gojasũdero ããrĩbú iri pũguere: “Y_ure b_uremurã, waimurãrẽ wẽjẽ soepeomakũ gããmebea. Gajerãrẽ musã bopoñarĩ merã ããmakũ gããmea”, ãrĩmi Marĩp_u, ãrĩ gojasũdero ããrĩbú. “Õãrã ããrã”, ãrĩ gũñarãrẽ siug_u aaribirib_u. “Ñerõ irirã ããrã”, ãrĩ gũnarã direta siug_u aarigú irib_u, Ìgũsã ñerõ irideare b_ujawere, gũnarĩrẽ gorawayuburo, ãrĩgũ, ãrĩmi Jesús fariseo bumarãrẽ.

*Jesúre bererimarẽ sêrẽñadea
(Mr 2.18-22; Lc 5.33-39)*

¹⁴ P_uru Juan masakare wãiyeg_u buerire t_uyarã Jesúre sêrẽñarã ejama:

* **9:9** Mateo pe wãĩ opayup_u. Ìgũta Levĩ wãĩk_uyup_u.

—Gua Marĩpure buremurã berea. Irasũ ããrĩmakũ fariseo bumarãde berema. ¿Nasirirã ma buerã gapu gua irirosũ iriberi? ãrĩma.

¹⁵ Jesús ĩgũsãrẽ yujami:

—Sugũ mojõsiadi bosenu irimakũ, ĩgũ siiuanerã ĩgũ merã ããrĩrã bujawerebirikuma. Puru ĩgũrẽ gajerã ãĩãmakũ, bujawereri merã bererãkuma†.

¹⁶ Masaka maama surĩro gasiro merã bugũñerẽ seretũbirikuma. Irasũ seretũmakũ, maama gasiro ĩgũsã koeadero puru, tũãneeõ, bugũñerẽ wãri gobe yeguenemomakũ irikoa. ¹⁷ Waimurã gasiri merã iridea ajuri bugũ ajurigue maama igui dekore diribirikuma. Irasũ dirimakũ, maama igui deko pãmu, bugũ ajuro sërãturabiri ooreakõãkoa. Irasiriro igui deko, ajurode kõmokoã. Irasirirã maama igui dekore maama ajurogue diriro gããmea, ãrĩmi Jesús ĩgũsãrẽ‡.

Jesús Jairo magõrẽ, gajego nomeõ ĩgũya surĩrore moãñagõrẽ taudea

(Mr 5.21-43; Lc 8.40-56)

¹⁸ Jesús ĩgũsãrẽ wereripoe judío masaka nerẽrĩ wii opu Jesús puro eja, ñadukupuri merã ejamejã, ĩgũrẽ ãrĩmi:

—Yu magõ daporata kõmoakõãmo. Iгоре muya mojõ merã ñapeogu aarika! Irasirimakũ, dupaturi okagokumo, ãrĩmi.

† **9:15** Jesús irire irasũ ãrĩgũ: “Yu sugũ mojõsiadi bosenu irigu irirosũ ããrã. Yu buerã, mojõsiadi siiuanerã irirosũ ããrĩma. Irasirirã, purugue yu ĩgũsã merã ããrĩbirimakũ ĩãrã, bujawereri merã bererãkuma”, ãrĩgũ irimi. ‡ **9:17** Masaka, iripoegue iririkudeama, maama bueri merã buemorẽduamakũ ĩãgũ, Jesús irasũ ãrĩmi.

19 Īgũ irasũ ārĩmakũ pé, Jesús wāgānugā, Īgũ merā waami. G_{HA} Īgũ buerāde Īgũ merā waabu.

20 G_{HA} maague waaripoe sugo nomeō Jesús p_{URUPU} gap_U eja, Īgũya suriro yuware moāñayupo. Igo pe mojōma pere su gubu peru pērēbejari bojorig-ora dí wiriri merā pūrīrik_Ugo āārīyupo. 21 Āsũ

ārī gũñayupo: “Īgũya surīrore y_U moāñarī merā dita y_U pūrīrik_Uri tarirokoa”, āārī gũñayupo. 22 Igo moāñamakũ péña, Jesús gāmenugā, igore ĩā, āārīmi:

—Gũñaturaka! M_U y_{ARE} b_{UREMURĪ} opāa. Irasirigo m_U pūrīrik_Urire tausūa, āārīmi. Īgũ irasũ ārĩmakũta, pūrīrī marīgō dujamo.

23 P_{URU} Jesús Jairoya wiigue ejami. Iroque ñajājag_U, majīgō boadeore yáburo dupuyuro bayapeorimasārē, gajerā b_{URO} ore, gainírārē bokaja, 24 Īgūsārē āsũ āārīmi:

—Wiriaka m_{USĀ}! Majīgō boabemo. Kārīgō yámo.

Īgũ irasũ ārĩmakũ pérā, Īgūrē b_{URIMA}. 25 Jesús Īgūsārē wiriadore, boadeo āārīrī taribugue ñajāa, igoya mojōrē ñeāyup_U. Īgũ ñeāmakũta masābeja, wāgānugāyupo. 26 Masaka āārīperero iro āārīrā Jesús iriadea kerere péperekōāñurā.

Jesús pērā koye ĩāmerārē taudea

27 Jesús iro āārādi wiriamakũ, pērā koye ĩāmerā Īgūrē gainí t_{UYAMA}:

—David parāmi āārīturiag_U, g_{UARE} bopoñaka! āārīma.

28 Jesús, wiigue ñajāmakũ, koye ĩāmerāde ñajāa, Īgũ p_{UROGUE} ejanugāma. Irasirig_U Jesús Īgūsārē sērēñami:

—¿Y_U m_{USĀRĒ} koye ĩāmakũ irimasīrērē b_{UREMURĪ}? āārīmi.

—Gua opa, buremua, arī yujuma.

²⁹ Īgūsā irasū ārīmakū pégū, Īgūsāya koyere ñapeomi:

—Musā buremurōsūta musārē ĩāmakū irigura, ārīmi.

³⁰ Īgū irasū ārīmakū, Īgūsā oārō ĩākōāma. Irasirigū Jesús Īgūsārē ārīmi:

—Yu musārē taurire gajerārē werebirikōāka! ārīmi.

³¹ Īgū irasū ārīkerepū, āārīperero iro marārē Jesús Īgūsārē iriadeare werewasiripeokōāñurā.

Jesús wereníbire werenímakū iridea

³² Koye ĩāmerā āārānerā iri wiire wiriaripoeta, gajerā sugū wereníbi wātī ñajāsūdire Jesús puro āījama. ³³ Jesús Īgūrē ĩā, wātī Īgūguere ñajādire béowiumi. Īgū wātīrē béowiumakūta, wereníbiradi werenínugāmi. Īgū irasirimakū ĩārā, āārīpererā ĩāguka:

—Marī oō Israel nikūrē āsū iririnorē neō ĩābiribū, ārīma.

³⁴ Fariseo humarā gapū Jesúre:

—Īi, wātēa opa turari merā wātēārē béowiumi, ārī werewūama.

Jesús masakare bopoñarī merā ĩādea

³⁵ Jesús āārīpereri makārīrē judío masaka nerērī wiirigue masakare buegorenagū waami. Oārī kerere, Marīpū Īgūyarārē doregū āārīrīmarē buenami. Irasū āārīmakū, pūrīrikarārē āārīpereri gajerosūperi sīrīrī oparārē taunami. ³⁶ Masakare ĩāgū, bopoñarī merā Īgūsārē ĩāmi. “Īgūsā bujawererā, gūñaturamerā, oveja sugū Īgūsārē

korerimasū opamerā irirosū āārīma”, āārī gūñayurḡ. ³⁷ Irasirigḡ āsū āārīmi gḡare īgū buerārē:

—Marīpḡyare neō pémerā, poeegue oteri dḡka buribejadea irirosū wārā āārīma. Īgūsārē īgūyare weremurā gapḡ iri poeere moārīmasā irirosū mérāgā āārīma. ³⁸ Irasirirā marī Opḡare iri poee opḡ irirosū āārīgūrē: “Gajerā mḡyare weremurārē iriuka!” āārī sērēka! āārīmi Jesús gḡare.

10

Jesús pe mojōma pere su gubu peru pērēbejarā īgū buedoregḡ pímurārē beyedeā

(Mr 3.13-19; Lc 6.12-16)

¹ Pḡrḡ Jesús gḡare pe mojōma pere su gubu peru pērēbejarā īgū buerā āārīmurārē siiu, gḡare īgū turarire sīmi, āārīpereri pūrīrērē tau, wātēā masakare ñajānerādere béowiuburo, āārīgū.

² Āsū wāīkurā āārībú gḡa Jesús beyenerā: Simón wāīkḡgḡ āārīmí. Īgūrēta “Pedro” wāīyemi Jesús. Simón pagḡmḡ Andrés wāīkḡmi. Gajigḡ Santiago āārīmí. Īgū pagḡmḡ Juan wāīkḡmi. Īgūsā Zebedeo pūrā āārīmá. ³ Gajerā Felipe, Bartolomé, Tomás āārīmá. Yḡ Mateo, romano marā opḡare niyeru wajaseabosarimasū āārīdi āārībú. Gajigḡ Santiago, Alfeo magū āārīmí. Gajigḡ Tadeo āārīmí. Īgūta Lebeo wāīkḡmi. ⁴ Gajigḡ Simón, celote wāīkḡri bumḡ āārīmí. Gajigḡ Judas Iscariote wāīkḡgḡ āārīmí. Īgūta Jesúre wējēdḡarāguere īgūrē īmubu āārīmí.

Jesús īgū buerārē buedoregḡ iriudeā

(Mr 6.7-13; Lc 9.1-6)

⁵ Jesús guare ĩgũ buerã pe mojõma pere su gubu peru pẽrebejarãrẽ turarire sĩ odo, ãsũ ãrĩ were iriumi:

—Judío masaka ããrĩmerã pũroguere waabirikõãka! Irasũ ããrĩmakũ, Samaria nikũma makãrĩguedere waabirikõãka! ⁶ Israel bumarã Marĩpũyare masĩmerã, oveja dedirinerã irirosũ ããrĩrã pũro gapũ waaka! ⁷ ĩgũsãrẽ ãsũ ãrĩ wererã waaka: “Mẽrõ duyãa, Marĩpũ ĩgũyarãrẽ doreri ejaburo”, ãrĩka! ⁸ Pũrĩrikurãrẽ tauka! Boanerãrẽ masũka! Kãmi boarãdere tauka! Wãtẽa masakare ñajãnerãrẽ bẽowiuka! Yũ turarire mũsãrẽ wajamarĩrõ sĩa. Irasirirã, yũ mũsãrẽ wajamarĩrõ sĩrõsũta wajamarĩrõ ĩgũsãrẽ tauka!

⁹ 'Waarã, neõ niyeru oro, plata, cobrere, ¹⁰ mũsãya aju ãĩabirikõãka! Surĩ, sapatu mũsã sãñarĩ merã dita waaka! Tuariyukure ãĩabirikõãka! Moãrĩmasã ĩgũsã moãrĩ waja merã wajata baama. Irasirirã mũsã masakare bueri waja baari mũsãrẽ sĩrãkuma.

¹¹ 'Makãrẽ ejarã, iri makã marã: “Ĩta õãrõ irigũ ããrĩmi”, ĩgũsã ãrĩgũ pũro dujaka! Mũsã iro ããrĩrõpã ĩgũya wiire ããrĩka! Waarãgue iri wiire wirika! ¹² Iri wiire ñajãrã, wii marãrẽ: “Marĩpũ mũsãrẽ siuñajãrĩ sĩburo”, ãrĩ õãdoreka! ¹³ Mũsãrẽ õãrõ bokatĩrĩñeãmakũ, ĩgũsãrẽ: “Marĩpũ siuñajãrĩ sĩrĩ merã õãrõ ããrĩrikuka!” ãrĩka! Mũsãrẽ gããmemerã, i siuñajãrĩ merã ããrĩbirikuma. ¹⁴ Mũsãrẽ ĩgũsã ñeãbirimakũ, mũsã buerire pẽduabirimakũ ĩãrã, ĩgũsãya wiire, o ĩgũsãya makãrẽ wiriarã, nikũwera mũsãya guburigue tuadeare mojẽbẽoka, ĩgũsãrẽ wajamoãburire ĩmurã! ¹⁵ Diayeta mũsãrẽ werea. Marĩpũ ããrĩpererã

ñerārē wajamoārīnũ ejamakũ Sodoma, Gomorra marārē wajamoārō nemorō mʉsārē gāāmemerārē wajamoāgukumi.

Jesúre bʉremurārē gajerā ñerō iriburire weredea

¹⁶ 'Yure ōārō péka! Ovejare makānúũ marā diayéa guarā watopegue iriurosũ ñerā masaka watopegue mʉsārē iriua. Irasirirā ōārō pémasíka! Ígūsā watopegue ñerō iriro marīrō āārīrikuka!

¹⁷ Pémasíka! Masaka mʉsārē ígūsā oparārē wiarākuma, mʉsārē wajamoādorera. Judío masaka ígūsā nerērī wiiriguedere mʉsārē tārārākuma.

¹⁸ Irasũ āārīmakũ, mʉsā yure bʉremurī waja, ígūsāya makārī marā oparā pʉrogue, ígūsāya nikũ marā oparā pʉrogue āīārākuma mʉsārē wajamoādoremurā. Irasirirā mʉsārē iroque āīāmakũ, oparārē, judío masaka āārīmerādere yaa kerere wererākoa mʉsā.

¹⁹ Mʉsārē oparā pʉrogue āīāmakũ: “¿Naásũ āārīrākuri ígūsārē?” ārī gũñarikubirikōāka! Oparā mʉsārē sērēñamakũ, Marīpʉ gũñarī sīrī merā wererākoa. ²⁰ Irasirirā mʉsā gũñarī merā werebirikoa. Marīpʉ, Ōāgũ deyomarīgũ merā mʉsārē masīrī sīrī merā werenírākoa.

²¹ 'Iripoere masaka, ígūsāyarā yure bʉremumakũ iārā, ígūsārē oparāguere wējēdorera wiarākuma. Pagūsāmarā ígūsā pūrārē oparāguere wējēdorera wiarākuma. Gajerā, ígūsā pagūsāmarārē iāturi, oparāguere wējēdorera wiarākuma.

²² Irasirirā masaka āārīperero i ũmũ marā yure mʉsā bʉremurī waja mʉsārē iāturi doorākuma. Marīpʉ gapʉ yure piriro marīrō bʉremugūrē taugukumi. ²³ Su makā marā mʉsārē ñerō irimakũ,

gaji makāgue duriwāgāka! Diayeta mūsārē werea. Āārīpereri Israel nikūma makārīrē mūsā buegorena odoburo dupuyuro, yu āārīpererā tīgū Marīpu iriudi i amugue dupaturi aarigukoa doja.

²⁴ 'Neō sugu buegu, ĩgūrē buegu nemorō āārībemi. Moāboerimasūde ĩgū opu nemorō āārībemi. ²⁵ Sugu buegu ĩgūrē buedi irirosū dujaduamakū oāgorāa. Moāboerimasūde ĩgū opu irirosū dujaduamakū oāgorāa. Masaka yare mūsā Opure: "Ī Beelzebú, wātēa opu āārīmi", āārīā, mūsā yaarādere ñerō ārī werenírākuma.

Jesús: "¿Noārē güiri merā buremurō gāāmerī?" ārī weredea

(Lc 12.2-7)

²⁶ 'Irasirirā mūsārē ñerō iriduarārē güibirikōāka! Āārīpereri gajerā ĩāberogue irideare, durirogue irideadere purugue masísūrokoa. ²⁷ Yu mūsārē masaka péberogue weredeare ĩgūsā pérogue wereka! Yu mūsārē gajerā ĩāberogue werenideare makā dekogue buro busuro merā wereka! ²⁸ Mūsārē wējērā mūsāya dupu direta boamakū irirākuma. Mūsāya yujupūrārī gapure boamakū irimasībirikuma. Irasirirā güibirikōāka! Marīpu gapure güika! ĩgū gapu mūsāya dupu, mūsāya yujupūrārīrē peamegue béomasīmi. Irasirirā ĩgūrē güiri merā buremuka!

²⁹ 'Masaka pērā mirā wajarirā, su niyeru tigā, mérōgā wajakuri tigārē sīkuma. ĩgūsā mérōgā wajakukerepuru, Marīpu gapu ĩgūsārē oārō koremi. ĩgūsārē: "Boaburo", ārībirikerepuru, neō sugugā yebague yuridija, boabemi. ³⁰ Marīpu āārīpereri mūsā āārīrikurire masīgū, mūsāya poarire: "Iriku

ããrã”, ãrĩ masĩpeokõãmi. ³¹ Irasirirã güibirikõãka! Mũsã, mirã nemorõ wajakũa. Irasirigũ Marĩpũ mirãrẽ korero nemorõ mũsãrẽ koregũkumi.

Jesús: “Masakare yũre bũremurĩrẽ wereka!”
ãrĩdea

(Lc 12.8-9)

³² 'Sugũ, masaka péuro: “Jesúyagũ ããrã”, ãrĩ weremakũ, yũde Yũpũ ãmũgasigue ããrĩgũ péuro ãgũrẽ: “Yaagũ ããrĩmi ã”, ãrĩ weregũra. ³³ Sugũ yũre masĩkeregũ, masaka péuro: “ãgũrẽ masĩbea”, ãrĩ weremakũ, yũde Yũpũ ãmũgasigue ããrĩgũ péuro: “Yũde ãgũrẽ masĩbea”, ãrĩ weregũra, ãrĩmi Jesús.

Jesús: “Masakare gãme dukawarirãkuma”, ãrĩ weredea

(Lc 12.51-53; 14.26-27)

³⁴ Irasũ ãrĩ odo, masakare ãsũ werenemomi:

—Mũsã yũre: “ãgũ i ãmũguere aarigũ, masakare siuñajãrĩ merã ããrĩmakũ irigũ aarimĩ”, ãrĩ gũñabirikõãka! Irasirigũ aarigũ meta iribũ. Yũ ejarita, masakare ãgũsã basi gãme dukawarimakũ yáa. Irasirirã surãyeri yũre bũremurãkuma. Gajerã yũre bũremumerã gapũ ãgũsãrẽ ãaturirãkuma. ³⁵ Sugũ yũre bũremurĩ waja, ãgũ magũ ãgũrẽ ãaturigũkumi. Sugo yũre bũremurĩ waja, igo magõ igore ãaturigokumo. Sugo mũñekõ yũre bũremurĩ waja, igo bepo igore ãaturigokumo. ³⁶ Irasirirã su wii marã ãgũsãyagũ yũre bũremumakũ ããrã, ãgũrẽ ãaturirãkuma.

³⁷ 'Sugũ yũre mãrõ nemorõ ãgũ pagũsãmarã gapũre mãitarinũgãgũ, yaagũ ããrĩmasĩbirikumi. Yũre mãrõ nemorõ ãgũ pũrã gapũre mãitarinũgãgũde, yaagũ ããrĩmasĩbirikumi. ³⁸ Sugũ yũre tũyadũari

waja curusague pábiatú wējēsūbu irirosū
 āārīkeregū, neō piriro marīrō yure tūyaníkōāburo.
 Yure tūyadūabi, yaagū āārīmasībirikumi. ³⁹ Sugū
 i ūmūgue īgū okarire maīgū, peamegue
 béosūgukumi. Gajigū yure tūyari waja gajerā
 īgūrē wējēkerepuru, Marīpu gapū īgūrē taugukumi,
 īgū pūroque īgū merā āārīburo, ārīgū.

Jesús marī ūmūgasigwe wajataburire weredeā
 (Mr 9.41)

⁴⁰ 'Sugū mūsarē yaarārē ōārō bokatīrīñeāgū,
 yūdere bokatīrīñeāmi. Yure bokatīrīñeāgū, yure
 iriudidere bokatīrīñeāgukumi. ⁴¹ Marīpu īgūya
 kerere weregūre ōārī wajatakū irīgukumi.
 Sugū Marīpūya kerere weregū āārīrīrē īāmasī,
 īgūrē ōārō bokatīrīñeāgū, īgū irirosū ōārī
 wajatakukumi. Sugū gajigū īgū ōāgū āārīrīrē īāmasī,
 īgūrē ōārō bokatīrīñeāgū, īgū irirosū īgūde ōārī
 wajatakukumi. ⁴² Sugū ubu āārīgū yure tūyagūre
 gajigū īgūrē iritamudūagū deko yūsari tīāmakū
 īāgū, Marīpu īgūdere ōārō irīgukumi, ārī weremi
 Jesús.

11

Juan masakare wāīyerimasū īgū buerire tūyarārē
Jesús pūro iriudeā
 (Lc 1.17; 7.18-35)

¹ Jesús gūare pe mojōma pere su gubu peru
 pērēbejarā īgū buerārē irasū ārādero pūru, Galilea
 nikūgue āārīrī makārī marārē buegorenagū
 waakōāmi.

2 Juan masakare wãiyerimasũ peresugue ããrĩyupũ. Irogue ããrĩgũ, Cristo iriri kerere pégu, ĩgũ buerire tũyarãrẽ Jesúre ãsũ ãrĩ sêrẽñarã waaka:

3 —“¿Mũta ããrĩrĩ, Cristo masakare taugũ aaribu iriayupũ, ĩgũsã ãrĩdi, o gajigure yúrākuri gũa?” ãrĩ sêrẽñarã waaka! ãrĩ iriuyupũ.

4 Irasirirã, Jesús pũrogue ejarã, Juan sêrẽñadoredeare ĩgũrẽ sêrẽñama. Jesús ĩgũsãrẽ yujami:

—Mũsã périre, mũsã ĩãrĩrẽ Juãrẽ wererã waaka! 5 Koye ĩãbiranerã õãrõ ĩãma. Waamasĩbiranerã waamasĩakõãma. Kãmi boanerã yaripereakõãsũama. Gãmipũ pébiranerã péakõãma. Boanerãde masãkõãma. Boporã, Marĩpũ masakare tauri kerere weremakũ péma. 6 “Yũre bũremurĩrẽ piribi, usũyari opagũkumi”, ãrĩ wererã waaka Juãrẽ! ãrĩmi Jesús.

7 ĩgũsã waadero pũrũ, Jesús Juãyamarẽ masakare ãsũ ãrĩ werenũgãmi:

—Mũsã masaka marĩrõgue Juãrẽ ĩãrã waarã, gũigure gũñaturabire ĩãrã waarã meta irikuyo. ĩgũ turabi, mirũ táborere wẽjẽpubéorosũ ããrĩbemi. 8 Irasũ ããrĩmakũ, mũsã ĩgũrẽ irogue ĩãrã waarã, õãrĩ surĩ sãñagũrẽ ĩãrã waarã meta irikuyo. Õãrĩ surĩ sãñarãno oparãya wiirigue ããrĩkuma. Juan ĩgũsã irirosũ ããrĩbemi. 9 Mũsã irogue ĩgũrẽ ĩãrã waarã, Marĩpũya kerere weredupuyurimasũrẽ ĩãrã waarã iriyo. Mũsãrẽ werea. Diayeta Juan Marĩpũya kerere weredupuyunerã nemorõ ããrĩmi. 10 Marĩpũya werenĩrĩ gojadea pũgue gojasũdero ããrĩbũ Juan iriburire. Irasirigũ Marĩpũ ĩgũ magũrẽ ãsũ ãrĩdi ããrĩmĩ:

Mu waaburo dupuyuro yaa kerere weredupuyurimasūrē iriugura mu waaburore amuyudoregu, arī gojasūdero āārībú.*

11 'Musārē diayeta werea. Juan aariburi dupuyuro neō sugu ĩgū nemorō yaamarē masīgū marīdi āārīmī. Irasū āārīkerepuu, sugu Marīpu umugasigie āārīgūyagu gapu Juan nemorō yaamarē masīgū āārīgukumi. Āārīpererā nemorō ubu āārīgū āārīkeregu, masīgū āārīgukumi.

12 'Juan masakare wāiyedi buenugādeapoegueta, daporaguedere masaka umugasigie Marīpu ĩgūyarārē dorerogue ñajaduarārē buro ñerō tarimakū yāma. ĩgūsā turari merā ĩgūsārē peremakū iriduarā iriadima.

13 Juan aariburo dupuyuro āārīpererā Marīpuya kerere weredupuyunerā ĩgūsā gojadea merā, Moisés gojadea merā Marīpu ĩgūyarārē doreri kerere werenerā āārīmá.

14 Iripoegue Marīpu ĩgūya gojadea pūgue: “Yaa kerere weredupuyurimasūrē Elías irirosū āārībure iriugura”, arīdi āārīmī. Juan irasū arīsūdita āārīmi. Irire baremurō gāamea.

15 Gānipūrī oparā, yu wererire oārō péka!

16 'Masaka datora marā, ¿ñeēmarāno irirosū āārīrī? Majīrā makā dekogue ĩgūsā merāmarā merā bira gainí doanīrā irirosū āārīma. Āsū arī gainíma: 17 “Guā tērēdiru purimakū, bayabirabu. Bujawereri merā guā bayamakū, orebirabu”, arīma. 18 Juan masakare wāiyerimasū pā baabiri, igui deko pāmudeare iirībirimi. ĩgū irasirimakū ĩārā: “Wātī ñajāsūdi āārīmi ĩ”, arību musā ĩgūrē. 19 Pūu

* 11:10 Mal 3.1

y_u ãārīpererã tīgū baa, iirímakū ĩārã: “Baapagu, iirípagu ãārīmi”, ārīb_u. “Romano marã opure niyeru wajaseabosarimasã merãm_u, ñerõ irirã merãm_u ãārīmi”, ārīb_u musã yure. Musã guare* b_uremubirikererã, guã iririre ĩārã: “Marĩpu ĩgūsãrẽ masĩrĩ sĩmi”, ārĩ masĩbokoa, ārĩmi Jesús.

Jesús makãrĩ marãrẽ ĩgūsã ĩgũrẽ b_uremubirire weredeã

(Lc 10.13-15)

²⁰ P_ur_u Jesús iroma makãrĩ marãrẽ turimi. ĩgūsã wãri ĩgũ Marĩpu turari merã iririre iri ĩmumakū ĩãkererã, ĩgūsã ñerõ iririre b_ujawerebiri, neõ piribirima. Irasirigu ĩgūsãrẽ ãsũ ārĩmi:

²¹ —Musã Corazín marã, Betsaida marãde ñerõ tarirãkoa. Iripoegue marã Tiro, Sidón marã, musã ĩũrõ Marĩpu ĩgũ turari merã iri ĩmurõsũ iri ĩmumakū ĩãrã, ĩgūsã ñerõ irideare piribonerã ãārĩmã. ĩgūsã ñerõ irideare b_uro b_ujawererire ĩmurã, b_ujawereri surí sãña, nitĩrẽ dipuru weka mawasiripeobonerã ãārĩmã. Musã gap_u Marĩpu turari merã y_u iri ĩmurĩrẽ ĩãkererã, musã ñerõ iririre neõ piribeã. ²² Irasirigu musãrẽ wereã. Marĩpu ãārīpererã ñerãrẽ ĩgũ wajamoãrĩn_u ejamakū, Tiro, Sidón marãrẽ wajamoãrõ nemorõ musãrẽ wajamoãg_ukumi. ²³ Musã Capernaum marãde: “Ūmugasigue murĩãrãkoa”, ārĩ gũñadãã. Iroguere neõ waabirikoa. Boanerã ãārĩrõgue bédijusũrãkoa. Sodoma marãrẽ y_u musãrẽ Marĩpu ĩgũ turari merã iri ĩmuderosũta iri ĩmumakū, iri makã daporadere ãārĩbokoa dapa. ²⁴ Irasirigu

* **11:19** Jesús: “guare”, irasũ ārĩgũ: “ĩgũ basi iririre, Juan irideare”, ārĩgũ irimi.

m̄sārē werea. Marĩpu ããrĩpererã ñerãrē ïgũ waja-
jamoãrĩn̄ ejamakũ, Sodoma marãrē wajamoãrõ
nemorõ m̄sã gap̄ure wajamoãgukumi, m̄sã ñerõ
iririre piribiri waja, ãrĩmi Jesús.

*Jesús: “Ȳu p̄urogue siuñajãrã aarika!” ãrĩdea
(Lc 10.21-22)*

²⁵ Iripoere Jesús ïgũ Pagure ãsũ ãrĩmi:

—Āu, ȳu m̄urē: “Õãtaria m̄u”, ãrĩ, us̄uyari s̄ia. M̄u
ãm̄gasi marã, i nikũ marã Op̄u ããrã. Irasirigu:
“Mas̄itarin̄gãrã, ããrĩpererire p̄emas̄ia”, ãrĩ gũñarãrē
m̄uyare mas̄imakũ iribea. Majĩrã irirosũ m̄urē
b̄uremurã gap̄ure m̄uyare mas̄imakũ yãa. ²⁶ Āu,
irasũta ããrã. M̄u gããmederosũta us̄uyari merã irasũ
yãa, ãrĩmi Jesús ïgũ Pagure.

²⁷ P̄uru masakare ãsũ ãrĩ werenemomi:

—Ȳupu ȳure ããrĩpereri irimas̄irĩrē s̄imi. Neõ
sugu masak̄u ȳu ããrĩrik̄urire mas̄ibemi. Ȳupu
dita ȳure mas̄imi. Neõ sugu masak̄u Ȳupu
ããrĩrik̄urire mas̄ibemi. Ȳu dita ïgũrē mas̄ia.
Ȳu ïgũrē mas̄idorerãde ïgũrē mas̄ima. ²⁸ M̄usã
Marĩp̄ure t̄uyaduarã nukũrĩ ùũma õẽrã irirosũ
ããrĩrã ȳu p̄uro aarika! Ȳu m̄sārē siuñajãrĩ s̄igura.
²⁹ M̄usã ȳu iridoreri gap̄ure irika! Ȳu iririk̄urire
mas̄ika! Ȳu m̄sārē bopoñarĩ merã ïã, iritamugũ
ããrã. Irasirirã ȳu iridorerire irirã, ȳu merã õãrõ
siuñajãrĩ bokarãkoa. ³⁰ Ȳu iritamurõ merã yaare
m̄sã irimakũ diasabea. Irasirirã ȳu dorerire irirã,
nuk̄ubiri kãrãw̄uririre ùũmarõsũ ããrĩrãkoa, ãrĩmi
Jesús.

gããmea”, ãrĩdi ããrĩmĩ. Musã irire pémasĩrã yu buerã ñerõ iribirikerepuru, ïgũsãrẽ: “Ñerõ yáma”, ãrĩbiribokoa. ⁸ Yu ããrĩpererã tĩgũ ããrĩsĩã, siuñajãrĩnũrẽ masaka gajino ïgũsã iriburire doremasĩã, ãrĩmi Jesús.

Jesús mojõ diíweredire taudea
(Mr 3.1-6; Lc 6.6-11)

⁹ Irasũ ãrĩ odo, waa, judío masaka nerẽrĩ wiigue ñajãmi. ¹⁰ Iro sugũ masakũ mojõ diíweredi ããrĩmĩ. Irasirirã fariseo bumarã Jesúre: “Ñerõ yámi”, ãrĩ weresãduarã, ïgũrẽ sërẽñama:

—¿Siuñajãrĩnũ ããrĩmakũ, sugũ pũrĩrikugure taudoreri ããrĩrĩ? ãrĩma.

¹¹ Jesús yujami ïgũsãrẽ:

—Siuñajãrĩnũ ããrĩkerekerepuru, musãyagu oveja gobegue meñajãmakũ ïãrã, ïgũrẽ ãi wiukõãkoa.

¹² Marĩpu sugũ masakure, oveja nemorõ maĩtarinũgãmi. Irasirirã siuñajãrĩnũrẽ masakare õãrõ irirã, Moisés doredeare tarinũgãrã meta yáa, ãrĩmi.

¹³ Irasũ ãrĩ odo, mojõ diíweredire ãrĩmi:

—Mũya mojõrẽ soeoka!

Ïgũya mojõrẽ soemakãta, gaji mojõ irirosũ õãrĩ mojõ dujabũ. ¹⁴ Ïgũ irasirimakũ ïãrã, fariseo bumarã gua wiria: “¿Nasirisĩã, marĩ Jesúre wějërãkuri?” ãrĩ gãme werenĩñurã.

Iripoeguemu Marĩpũya kerere weredupuyudi
Jesús ïgũ iriburire gojadea

¹⁵ Jesús ïgũsã ïgũrẽ wějẽduarire masĩ, waakõãmi. Ïgũ waamakũ, wárã masaka ïgũrẽ tũyama. Irasirigu ããrĩpererã pũrĩrikũrãrẽ taumi. ¹⁶ Ïgũsãrẽ

taugu: “Yaamarē gajerārē werebirikōāka!” ārīmi.
 17 Jesús irasirigu, Marīpuya kerere weredupuyudi
 Isaías gojaderosūta irimi. Āsū ārī gojadi āārīmi:

18 Āsū ārīmi Marīpu: “Ī yure moāboegu, yu beyedi,
 yu maīgū āārīmi. Īgū merā usuyāa. Ōāgū dey-
 omarīgūrē Īgūrē sīgura. Irasirigu yu turari
 merā āārīpererā masakare diayema iririre
 weregukumi.

19 Īgū guaseo, gainíbirikumi. Īgū makā dekogue
 buro gainígorenamakū neō pébirikuma.

20 Turamerārē bopoñarī merā iā, iritamugukumi.
 Irasirigu, Īgūsā miūmerēñu biu peaboadiñu
 irirosū āārīmakū Īāgū, peabéogu irirosū
 Īgūsārē iribirikumi.

Bujawererārē gūñaturamakū irigukumi. Irasirigu,
 Īgūsā sīāgodiru yaubodiru irirosū
 āārīmakū Īāgū, yaubéogu irirosū Īgūsārē
 iribirikumi. Īgū Opu ñajāburi dupuyuro
 Īgūsārē irasirigukumi. Īgū Opu ñajādero
 puu, masakare diayema iririre irimakū
 irigukumi.

21 Irasirirā āārīperero marā Īgū doreburire usuyari
 merā yūrākuma”, ārīmi, ārī gojadi āārīmi
 Isaías.✧

*Jesúre: “Wātī turari opami”, ārī werewuadea
 (Mr 3.19-30; Lc 11.14-23; 12.10)*

22 Pupu masaka wātī ñajāsūdire Jesúre taudorerā
 āijama. Īgū wātī ñajāsūdi: wereníbi, koye iābi āārīmi.

✧ 12:21 Is 42.1-4

Īgūsā āijamakū ĩā, Jesús ĩgūrē taumi. Īgū irasiri-makū, ōārō ĩā, wereními. ²³ Āārīpererā masaka, ĩgū tarimakū ĩāguka, āsū ārī gāme sērēñama:

—Ķī David parāmi āārīturiagu masakare taubu meta āārīkuri? ārīma.

²⁴ Īgūsā irasū ārīmakū pérā, fariseo bumarā gapu āsū ārīma:

—Ī wātēa opu Beelzebú turari merā wātēārē béowiumi, ārīma.

²⁵ Jesús ĩgūsā gūñarīrē masīsīā, ĩgūsārē āsū ārīmi:

—Su nikū marā ĩgūsā basi dukawari gāmekēārā, pereakōākuma. Su makā marā, o su wii marā ĩgūsā basi dukawari gāmekēārā, pereakōākuma.

²⁶ Irasūta wātēa opu ĩgūyarā wātēārē béowiugu, ĩgū basita ĩgūyarārē dukawari pereakōāmakū iribokumi. Irasirigu, Ķnoārē dorenemobokuri?

²⁷ Mūsā yure: “Wātēa opu Beelzebú turari merā wātēārē béowiumi”, ārī werewhāa. Mūsā buerire tūyarā gapu wātēārē béowiurā, Ķnoā turari merā béowiukuri? Mūsā ĩgūsārē: “Marīpu turari merā wātēārē béowiuma”, ārā. Irasiro mūsā yure werewhari diaye āārībea. ²⁸ Yh Ōāgū deyomarīgū turari merā wātēārē béowiua. Irasiro Marīpu ĩgūyarārē doreri mūsā pūroguere ejasiāa, ārī masīsūa.

²⁹ 'Irire keori merā mūsārē werenemogura. Neō sugu masakū, turaguya wiire ĩgūrē siaparoribirikeregu, ĩgū oparire ēmagū ñajāmasībirikumi. ĩgūrē siadero pūrugue merē ĩgūyare ēmamasīkumi, ārīmi†.

³⁰ Irasū ārī odo, āsū ārīnemomi:

† 12:29 Jesús: “Wātī nemorō turagu āārā”, ārīgū, irasū ārīmi.

—Yure gāāmemerā, yure iāturirā āārīma. Masakare yure siuu neeōtamumerā, īgūsārē waawasirimakū irirā āārīma.

³¹ Mūsārē diayeta werea. Marīpū āārīpereri masaka ñerō iririre, ñerō ārī werenírīdere kātimasīmi. Ōāgū deyomarīgūrē īgūsā ñerō ārī werenímakū tamerārē neō kātibirikumi. ³² Yū āārīpererā īgūrē īgūsā ñerō ārī werenímakū, Marīpū irire kātimasīmi. Ōāgū deyomarīgū gapure īgūsā ñerō ārī werenímakū, irire neō kātibirikumi. Dapora, i ūmū peredero pūpūguedere īgūsā irasū ārīdeare neō kātibirikumi, ārīmi Jesús.

*Yukure irigū dukā merā iāmasīsūa, ārī weredea
(Lc 6.43-45)*

³³ Irasū ārī odo, Jesús gaji keori merā buenemomi:

—Ōādi yukū ōārīrē dukakūa. Nedi yukū ñerīrē dukakūa. Yukure irigū dukā merā iāmasīsūa†. ³⁴ Mūsā āña irirosū ñerā āārā. Mūsā ñerā āārīsīā, ōārīrē werenímasībea. Marī gūñarōsūta marī werenírī wirikōāa. ³⁵ Ōāgū ōārī gūñarī opami. Irasirigū ōārīrē wereními. Nēgū ñerī gūñarī opami. Irasirigū ñerīrē wereními. ³⁶ Mūsārē werea. Marīpū āārīpererā ñerārē wajamoārīnū ejamakū, āārīpereri masaka noó gāāmerō werenímoāmadeare īgūsārē masīmakū irigukumi. ³⁷ Mūsā ōārō werenídea waja Marīpū mūsārē: “Waja opabema”, ārīgukumi. Mūsā ñerō werenídea waja mūsārē: “Waja opama”, ārīgukumi, ārīmi Jesús fariseo bumarārē.

† **12:33** Jesús: “Yukure irigū dukā merā iāmasīsūa”, ārīgū: “Marī, gajerā werenírīrē pérā, īgūsā āārīrikurire masīa”, ārīgū irimi.

*Masaka ñerã Jesúre Marĩpu turari merã iri
ĩmudoredea
(Mr 8.12; Lc 11.29-32)*

³⁸ Pũũ surãyeri fariseo bumarã, Moisés go-
jadeare buerimasã ãgũrẽ ãrĩma:

—Buegu, Marĩpu turari merã guare iri ĩmuka!
ãrĩma. “Ígũ irire irimasĩbi, Marĩpu iriudi meta
ããrĩmi”, ãrĩduarã irasũ ãrĩñurã.

³⁹ Jesús yũjumi:

—Mũsã dapora marã masaka ñerã, Marĩpũre
gããmemerã ããrã. Mũsã yũre Marĩpu turari merã
gajino iri ĩmudorea. Mũsã irasiridorekerepuũ,
Marĩpuya kerere weredupuyudi Jonás iridea
direta wereguũ. ⁴⁰ Jonás ureũ, ure ñami
waaí wãguya paru poekague ããrĩderosũta
yũde ããrĩpererã tígũ ureũ, ure ñami yeba
poekague ããrĩgũkoa. ⁴¹ Iripoegue Nínive
marã Jonás Marĩpuya kerere weremakũ pérã,
ĩgũsã ñerõ irideare bujawere, ĩgũsã guñarĩrẽ
gorawayunerã ããrĩmã. Dapora yũ Jonás nemorõ
masĩgũ õõgue mũsã merã ããrã. Yũ Marĩpuya
kerere werelerepuũ, mũsã ñerõ iririkũrire
bujawerebea. Irasirirã, Marĩpu ããrĩpererã
ñerãrẽ wajamoãrĩnu ejamakũ, Nínive marã mũsã
dapora marãrẽ: “Ñegorabu”, ãrĩrãkuma. ⁴² Marĩpu
ããrĩpererã ñerãrẽ wajamoãrĩnu ejamakũ, sugo
iripoeguemo Sabá nikũ marã opo mũsã dapora
marãrẽ: “Ñegorabu”, ãrĩgokumo. Yoaromogue
ããrĩkerego, õõgue i nikũgue aarideo ããrĩmó,
marĩ ñekũsãmarã opu Salomón wári masĩrĩ merã
wererire pégo aarigó. Dapora yũ Salomón nemorõ
masĩgũ õõgue mũsã merã ããrã. Yũ mũsã merã

ããrĩkerepurũ, musã gapũ yũ wererire péduabea, ãrĩmi Jesús.

Jesús, wãtĩ dupaturi masakũguere ñajãrĩmarẽ weredeã

(Lc 11.24-26)

⁴³ Irasũ ãrĩ odo, keori merã werenemomi doja:

—Wãtĩ masakũguere ããrãdi wiri, purũ deko marĩrõgue ãgũ siuñajãburore ãmagorenagũ waakumi.

⁴⁴ Irore bokabi, ãsũ ãrĩ gũñakumi: “Yũ wiridi, yaa wii irirosũ ããrĩmĩ. Dupaturi yũ wiridiguereta goeñajãgura doja”, ãrĩ gũñakumi. Irasirigũ ãgũguere dupaturi goeñajãgũ, gajino marĩrĩ wii, õãrõ ãmu, ooaweadea wiire irirosũ bokajakumi. ⁴⁵ Irasirigũ gajerã wãtẽã su mojõma pere gaji mojõ peru pẽrẽbejarã ãgũ nemorõ ñerãrẽ siiu, ãgũsã ããrĩpererã merã masakũguere ããrĩnikõãkumi. Irasirigũ masakũ ãgũ dupuyuro ããrĩrikũdero nemorõ ñerõ ããrĩkumi. Dapora marã Marĩpure gããmemerã, yure péduamerã irasũta ñerõ waarãkuma, ãrĩmi Jesús.

Jesús pago ãgũ pagupũrã merã ãgũrẽ ããgõ ejadeã
(Mr 3.31-35; Lc 8.19-21)

⁴⁶ Jesús masakare wereripoe ãgũ pago, ãgũ pagupũrã merã ãgũ ããrĩrĩ wii disipuro ejayupo ãgũ merã werenidũago. ⁴⁷ Sugũ igore ãã, Jesúre weremi:

—Mũpo, mũ pagupũrã disipuro níama, mũ merã werenidũarã, ãrĩmi.

⁴⁸ ãgũ irasũ ãrĩmakũ pégu, Jesús ãgũrẽ ãrĩmi:

—¿Noã ããrĩrĩ yũpo, yũ pagupũrã? ãrĩmi.

⁴⁹ Irasũ ãrĩgũ, gũare ãgũ buerãrẽ soepu, ãsũ ãrĩmi:

—Īsā, yuɸo, yuɸ paguɸūrā irirosū āārīma. ⁵⁰ Yuɸu ūmugasigie āārīgū gāāmerīrē irirāno, yuɸ paguɸu, yuɸ paguɸo, yuɸo irirosū āārīma, āārīmi Jesús.

13

Jesús oterimasū keori merā buedea

(Mr 4.1-9; Lc 8.4-8)

¹ Irinuta Jesús wiigie āārādi ditarugue waa, iri ditaru turo eja doami. ² Masaka wārā ĩgū puɸo nerēmakū ĩāgū, doódirugue mūrīñajāa, eja doami. Āārīpererā masaka ĩmparogue dujanugāma ĩgū buerire pémurā. ³ Irasirigu wāri keori merā ĩgūsārē āsū ārī buemi:

—Sugu oterimasū ĩgūya oteri yerire meéwasirigu waakumi. ⁴ ĩgū meéwasiriwāgāmakū, gaji yeri maague yurikoa. Iro yuriadea yerire mirā eja, baapeokōākuma. ⁵ Gaji yeri ūtāyerikurogue yurikoa. Iro sīmerērōgā nikū āārīmakū, iro yuriadea yeri mata puriadikoa. ⁶ Iri nikū sīmerērōgā āārīmakū, puriñajādi, puɸu abe asimakū, nugūrī marīsīā, ñāī, boakōākoa. ⁷ Gaji yeri pora watopegue yurikoa. Pora gapu puritarimūrīa, oteri gapure wējēkōākoa. ⁸ Gaji yeri ōārī nikūgue yurikoa. Iri yeri puri, ōārō dukakukoa. Suñu cien yeri, gajiñu sesenta yeri, gajiñu treinta yeri dukakukoa. ⁹ Musā gāmipūrī oparā, yuɸ wererire péduripīka! āārīmi Jesús.

Jesús buerā ĩgūrē: “¿Nasirigu keori merā bueri?”
ārī sērēñadea

(Mr 4.10-12; Lc 8.9-10)

¹⁰ Puɸu guā ĩgū buerā ĩgū puɸo waa, ĩgūrē sērēñabu:

—¿Nasirigu masakare keori merã bueri? ãrĩbu.

11 Jesús guare yujumi:

—Marĩpu ĩgũyarãrẽ doregu ããrĩrĩrẽ, iripoegue masĩbirideare musãrẽ masĩmakũ yãmi. Gajerã ĩgũrẽ burenumerã gapure irasiribemi. **12** ĩgũyare masĩrãnorẽ masĩnemomakũ irigukumi. Irasirirã wãro masĩrĩ oparãkuma. Gajerã ĩgũrẽ burenumerã ĩgũyare masĩmerãrẽ ĩgũsã mérõ masĩadideare pémasĩbirimakũ irigukumi. **13** Irasirigu yu ĩgũsãrẽ keori merã buea. ĩgũsã Marĩpu iririre ĩãkererã, ĩãmasĩbema. ĩgũyare pékererã, péduripíbema. Neõ pémasĩbema. **14** Irasirirã Marĩpuya kerere weredupuyudi Isaías gojaderosũta yãma. ãsũ ãrĩ gojadi ããrĩmĩ:

ãsũ ãrĩmi Marĩpu: “Yaare pékererã, musã neõ pémasĩbea. Yu iririre ĩãkererã, musã neõ ĩãmasĩbea.

15 Yaa werenĩrĩrẽ péduabirisĩã, musã neõ pémasĩbea. Gãnipũrĩ pémerã, koye ĩãmerã irirosũ ããrã. Musã irasũ ããrĩmerã, yaare ĩãmasĩ, õãrõ pémasĩbokoã. Yu pémasĩrĩ sĩrĩrẽ oparã yure buremubokoã. Irasirigu musãrẽ taubokoã”, ãrĩmi Marĩpu, ãrĩ gojadi ããrĩmĩ Isaías.*

16 Gũã gapure ãrĩmi:

—Musã gapu pémasĩã. Irasirirã usuyãã. Yu iririre ĩãrã, yu wererire pérã, yure buremua. **17** Diayeta musãrẽ werea. Wãrã iripoegue marã Marĩpuya kerere weredupuyunerã, gajerã Marĩpуре buremunerã musã dapora ĩãrĩrẽ buro ĩãduanerã ããrãdima. Irire ĩãduakererã, irire ĩãbirinerã ããrĩmã.

* **13:15** Is 6.9-10

Musã dapora périre buro péduakererã, pébirinerã ããrĩmá.

Jesús oterimasũ keori merã ãgũ bueadeare: “Ãsũ ãrĩduaro yáa”, ãrĩ weredeá

(Mr 4.13-20; Lc 8.11-15)

18 'Irasirirã õãrõ péka! Yũ oterimasũ keori merã bueadeare musãrẽ weregura. Iri ãsũ ãrĩduaro yáa. Marĩpũ ãmũgasigue ããrĩgũ ãgũyarãrẽ doreri kere, oteri yeri irirosũ ããrã. 19 Surãyeri masaka iri kerere pékererã, pémasĩbema. Maa buriri maa irirosũ ããrĩma. Iri kerere péadero pũũ, oteri yeri iri maague yuridea yerire mirã baapeoderosũ, wãtĩ aari, ãgũsã péadideare ãmãpeokõãmi. 20-21 Gajerã masaka ãtãyerikũri yeba irirosũ ããrĩma. Iri kerere pérã, mata usũyari merã: “Õãgorãa”, ãrĩ gũñama. Irire pékererã, oteri yeri ãtãyerikũrogue yuriadero pũũ, puri, nugũrĩ puriñajãbiriderosũ waama. Mérõgã pũũ ãgũsã Marĩpũyare péduari waja gajerã ãgũsãrẽ ñerõ irimakũ ããrã, o ñerõ tarisĩã, mata ãgũyare pirikõãma. 22 Gajerã masaka porakũri yeba irirosũ ããrĩma. Iri kerere pékererã, oteri yeri porakũrogue yuriadero pũũ, pora gapũ puritarimũrĩa wẽjẽderosũ, i ãmũmarẽ buro gũñarikũma. Doebiridere buro gããmenemoma. Irasirirã Marĩpũyare kãtima. Otediũu ãka marĩdiũu irirosũ ããrã. 23 Gajerã masaka õãrĩ nikũ irirosũ ããrĩma. Marĩpũya kerere pérã, õãrõ pémasĩma. Irasirirã oteri yeri õãrĩ nikũgue yuriadero pũũ, puri õãrõ ãkakũderosũ õãrĩrẽ yãma. Surãyeri cien yeri, gajerã sesenta yeri,

gajerã treinta yeri dukakurosũ irirã ããrĩma, ãrĩmi Jesús.

Jesús trigo otedea watopegue ñerĩ tá oteri keori merã buedea

²⁴ Jesús irasũ ãrĩ odo, gaji keori merã guare buemi:

—Marĩpũ ãmũgasigue ããrĩgũ ãgũyarãrẽ doreri i irirosũ ããrã. Sugũ pooe opũ ãgũya poeegue õãrĩ yerire otekumi. ²⁵ Su ñami merã ããrĩpererã kãrĩripoe ãgũrẽ ããturigu poeegue eja, ãgũ trigo otedea watopegue ñerĩ táre otekumi. Ote odo, waakõãkumi. ²⁶ Trigo yeri puriwiriadero purũ, ñerĩ táde purikoa. Purũ trigo dukakukoa. Iri dukakumakũ ããrã, iri pooe opũre moãboerimasã ñerĩ tá ããrĩmakũ ããmasĩkuma.

²⁷ Irasirirã iri pooe opũre wererã waakuma:

—Gua opũ, ¿nasiro õãrĩ yeri direta mũa poeere otesũdero ããrĩkerepurũ, ñerĩ táde puriyuri? ãrĩkuma.

²⁸ ãgũsã irasũ ãrĩmakũ pégũ, ãsũ ãrĩkumi:

—Yure ããturigu iri ñerĩ táre otekumi, ãrĩkumi.

ãgũ irasũ ãrĩmakũ pérã, ãgũrẽ moãboerimasã sãrẽñakuma doja:

—¿Ñerĩ táre gua taáseabéorã waamakũ gããmekuri mũa? ãrĩkuma.

²⁹ —Taáseabirikõãka! Ñerĩ táre taásearã trigodere duuabokoa. ³⁰ Iri, ñerĩ tá merãta puri masãkõãburo. Trigo ñãĩmakũ, gajerã duka seaboerimasãrẽ ãsũ ãrĩ iriugũra:

“Ñerĩ táre taáseapũrori, dupa dotori siaka, irire soemurã! Purũ trigore seaka, irire yũ duripĩri wiigue duripĩmurã!” ãrĩgũra, ãrĩkumi, ãrĩmi Jesús.

Jesús mostaza wãikuri yegã puri masãdea keori merã buedea

(Mr 4.30-32; Lc 13.18-19)

³¹ Irasũ ãrĩ odo, gaji keori merã buemi:

—Marĩpũ ãmũgasigue ããrĩgũ ãgũyarãrẽ doreri sugũ masakũ ãgũya pooegue suye oteriyẽ mostaza wãikuri yegãrẽ oterosũ ããrã. ³² Iri oteri yegã ããrĩpereri oteri yeri nemorõ mérĩ yegã ããrĩkoa. Irasũ ããrĩkerero, otemakũ, pũrũ yukũ wádi irirosũ puri masãkoa. Irasirirã wárã irigũ dupũrigue ãgũsãya surĩ suakuma, ãrĩmi Jesús*.

Jesús pã wemasãrĩ morẽrĩ poga keori merã buedea

(Lc 13.20-21)

³³ Pũrũ gaji keori merã buemi:

—Marĩpũ ãmũgasigue ããrĩgũ ãgũyarãrẽ doreri i irirosũ ããrã. Sugo nomeõ pã duparure iribo, mérõgã pã wemasãmakũ iriri poga merã trigo pogare morẽkumo. Irire wemasãseyaburo, ãrĩgõ, irasirikumo. Irasiriro Marĩpũ ãgũyarãrẽ doreri iri pã wemasãrĩ morẽrĩ poga irirosũ ããrã, ãrĩmi†.

* **13:32** Jesús i kere merã buegu: “Marĩpũ ãmũgasigue ããrĩgũrẽ bũremurã mérãgã ããrĩnũgãkerepũrũ, pũrũgue gajerã ãgũsã merã ãgũrẽ bũremunũgãmakũ, wárã ããrĩrãkuma; o sugũ Marĩpũre bũremunũgãgũ, mérõgã bũremurĩ opami. Pũrũgue, mostaza wãikuri yegãrẽ otedero pũrũ yukũ wádi puri, masãrõsũ Marĩpũ iritamurĩ merã wáro ãgũrẽ bũremurĩ opagũkumi”, ãrĩ buegu irimi. † **13:33** Jesús i kere merã buegu: “Marĩpũre bũremurã ããrĩperero i ãmũguere ãgũyarãrẽ doregũ ããrĩrĩrẽ masakare buerã waamakũ, ããrĩpereri buri marã watopegue wárã irire pé, ãgũrẽ bũremunũgãrãkuma; o sugũ Marĩpũre bũremunũgãgũ Marĩpũ ãgũyarãrẽ doregũ ããrĩrĩrẽ buenígũ, Marĩpũ iritamurĩ merã Marĩpũ doreri direta iridũagũkumi”, ãrĩ buegu irimi.

*Jesús masakare keori merã buenadea**(Mr 4.33-34)*

³⁴ Jesús masakare i ããrĩpereri buerire weregũ, keori merã dita buenami. Keori marĩrõ ãgũsãrẽ buenabirimi. ³⁵ Irasirigũ Marĩpũya kerere weredupuyudi gojaderosũta irimi. Æsũ ãrĩ gojadi ããrĩmĩ Jesús masakare wereburimarẽ:

Keori merã weregũkoa. Iri merã weregũ, Marĩpũ i ãmũrẽ iridero pũrugue marã neõ masĩbirideare dapora marãrẽ weregũra, ãrĩ gojadi ããrĩmĩ.✧

Jesús ñerĩ tá, trigo otedea watopegue puri masãdeare buenodea

³⁶ Pũrũ Jesús masakare seretu odo, wiigue ñajãmi. Ægũ ñajãmakũ ãã, gũa ãgũ buerã ãgũ pũrogue ñajãa, ãgũrẽ sãrẽñabu:

—Trigo otedea watopegue ñerĩ tá puri masãdea keorire werenemoka! ¿Naásũ ãrĩdũaro iriari? ãrĩbũ.

³⁷ Gũa irasũ ãrĩmakũ pãgũ, Jesús yũjũmi:

—Yũ ããrĩpererã tĩgũ, iri pooe opũ õãrĩ yeri otedi irirosũ ããrã. ³⁸ Poee gapũ i ãmũ irirosũ ããrã. Marĩpũ ãgũyarãrẽ dorerogue ããrĩmurã gapũ õãrĩ yeri irirosũ ããrĩma. Wãtĩyarã ñerĩ tá irirosũ ããrĩma.

³⁹ Wãtĩ poee opũre ããturigũ irirosũ ããrĩmi. I ãmũ pererĩnũ iri otedea dukare searinũ irirosũ ããrã. Marĩpũre wereboerã, poee opũre duka seaboerimasã irirosũ ããrĩma.

⁴⁰ 'Iri ñerĩ táre ãgũsã taãseadeare peamegue soebóaderosũta i ãmũ pererĩnũ ejamakũ waarokoa. ⁴¹ Irasũ waaripoe yũ ããrĩpererã tĩgũ,

✧ 13:35 Sal 78.2

yure wereboerārē iriugukoa. Irasirirā ĩgūsā masakare ñerĩ irimakū irirārē, Marĩpũ dorerire tarinũgārādere neeōrākuma. ⁴² Neeō odo, perebiri peamegue ĩgūsārē beorākuma. Iroque bũro pũrĩsũrā ĩgūsāya guikare kũrĩduútú orerākuma. ⁴³ Marĩpũ gāāmerĩrē irirā gapũ ũmũgasigue ĩgũyarārē dorerogue āārĩrā, abe ũmũmũ irirosũ gosewasirirākuma. Mũsā gāmpĩrĩ oparā, yũ wererire pėduripĩka!

Jesús wáro niyeru yáapídea keori merā buedea

⁴⁴ 'Gaji mũsārē werea. Marĩpũ ũmũgasigue āārĩgũ ĩgũyarārē doreri i irirosũ āārā. Sugũ masakũ wáro niyeru gajigũya nikũ poekague yáapídeare bokakumi. Irire bokagũ, bũro mũsũyakumi. Irasirigũ ĩgũ bokadeare bũro gāāmesĩā, dupaturi yáapĩkōākumi doja. Irasirigũ āārĩpereri ĩgũyare gajerārē duakumi. ĩgũ duadea waja merā iri nikũrē wajarikumi†.

Jesús perla wāĩkũriye keori merā buedea

⁴⁵ 'Gaji mũsārē werea doja. Marĩpũ ũmũgasigue āārĩgũ ĩgũyarārē doreri i irirosũ āārā. Sugũ wajarimasũ wajapari yeri perla wāĩkũri yerire āma wajaridũakumi. ⁴⁶ Iri yerire āmagũ, wajapatariri yere bokakumi. Iri yere bũro gāāmesĩā, āārĩpereri ĩgũyare duakumi. ĩgũ duadea waja merā iri yere wajarikumi.

Jesús buidi keori merā buedea

† **13:44** Jesús i kere merā buegũ: “Masakũ āārĩpereri ĩgũyare gāāmerō nemorō Marĩpũyare gāāmegũ āārĩkumi”, ārĩ buegũ irimi.

⁴⁷ 'Gaji musārē werea doja. Marĩpu ãmugasigue ãārĩgú ĩgũyarārē doreri, waaĩ wějērĩmasā buidi meeyo, ãārĩpererā waaĩ ãārĩrākũ ñeārō irirosũ ãārā. ⁴⁸ ĩgũsāya buidire waaĩ uturimakũ ĩārā, waaĩ wějērĩmasā ĩmparogue tũāmajā, waairé beyekuma. Ōārā waairé ĩgũsāya puuirigue seasākuma. Ñerārē béokōākuma. ⁴⁹ ĩũmũ pererĩnũ ãārĩmakũ, masakare ãsũta waarokoa. Marĩpure wereboerā ōārārē, ñerārē beyerā aarirākuma. ⁵⁰ Beye odo, ñerārē peregibi peamegue béorākuma. Irogue burō pũrĩsũrā ĩgũsāya guikare kũrĩduútú orerākuma, ãrĩmi Jesús.

Jesús iripoeguema buerire, maama bueridere weredea

⁵¹ Pũrũ guare sērēñami:

—¿I ãārĩpererire pémasĩrĩ musā? ãrĩmi.

—Éũ, pémasĩa, ãrĩ yũjubũ.

⁵² Gua irasũ ãrĩmakũ, ãrĩmi:

—Sugũ Moisés gojadeare buerimasũ Marĩpu ãmugasigue ãārĩgú ĩgũyarārē doregũ ãārĩrĩmarē masĩgũ, wii opũ irirosũ ãārĩgũkumi. Irasirigũ wii opũ, iripoegue ĩgũ opadeare, maama ĩgũ oparid-ere ãĩwiugũ irirosũ, maama buerire, iripoeguema bueridere ōārō masĩrĩ merā weregũkumi, ãrĩmi Jesús guare.

Jesús Nazaregue goedujáadea
(Mr 6.1-6; Lc 4.16-30)

⁵³ Jesús iri keori merā were odo, iro ãārādi waa,
⁵⁴ ĩgũ masādea makāgue ejami. Irogue eja, judío masaka nerērĩ wiigue buemi. Masaka, ĩgũ buemakũ pérā, pégũkakōāma. Ąsũ ãrĩ gāme werenĩma:

—¿Noógue bueyuri, ñi iropã masĩbu? ¿Nasirisĩã, iri ñmurĩrẽ irimasĩyuri? ⁵⁵ Ñi taboa moãdi magũ ããrĩmi. Ñgũ pago María wãĩkamo. Santiago, José, Simón, Judas Ñgũ pagupũrã ããrĩma. ⁵⁶ Ñgũ pagupũrã nomede i makã marãta ããrĩma. Ñgũ marĩ irirosũ ããrĩkeregũ, ¿nasirisĩã, i ããrĩpererire masĩrĩ? ãrĩma.

⁵⁷ Irasirirã Ñgũrẽ bũremudũabirima. Jesús gapũ Ñgũsãrẽ ãrĩmi:

—Ããrĩpererogue sugũ Marĩpũya kerere weredupuyugũre gajerã bũremuma. Ñgũya nikũ marã, Ñgũya wii marã gapũ Ñgũrẽ bũremubema, ãrĩmi.

⁵⁸ Irasirigũ Jesús, Ñgũsã Ñgũrẽ bũremubirimakũ ñãgũ, iri makãrẽ wãri Marĩpũ turari merã iri ñmubirimi.

14

Juan masakare wãiyerimasũ boadea (Mr 6.14-29; Lc 9.7-9)

¹ Iripore Herodes Galilea nikũ marã opũ, Jesús iriri kerere pãyupũ. ² Irire pégũ, Ñgũrẽ moãboerãrẽ ãsũ ãrĩyupũ:

—Ñgũ irire irasũ irigũ, Juan masakare wãiyerimasũta boadigue masãdi ããrĩkumi. Irasirigũ wãri iri ñmurĩrẽ irikumi, ãrĩyupũ.

³ Juan boaburi dupuyuro Herodes Ñgũ pagũmũ Felipe marãpo Herodías wãĩkũgore ãma, marãpokũmakũ ñãgũ, ⁴ ãsũ ãrĩdi ããrĩmĩ:

—Mũ pagũmũ marãpore marãpokũgũ, Marĩpũ dorerire tarinũgãgũ yãa, ãrĩdi ããrĩmĩ. Irasirigũ Herodes Ñgũrẽ ñeã, peresu iridi ããrĩmĩ. ⁵ Ñgũ Juãrẽ wẽjẽdũadi ããrĩmĩ. Judío masaka gapũ: “Ñi Juan

Marĩp̄ya kerere weredupuyurimasũ ããrĩmi”, ãrĩ gũñanerã ããrĩmá. Irasirigũ Herodes: “Juãrẽ yũ wẽjẽmakũ yũ merã guabokuma”, ãrĩgũ, ãgũsãrẽ gũidi ããrĩmĩ. ⁶ Pũrũ Herodes ãgũ deyoadea bosenu irigũ iridi ããrĩmĩ. ãgũ irasiririnũrẽ Herodías magõ ãgũ siuanerã ãũrõ baya ãmudeo ããrĩmó. Igo baya ãmumakũ ããgũ, Herodes bũro usuyadi ããrĩmĩ. Irasirigũ igore: ⁷ “Ãrĩgatoro marĩrõ, mũ yũre sãrẽrĩnorẽ sĩgura”, ãrĩdi ããrĩmĩ. ⁸ ãgũ irasũ ãrĩmakũ pãgo, igo pagore: “¿Ñeãnorẽ sãrẽgokuri yũ?” ãrĩdeo ããrĩmó. Irasirigo igo pago sãrẽdoreaderosũta ãgũrẽ sãrẽdeo ããrĩmó:

—Juan masakare wãiyerimasũya dipurure dititá, soropa wãripa merã ãgũya dipurure yũre sĩka! ãrĩdeo ããrĩmó.

⁹ Igo irasũ ãrĩmakũ pãgu, Herodes bũro bujaweredi ããrĩmĩ. ãgũ siuanerã pãuro: “Ãrĩgatoro marĩrõ, mũ yũre sãrẽrĩnorẽ sĩgura”, ãrãdi ããrĩsĩã, gũyasĩrĩgũ, igore: “Mũrẽ sĩbirikoa”, ãrĩmasĩbiridi ããrĩmĩ. Irasirigũ, igo ãgũrẽ sãrẽrõsũta iridi ããrĩmĩ.

¹⁰ Irasirigũ, ãgũyagũ surara Juan peresugue ããrĩgũ pũro waa, ãgũya dipurure dititádi ããrĩmĩ. ¹¹ Pũrũ soropa merã ãgũya dipurure ãrĩ, Herodías magõrẽ wiadi ããrĩmĩ. ãgũ wiamakũ ããã, igo pagore ããã sãdeo ããrĩmó.

¹² Juan boadero pũrũ, ãgũ buerire tũyanerã ãgũya dupure ããwãgã, yãarã waanerã ããrĩmá. Yãa odo, Juan boadeare Jesũre wererã ejama.

Jesús cinco mil ãmarẽ baari ejodea

(Mr 6.30-44; Lc 9.10-17; Jn 6.1-14)

¹³ Juãrẽ wẽjẽadea kerere pãgu, Jesús doódirugue mũrĩñajãa, masaka marĩrõgue gũã ãgũ buerã merã

waakõãmi. Ìgũ irogue waaríre pérã, masaka ìgũsãya makãrîrê wiri, ìgũ dupuyuro maague waa, ejasianerã ããrîmá. ¹⁴ Gũa ditaru gaji koepugue taribujaja, Jesús doódirugue sãñadi majãnũgã, wárã masakare bokajami. Irasirigũ ìgũsãrê bopoñarî merã ìã, pũrîrikurã ìgũsã ãñrianerãrê taumi. ¹⁵ Nañmejãwãgãripoe gũa Jesús buerã ìgũ puru waa, ãsũ ãrîbũ ìgũrê:

—Nañmejãrõgue yáa. Õõ masaka marîrõgue ããrã. Irasirigũ masakare waadoreka! Makãrîgue ìgũsã baaburire wajarirã waaburo, ãrãdibũ.

¹⁶ Gũa irasũ ãrîmakũ pégu, Jesús ãrîmi:

—Waabirikõãburo. Mũsã ìgũsãrê baari sîka! ãrîmi.

¹⁷ Gũa ìgũrê ãrîbũ:

—Su mojõma pã duparu, waaídere pãrãta opáa, ãrîbũ.

¹⁸ —Irire yãre ãñrika! ãrîmi Jesús.

¹⁹ Puru masakare tá weka doadoremi. Irasirigũ su mojõma pã duparure, pãrã waairé ãñ, ãmũgasigue ìãmu, Marîpũre: “Mũrê mũyari sã”, ãrîmi. Árî odo, iri pã duparure pea, gũare ìgũ buerãrê sîmi masakare gueredoregũ. Irasirirã gũa ìgũsãrê irire guerebũ. ²⁰ Irasirirã ããrîpererã baayapiakõãma. Puru ìgũsã baadũáadeare pe mojõma pere su gubu peru pãrêbejari puuirigora seasã, mũudobobũ. ²¹ Iro baanerã: nome, majrã keoña márîrõ ãma direta keomakũ cinco mil gora ããrîmá.

*Jesús deko weka waadea
(Mr 6.45-52; Jn 6.16-21)*

22 Pꝛꝛꝛ Jesús gꝛa ĩgũ buerãrẽ doódirugue mꝛĩñajãdore, ditarugue ĩgũ dupuyuro taribujadoremi. ĩgũ gapꝛ irogue dujami dapa masakare seretubu. 23 Seretu odo, buúru wekague sugꝛta waayupꝛ Marĩpꝛe sērẽgũ waagú. Nami ejaripoe sugꝛta ããrĩyupꝛ iroguere. 24 Gꝛa gapꝛ ditaru dekogue ããrĩbú. Mirũ bꝛo waabꝛ. Irasiro makũrĩ doódirure pátúpaukõãbꝛ. Irasirirã taribujabiribꝛ dapa.

25 Pꝛꝛꝛ ãgãbo wereripoe Jesús ditarugue buaja, gꝛa pꝛogue deko weka aarimí. 26 ĩgũ deko weka aarimakũ, gꝛa ĩgũrẽ ĩãmasĩbirisĩã, ĩãgukakõãbꝛ. Gũiri merã: “Masakꝛ boadi wãtĩ ããrĩmi”, ãrĩ gainíbꝛ.

27 Gꝛa gũimakũ ĩãgũ, Jesús gꝛare ãsũ ãrĩmi:

—Gũñaturaka! Yũta ããrã. Gũimerãta! ãrĩmi.

28 ĩgũ irasũ ãrĩmakũ pégꝛ, Pedro ãrĩmi ĩgũrẽ:

—Mꝛ, yꝛ Opꝛ ããrĩgũ, yꝛe deko weka waa, mꝛ pꝛogue aaridoreka! ãrĩmi.

29 —Jáꝛ, aarika! ãrĩmi Jesús.

Irasũ ãrĩmakũ pégꝛ, Pedro doódirugue sãñadi du-jinũgã, deko weka Jesús pꝛogue waami.

30 ĩgũ irasũ waakeregꝛ, mirũ bꝛo wẽjẽpumakũ ĩãgũ, gũigorami. Irasirigꝛ mirĩdijagꝛ:

—Yꝛ Opꝛ, yꝛe tauka! ãrĩ gainími.

31 ĩgũ irasũ ãrĩmakũta, Jesús ĩgũya mojõrẽ ñeã: “Yꝛe mérõgã bꝛemurĩ opáa. ¿Nasirigꝛ yꝛe bꝛemuturaberi?” ãrĩmi.

32 Pꝛꝛꝛ Jesús Pedro merã doódirugue aari, mꝛĩñajãmakũ, mirũ waadea toeakõãbꝛ. 33 Irasũ waamakũ ĩãrã, gꝛa doódirugue ããrĩrã ñadukupuri merã Jesús pꝛo eja doa, ĩgũrẽ:

—M_u diayeta Marĩp_u magũ ããrã, ãrĩ b_uremub_u.

Jesús Genesaret marãrẽ pũrĩrik_urãrẽ taudea
(Mr 6.53-56)

³⁴ P_ur_u taribujaja, Genesaret* wãik_uri nikũgue ejab_u. ³⁵ Iro marã Jesúre iãmasĩsĩã, ããrĩpererã iro ããrĩrãrẽ ãgũ ejari kerere wereñurã. Irasirirã ããrĩpererã pũrĩrik_urãrẽ taudorerã ãgũ p_uroque ãijama. ãgũrẽ ãsũ ãrĩ sãrẽma:

³⁶ —M_uya surĩro yuwa direta ãgũsãrẽ moãñadoreka! ãrĩma. Irasirirã ããrĩpererã pũrĩrik_urã ãgũya surĩrore moãñanerã ãgũsã sĩrĩrĩ opadeare tarisũma.

15

Masakare ñerã waamakã iririre buedea
(Mr 7.1-23)

¹ P_ur_u surãyeri fariseo bumarã, Moisés gojadeare buerimasãde Jerusalẽgue ããrãnerã Jesús p_uro eja, ãgũrẽ sãrẽñama:

² —¿Nasirirã m_u buerã, marĩ ñekũsãmarã iriunaderosũ iriberi? Marĩ ñekũsãmarã baaburi dupuyuro mojõkoederosũ iribema, ãrĩma.

³ Jesús ãgũsãrẽ y_uj_umi:

—Y_ude musãrẽ sãrẽñag_ura. ¿Nasirirã Marĩp_u doreri gap_ure iririono irirã, musã ñekũsãmarã iriunadeare yãri? ⁴ Marĩp_u ãsũ ãrĩdi ããrĩmĩ: “M_up_ure, m_up_ure b_uremuka! Sug_u ãgũ pagusãmarãrẽ ñerõ werenĩgũ wẽjẽdoresũg_ukumi”, ãrĩdi ããrĩmĩ. ⁵ ãgũ irasũ ãrĩkerep_ur_u, musã gap_u masakare ãgũsã pagusãmarãya ããrĩburire buerã,

* **14:34** Genesaret wãik_uri nikũ, Galilea wãik_uri ditaru tãro ããrĩyuro.

āsũ ārã: “Sugũ ĩgũ pagure, o ĩgũ pagore: ‘Yũ mũsãrẽ sĩboadeare Marĩpũre sĩpeokõãbũ. Irasirigũ mũsãrẽ iritamumasĩbirikoa’, ārĩmakũ õãgorãa”, ārĩ buea.

⁶ Irasũ buerã, masakare ĩgũsã pagusãmarãrẽ iritamubirimakũ, Marĩpũ dorerire ubu ĩãbéomakũ yãa, mũsã ñekũsãmarã iriunadeare irituyadorerã.

⁷ Masaka ĩũrõ dita õãrõ yãa mũsã. ĩgũsã ĩãberogue ñerõ iririkurã aãrã. Iripoegue Marĩpũya kerere weredupuyudi Isaías diayeta gojadi aãrĩmĩ mũsã irigatorire gojagũ. Āsũ ārĩ gojadi aãrĩmĩ:

⁸ ĩĩsã masaka ĩgũsãya disi merã yũre õãrõ werenikererã, ĩgũsãya yũjupũrãrĩgue yũre neõ bũremubema.

⁹ Irasiriro ĩgũsã yũre bũremurã nerẽrĩ wajamãa. ĩgũsã bueri, yũ doreri meta aãrã. Masaka doreri aãrã, ārĩ gojadi aãrĩmĩ, ārĩ yũjumi Jesús fariseo bumarãrẽ.✠

¹⁰ Irasũ ārĩ odo, masakare ĩgũ pũro siiu, āsũ ārĩmĩ:

—Yũ wererire õãrõ pékũĩnú péka! ¹¹ Sugũ masakũya disigue baari ñajãri, ĩgũrẽ ñegũ waa-makũ iribea. ĩgũya disigue wiriri gapũ, ĩgũrẽ ñegũ waamakũ yãa, ārĩmĩ.

¹² ĩgũ irasũ ārãdero pũrũ, gũa ĩgũ buerã ĩgũ pũro waa, ĩgũrẽ ārĩbũ:

—¿Mũ masĩrĩ? Mũ irasũ ārãdeare pérã, fariseo bumarã guakõãma, ārĩbũ.

¹³ Gũa irasũ ārĩmakũ, Jesús āsũ ārĩ yũjumi:

—Yũpũ ãmũgasigue aãrĩgũ aãrĩpereri ĩgũ otebiri-deare nugũrĩ merãta duua béogũ irirosũ ĩgũsãrẽ béogũkumi. ¹⁴ Irasirirã ĩgũsãrẽ irasũ ĩãkõãka!

✠ 15:9 Is 29.13

Īgūsā Marīpuyare masībirikererā, gajerā Īgūyare masīmerārē buema. Irasirirā koye ĩāmerā gajerā koye ĩāmerārē tūādupuyurā irirosū āārīma. Sugū koye ĩābi gajigū koye ĩābire tūādupuyuwāgāgū, Īgūsā pērāgueta gobegue meēñajākōārākuma, ārīmi Jesús.

¹⁵ Īgū irasū ārīmakū pégu, Pedro gapū Jesúre ārīmi:
—Gware wereka! Masaku Īgūya disi wiriri keori, ¿naásū ārīduaro yári? ārīmi.

¹⁶ Jesús yujumi:

—¿Musāde pémasīberi dapa? ¹⁷ Āārīpereri marī baari, marīya disigue ñajāa, parugue waa, purū tariwereakōāa. ¹⁸ Masaka werenírī, Īgūsāya disi wiriri āārā. Īgūsā gūñarīgue ñerīrē oparā ñerō wereníma. Iri Īgūsārē ñerā waamakū yāa. ¹⁹ Īgūsā gūñarīgue ñerī oparā āsū āārīma. Ñerī gūñarā, masakare wējēbéorā, gajigū marāpo, gajego marāpū merā ñerō irirā, ūma nome merā, nome ūma merā ñerō gāmebirarā, yajarā, ārīgatorā, masakare ñerō kere wererā āārīma. ²⁰ Iri ñerī Īgūsā gūñarīgue opari, Īgūsārē ñerā waamakū yāa. Masaka Īgūsā ñekūsāmarā iriunaderosū baaburi dupuyuro mojōkoebirimakū, Īgūsārē ñerā waamakū iribeā, ārīmi Jesús.

*Judío masako āārībeo Jesúre bwaremudea
(Mr 7.24-30)*

²¹ Purū Jesús Tiro, Sidón wāikuri makārī āārīrōgue waami. ²² Iroque ejamakū, sugo nomeō Canaán nikūmo iroque āārīgō Jesús purō gainíjamo:

—Yū Opū, David parāmi āārīturiagu yure bopoñaka! Yū magō wātī ñajāsūdeo burō ñerō tarigo yāmo, ārīmo.

23 Igo irasũ ãrĩmakũ pékeregũ, Jesús igore yũjubirimi. Irasirirã gũã ãgũ buerã ãgũrẽ ãrĩbũ:

—Waadoreka igore! Marĩrẽ ñerõ gainí tũyawãgãrimo, ãrĩbũ.

24 Gũã irasũ ãrĩmakũ pégu, Jesús igore ãrĩmi:

—Yũpũ yũre, Israel bumarã oveja dedirinerã irirosũ ããrĩrã direta iritamudoregũ iriumi, ãrĩmi.

25 Igo Israel bumo ããrĩbirikerego, Jesús guburi pũro ñadũkũpuri merã ejamejã, ãsũ ãrĩmo:

—Yũ Opũ, yũre iritamuka! ãrĩmo.

26 Jesús igore yũjumi:

—Wii opũ ãgũ pũrã baarire ěma, diayéare ejo-makũ õãbea, ãrĩmi.

27 ãgũ irasũ ãrĩkerepũrũ, ãgũ gapũ ãgũrẽ ãrĩmo doja:

—Yũ Opũ, irasũ ããrĩkerepũrũ, diayéa gapũ wii marã baawasiridijurire baaboema, ãrĩmo.

28 Igo irasũ ãrĩmakũ, Jesús igore yũjumi:

—Mũ yũre bũremurĩ opataria. Mũ sũrũrũsũta waarokoa, ãrĩmi.

ãgũ irasũ ãrĩripoeta, ãgũ magõguere wãtĩ ñajãdi wiriakõãyũpũ. Irasirigo tariyupo.

Jesús wãrã pũrĩrikũrãrẽ taudea

29 Jesús irogue ããrãdi waa, Galilea wãĩkũri ditaru tũro tariwãgãmi. Pũrũ buúrũgue mũrĩã, eja doami. 30 ãgũ iro doamakũ, wãrã masaka ejama. Waamasĩmerãrẽ, koye ããmerãrẽ, werenĩmasĩmerãrẽ, poyarimasãrẽ, wãrã gajerã pũrĩrikũrãrẽ ãgũ pũro ãĩjapĩma. Irasirigũ Jesús ãgũsãrẽ taumi. 31 Irasirimakũ ããrã, masaka ããgũkakõãma. Werenĩmasĩbirinerã werenĩmakũ ããrã, poyarimasã ããrĩñerã tarimakũ ããrã, waamasĩbirinerã waamasĩmakũ ããrã, koye

ĩābirinerã ĩāmakũ ĩārã, ĩāgukakõāma. Irasirirã Marĩpũre: “Marĩ Israel bumarã Opũ, turatarigũ āārĩmi”, āĩ, usũyari sĩma.

*Jesús cuatro mil āmarẽ baari ejodea
(Mr 8.1-10)*

³² Pũru Jesús gũare ĩgũ buerãrẽ siiu, āĩmi:

—Ĩĩsã masakare bopoñarĩ merã ĩāa. Yũ merã urenũgora āārĩsiamã. ĩgũsãrẽ baari pereakõāa. ĩgũsãrẽ uã merã ĩgũsãya wiirigue goedujāamakũ gāāmebirikoa. ĩgũsã baamerãta waarã, maa dekota turari perea kōmoakõābokuma, āĩmi.

³³ ĩgũ irasũ āĩmakũ, gũã ĩgũ buerã ĩgũrẽ āĩlbũ:

—¿Nasirisĩã, marĩ õõ masaka marĩrõgue ĩĩsã wãrã masaka baaburire bokabokuri? āĩlbũ.

³⁴ Jesús gũare sērẽñami:

—¿Dĩkũ pã duparure opari mũsã? āĩmi.

—Su mojõma pere gaji mojõ peru pērẽbejari duparu, irasũ āārĩmakũ waaĩ mērãgã opãã, āĩ yũjũbũ.

³⁵ Irasirigũ Jesús masakare yebague doadore, ³⁶ su mojõma pere gaji mojõ peru pērẽbejari pã duparure, waaigãdere āĩ, Marĩpũre usũyari sĩmi. Odo, pã duparure, waaigãdere pea, gũare sĩmi. Irasirirã gũã irire masakare guerebũ. ³⁷ Irasirirã āārĩpererã irire baayapiakõāma. Pũru ĩgũsã baadũãadeare su mojõma pere gaji mojõ peru pērẽbejari puuirigora seasã, utũudobobũ. ³⁸ Iro baanerã: nome, majĩrã keoña marĩrõ ũma direta keomakũ, cuatro mil gora āārĩmã. ³⁹ Pũru Jesús masakare seretu odomakũ, doódirugue mũrĩñajãã, Magdala wãĩkũrogue ĩgũ merã waakõābũ.

16

Fariseo bumarã, saduceo bumarã Jesúre Marĩpũ turari merã iri ãmudoredea
(Mr 8.11-13; Lc 12.54-56)

¹ Jesús Magdala wãikũrogue ejadero pũũ, fariseo bumarã, saduceo bumarã ãgũrẽ ãrã ejarã: “Marĩpũ turari merã iri ãmurĩrẽ irika!” ãrĩma. “Ãgũ irire irimasĩbi, diayeta Marĩpũ iriudi meta ããrĩmi”, ãrĩduarã, irasũ ãrĩma. ² Jesús gapũ ãgũsãrẽ yũjumi:

—Musã ñamika abe õãrõ diiañajãmakũ ãrã: “Õãrĩ ñami ããrĩrokoa”, ãrã. ³ Boyoripoe ñĩpimakũ ãrã: “Dekonũ ããrĩrokoa”, ãrã. Ñmarõmarẽ ãrã: “Ãsũ waarokoa”, ãrĩ masĩa. Irire õãrõ masĩkererã, inũ Marĩpũ turari merã yũ iri ãmurĩ gapũre ãrã, neõ õãrõ pémasĩbea. ⁴ Dapora marã masaka ñerã, Marĩpũre gããmemerã ããrĩma. Yũre Marĩpũ turari merã gajino iri ãmudorema. ãgũsã irasiridorek-erepũũ, Marĩpũya kerere weredupuyudi Jonás iridea direta weregũra, ãrĩmi.

Irasũ ãrĩ odo, ãgũsãrẽ béowãgã, gajerogue waakõãmi.

Jesús fariseo bumarã, saduceo bumarã ñerĩ buerire weredea
(Mr 8.14-21)

⁵ Pũũ gũa ditarugue taribujarã, pãrẽ kãtikõãnerã ããrĩbũ. ⁶ Irasirigu Jesús gũare ãrĩmi:

—Fariseo bumarã, saduceo bumarã ãgũsã pã wemasãrĩ morẽrĩrẽ õãrõ pémasĩka! ãrĩmi.

⁷ ãgũ irasũ ãrĩrĩrẽ gũa gapũ pémasĩbiribu. Irasirirã gũa basi gãme ãsũ ãrĩ werenĩbũ:

—Marĩ pãrẽ ãrĩbiradeare ããgũ, irasũ ãrĩkumi, ãrĩbũ.

⁸ Gwa irasũ arĩrĩrẽ masĩsĩã, gware sērēñami:

—¿Nasirirã: “Pãrẽ aĩribirabu”, arĩ gãme werenĩrĩ masã? Yure mērōgã buremurĩ opáa masã. ⁹ ¿Musã pémasĩberi dapa? ¿Yũ cinco mil ãmarẽ su mojõma pã duparure dukawa ejodeare gũñaberi masã? Ìgũsã baayapiadero puru, ¿diĩku puuirigora ìgũsã baadũáadeare masã seasã utudobori? ¹⁰ ¿Puru yũ su mojõma pere gaji mojõ peru pērẽbejari pã duparure dukawa, cuatro mil ãmarẽ ejodeadere gũñaberi masã? Ìgũsã baayapiadero puru, ¿diĩku puuirigora ìgũsã baadũáadeare masã seasã utudobori? ¹¹ ¿Nasirirã masã yũ wererire pémasĩberi? Yũ: “Fariseo bumarã, saduceo bumarã pã wemasãrĩ morẽrĩrẽ õãrõ pémasĩka!” arĩgũ, pãrẽ arĩgũ meta iriabu, arĩmi.

¹² Ìgũ irasũ arĩmakũ pérã, gwa pémasĩbu. Pã wemasãrĩ morẽrĩrẽ arĩgũ meta irimi. Fariseo bumarã, saduceo bumarã arĩgatori merã bueri gapure: “Õãrõ pémasĩka!” arĩgũ irimi.

*Pedro Jesús: “Mũ Cristo ããrã”, arĩ weredeã
(Mr 8.27-30; Lc 9.18-21)*

¹³ Puru Jesús Cesarea Filipino wãĩkuri makã purogue waami. Irogue eja, gware ìgũ buerãrẽ sērēñami:

—Masaka yure ããrĩpererã tĩgũrẽ, ¿naásũ arĩ gũñarĩ? arĩmi.

¹⁴ Gwa ìgũrẽ yujubu:

—Surãyeri murẽ: “Juan masakare wãĩyerimasũ ããrĩmi”, arĩma. Gajerã: “Elías ããrĩmi”, gajerã: “Jeremías ããrĩmi, o gajigu Marĩpuya kerere weredupuyurimasũ ããrĩmi”, arĩma, arĩbu.

¹⁵ Irasũ arĩmakũ, Jesús gware sērēñami:

—Musākoa yure, ¿naásũ arĩ gũñarĩ? arĩmi.

16 Īgũ irasũ arĩmakũ pégu, Simón Pedro ĩgũrẽ arĩmi:

—Mũ, Marĩpu iriudi, Cristo aãrã. Marĩpu okanígũ magũ aãrã mũ, arĩmi.

17 Irasũ arĩmakũ, Jesús ĩgũrẽ yujumi:

—Simón, Jonás magũ, mũ yure yujuri, masaka murẽ werede meta aãrã. Yuru ãmugasigue aãrĩgũ irire murẽ masĩmakũ yámi. Irasirigu mũ usuyari opáa. 18 Murẽ werea. Mũ “Pedro”^{*} wãĩkũ. I ãtãye weka turari wiire iriboderosũ yũ mũ merã yaarãrẽ yure buremuturarã aãrĩmakũ irigũkoa. Irasirigu wãtĩ ĩgũ turari merã yure buremurãrẽ neõ tarinũgãbirikumi. 19 Yũ murẽ Marĩpu ĩgũyarãrẽ doreroguema sawire sīgũkoa, mũ iroguemarẽ iridoreburire. Irasirigu mũ Marĩpu ãmugasigue aãrĩgũ dorerosũta: “I ãmuguerẽ aãrĩ waabirikõãburo”, arĩmakũ, irire waabirimakũ irigũkumi. Mũ ĩgũ dorerosũta: “I ãmuguerẽ aãrĩ waaburo”, arĩmakũ, irire waamakũ irigũkumi, arĩmi Jesús.

20 Jesús irasũ arãdero purũ, guare arĩmi:

—Gajerã masakare yure: “Marĩpu iriudi, Cristo aãrĩmi ĩ”, arĩ werebirikõãka! arĩmi.

Jesús ĩgũ boaburire werede
(Mr 8.31–9.1; Lc 9.22-27)

21 Īgũ irasũ arĩrĩnũ merãta Jesús guare ĩgũ buerãrẽ ĩgũ boaburire werenũgãmi:

—Yure Jerusalẽgue waaró aãrã. Irogu marã: judío masaka murã, paía oparã, Moisés gojadeare

* 16:18 “Pedro”, arĩrõ: “ãtãye”, arĩũaro yáa.

buerimasã yure buro ñerõ tarimakũ irirãkuma. Yure wějērãkuma. Īgũsã irasirikerepuru, arenu waarõ merã Marĩpu yure masũgukumi, ãrĩmi.

²² Īgũ irasũ ãrĩmakũ pégu, Pedro Jesúre yoaweyarogue ãña, ĩgũrẽ ãsũ ãrĩmi:

—Yũ Opũ, irire ãrĩbirikõãka! Marĩpu, mũ ãrĩrõsũ murẽ waamakũ kãmutaburo. Mũ ãrĩrõsũ murẽ waabirikõãburo, ãrĩmi.

²³ Īgũ irasũ ãrĩmakũ pégu, Jesús gãmenugã, ĩgũrẽ ãsũ ãrĩmi:

—Satanás, yũ purore wirika! Mũ, Marĩpu yure dorerire iribirimakũ iridũagu yáa. Marĩpu gããmerĩrẽ gũñabea. Masaka gũñarõsũ gũñáa mũ, ãrĩmi.

²⁴ Īgũ irasũ ãrĩ odo, gũare ãrĩmi:

—Sugũ yure tuyadũagu ĩgũ iridũarire piriburo. Irasirigu yure tuyadũari waja curusague pábiatú wějēsũbu irirosũ ããrĩkeregũ, neõ piriro marĩrõ yure tuyanĩkõãburo. ²⁵ Sugũ i ãmũgue ĩgũya okari direta maĩgũ peamegue béosũgukumi. Gajigu gapũ yure tuyari waja gajerã ĩgũrẽ wějėkerepuru, Marĩpu purogue ĩgũ merã usuyari bokagukumi.

²⁶ Sugũ masakũ i ãmũmarẽ ããrĩpereri opakeregũ, ĩgũ boari purũ waaburi gapũre gũñabiri waja peamegue waagú, õãrĩrẽ neõ wajatabirikumi. Irasirigu i ãmũgue opari direta gũñagũ, ĩgũ boadero purũ, peamegue béosũgukumi. Iroguere ĩgũ wiridũagu i ãmũgue opari merã neõ wajari-masĩbirikumi. ²⁷ Yũ ããrĩpererã tĩgũ, Yũpũ gosewasiriri merã, ĩgũrẽ wereboerã merã i ãmũguere dupaturi aarigú, ããrĩpererã masakare ĩgũsã irideakũ keoro wajarigukoa. ²⁸ Diayeta werea yũ. Surãyeri mũsã õõguere ããrĩrã mũsã boaburo

dupuyuro yu ããrĩpererã tĩgũ, Opu ñajãmakũ ããrãkoa, ãrĩmi Jesús.

17

Jesús ãgũ deyori gorawayudea

(Mr 9.2-13; Lc 9.28-36)

¹ Su mojõma pere gaji mojõ suru pẽrẽbejarinãrĩ puru, Jesús Pedrora, Santiagora, ãgũ pagumu Juãrẽ ãmarĩ buúruga siu marĩãmi. ² Iri buúru wekague ãgũsã marĩjadero puru, ãgũsã ãũrõ ãgũ deyori gorawayuakõãyuru. ãgũ diapu abe ãmumu irirosũ gosewasiriyuro. ãgũya surĩro goserĩne, õãrõ borero waayuro. ³ Irasũ waaripoeta iripoegue marã Moisés, Elías Jesús merã weretamunĩmakũ ããñurã. ⁴ ãgũsãrẽ ããgũ, Pedro Jesúre ãrĩyuru:

—Gua Opu, marĩ õõ ããrĩmakũ õãtariduaa. Mu gããmemakũ, õõguere ure wiigã irigura. Maya wii, Moiséya wii, Elíaya wii irigura, ãrĩyuru.

⁵ ãgũ irasũ ãrĩ werenĩripoe, õãrõ gosewasiriri mikãyebo ãgũsãrẽ túbiakõãyuro. Iri yebo poekague Marĩpu ãsũ ãrĩ werenĩmakũ péñurã:

—Ĩi yu magũ, yu maĩgũ ããrĩmi. ãgũ merã buru usuyaa. Õãrõ péka ããrẽ! ãrĩyuru.

⁶ Irasũ ãrĩmakũ pérã, Jesús buerã buru güiri merã, ejamejã, ãgũsãya diapurire yebague moomejãkõãñurã. ⁷ ãgũsã irasirimakũ ããgũ, Jesús ãgũsã puro waa, ãgũsãrẽ moãña:

—Wãgãnugãka! Güibirikõãka! ãrĩyuru.

⁸ ãgũ irasũ ãrĩmakũ ãũrã, gajerãrẽ ããbirĩñurã. Jesús direta ããñurã.

⁹ Puru buúruga ããrãnerã dijariñurã. Irogu dijarigu Jesús ãgũsãrẽ turaro merã ãrĩyuru:

—Dapora musã iãdeare gajerãrẽ werebirikõãka!
Yũ ããrĩpererã tĩgũ boa, masãdero pũrugue irire
wereka! ãrĩyupũ.

10 Īgũ irasũ ãrĩmakũ, Īgũ buerã Īgũrẽ sērẽñañurã:

—¿Nasirirã Moisés gojadeare buerimasã:
“Cristo, Marĩpũ iriubu aariburo dupuyuro Elías
aaripũrorigũkumi”, ãrĩrĩ? ãrĩ sērẽñañurã.

11 Jesús Īgũsãrẽ yũjuyupũ:

—Musã ãrĩrõsũta Elías aaripũrorigũkumi
ããrĩpererire ãmuyubu. 12 Yũ gapũ ãsũ ãrĩ weregũra
musãrẽ. Elías ejasiami. Īgũ ejakerepũrũ, masaka
Īgũrẽ iãmasĩbirima. Irasirirã Īgũsã gããmerõ
iridũarire Īgũrẽ ñerõ irima. Īgũrẽ iriderosũta
yũ ããrĩpererã tĩgũrẽ ñerõ irirãkuma, ãrĩyupũ.

13 Īgũ irasũ ãrĩmakũ pérãgue, pémasĩñurã. “Īgũ:
‘Elías ejasiami’, ãrĩgũ, Juan masakare wãiyedire
ãrĩgũ yãmi”, ãrĩ masĩñurã pama.

Jesús ñamasĩrĩrĩ opagũre taudea

(Mr 9.14-29; Lc 9.37-43)

14 Pũrũ Īgũsã buúrũgue ããrãnerã wárã masaka
pũro dijajama. Īgũsã dijajamakũ iãgũ, sugũ
masakũ aari, Jesús pũro ñadũkũpuri merã ejamejã,
Īgũrẽ ãrĩmi:

15 —Yũ Opũ, yũ magũrẽ bopoñaka! Īgũ
ñamasĩrĩrĩ opagũ ããrĩmi. Bũro ñerõ tarinami.
Irasirigũ peamegue meémejãma, diaguedere
meébianokõãmi. 16 Irasirigũ Īgũrẽ mũ buerã
pũroque ãĩjadabũ. Īgũsã Īgũrẽ taumasĩbirama, ãrĩmi.

17 Īgũ irasũ ãrĩmakũ pégu, Jesús yũjumi:

—Musã dapora marã, yũre bũremurĩ opamerã,
diayemarẽ neõ pémasĩmerã ããrã. ¿Noópã yoaripoe

musã merã ããrĩgukuri? ¿Noópã yoaripoe musã yure buremubirire gũñaturagukuri? Majĩgũrẽ õõ gapũ ãirika! ãrĩmi.

18 Īgũrẽ ãĩjamakũ, Jesús wãtĩ majĩgũguere ããrĩgũrẽ: “Wirika Īgũrẽ!” ãrĩmi. Jesús Īgũrẽ béowiumakũta, majĩgũ tariakõãmi.

19 Pũũ gua Jesús buerã gajerã péberogue Īgũrẽ sêrẽñabu:

—¿Nasirirã gua gapũ wãtĩrẽ béowiumasĩbirayuri? ãrĩbũ.

20 Jesús yũjumi:

—Musã Marĩpũre mérõgã buremurĩ opasĩa, Īgũrẽ béowiumasĩbirabu. Diayeta musãrẽ werea. Musã buremurĩ opari mostaza wãĩkuri yegãpã irirosũ ããrĩkerepũũ, i buúrure: “Sõõgue waaburo”, ãrĩ masĩbokoã. Musã irasũ ãrĩmakũ, i buúru musã dorerosũta waabokoã. Marĩpũre buremurĩ oparã ããrĩpererire irimasĩa. 21 Īno wãtĩrẽ béowiudũarã, bereri merã Marĩpũre bũro sêrêrõ gããmea, ãrĩmi.

Jesús Īgũ boaburire werenemodea

(Mr 9.30-32; Lc 9.43-45)

22 Pũũ Galilea nikũgue gua waagorenabu. Irogue Jesús guare ãrĩmi:

—Masaka yure ããrĩpererã tĩgũrẽ ñeã, gajerãguere wiarãkuma. 23 Īgũsã yure wêjêrãkuma. Yure wêjêadero pũũ, urenũ waaró merã Marĩpũ yure masũgukumi, ãrĩmi. “Yure wêjêrãkuma”, ãrĩmakũ pãrã, gua bũro bũjawerebũ.

Marĩpũya wiima ããrĩburire niyeru wajasearire sêrẽñadea

24 Pũũ gua Jesús merã Capernaugue waabu. Irogue ejadero pũũ, Marĩpũya wiima ããrĩburire

niyeru wajaseabosarimasã Pedro p̄uro eja, ãgũrẽ s̄erẽñama:

—¿M̄usãrẽ bueḡu Marĩp̄uya wiima ããrĩburire niyeru wajariri? ãrĩma.

²⁵ Pedro ãgũsãrẽ yuj̄ami:

—Wajarimi, ãrĩmi.

P̄uru Pedro wiiḡue ñajãa, Jesũre s̄erẽñaburipoeta Jesũs gap̄u ãgũrẽ s̄erẽñapurorimi:

—Simón, ¿naásũ gũñarĩ mu? I ãmu marã oparã masakare niyeru wajaseaduarã, ¿noã gap̄ure wajaseakuri? ¿ãgũsãyarãrẽ, o gajero marã ãgũsãya nikũgue ejanerã gap̄ure wajaseakuri? ãrĩmi.

²⁶ —Gajero marã gap̄ure wajaseakuma, ãrĩ yuj̄ami Pedro.

ãgũ irasũ ãrĩmakũ, Jesũs ãrĩmi:

—Irasiriḡu suḡu opu ãgũyarãrẽ wajaseabirikumi.

²⁷ Marĩp̄uyarã marĩ ããrĩkererã, Marĩp̄uya wiima ããrĩburire niyeru wajaseabosarãrẽ marĩ merã guamakũ iribirikoa. Irasirirã wajarirãkoa. Wejerida ãĩ, ditarugue waaĩ wẽjẽgũ waaka! Baapurorigure túwea ãĩka! ãgũya disigue niyeru tire bokagũkoa. P̄uru iriti merã marĩ p̄erãyare Marĩp̄uya wiima ããrĩburire wajariḡu waaka! ãrĩmi.

18

Jesũs suḡu gajerã nemorõ ããrĩgũyamarẽ were-dea

(Mr 9.33-37; Lc 9.46-48)

¹ Iriporee ḡua Jesũs buerã ãgũ p̄uro eja, s̄erẽñabu:

—Ëmugasigue Marĩpu ãgũyarãrẽ doreroguerẽ, ¿noã ḡua watopere ããrĩpererã nemorõ ããrĩgũkuri? ãrĩbu.

² Gwa irasũ arĩmakũ, Jesús majĩgũrẽ siiu, ĩgũrẽ gwa watopegue añú, arĩmi:

³—Diayeta mũsārẽ werea. “Majĩgũ irirosũ aārã, gajerã nemorõ aārĩbea”, arĩ gũñaka! Mũsã: “Gajerã nemorõ aārã”, arĩ gũñarĩrẽ gorawayumerã, ãmũgasigue Marĩpũ ĩgũyarãrẽ doreroguerẽ neõ waabirikoa. ⁴ Sugũ ĩgũ basi: “Yũ ubu aārĩgũ, majĩgũ irirosũ aārã”, arĩ gũñagũ, Marĩpũ ãmũgasigue aārĩgũ ĩũrõ gajerã nemorõ aārĩmi. ⁵ Sugũ yaagure, ĩĩ majĩgũ irirosũ aārĩgũrẽ õarõ bokatĩrĩñeãgũ yũdere bokatĩrĩñeãmi.

*Gajerãrẽ ñerõ irimakũ iribirikõãka! arĩ weredea
(Mr 9.42-48; Lc 17.1-2)*

⁶ 'Sugũ yũre bũremurãrẽ ĩĩ majĩgũ irirosũ aārĩrãrẽ ñerõ irimakũ irigano, bũro wajamoãũgũkumi. Irasiriro ĩgũ gajerãrẽ ñerõ irimakũ iriburi dupuyuro masaka ĩgũrẽ wãriye ãtãye merã wũnugũgue siasiu, wãdiyague meéyomakũ õãboko. ⁷ I ãmũguere masakare ñerõ irimakũ iriri aārã. Irasirirã ñerõ tarima. I ĩgũsãrẽ ñerõ irimakũ iriri aārĩnĩkõãrokoa. Gajerãrẽ ñerõ irimakũ irigano gapũ ñetariro tarigũkumi.

⁸ Irasirirã mũsãya mojõ, o gubu merã ñerõ irirã, iri mojõrẽ, o iri gubure dititã béorosũ iri ñerõ iririre pirika! Su mojõ, o su gubu opakrerã, Marĩpũ pũrogue waamakũ õãtarirokoa. Ñerõ iririre pirimerã gapũ perebiri peamegue béosũrãkuma. ĩgũsã pe mojõ, o pe gubu opakrerã, peamegue waamakũ ñetarirokoa. ⁹ Mũsãya koyeru merã ĩã, ñerõ irirã, irirure goreweabéorosũ iri ñerõ iririre pirika! Su koyeru opakrerã, Marĩpũ pũrogue

waamakū ōātarirokoa. Ñerō iririre pirimerā gapu p rebiri peamegue béosūrākuma. Īgūsā pe koyeru opakrerā, peamegue waamakū ñetarirokoa.

Jesús oveja dediridi keori merā buedea

(Lc 15.3-7)

¹⁰ 'Neō sugu ĩsā majrārē ubu ĩābéobirikōāka! Mūsārē werea. Ūmugasigue Yhpure wereboerā ĩgūsārē korerā ĩgū merā āārīnīkōāma, ĩgūsārē ĩgū iritamudorerire irimurā. ¹¹ Yu āārīpererā tīgū dediribonerārē taugu aarigū iribu.

¹² 'Yu wererire, ¿naāsū gūñarī? Ovejare korerimasū cien oveja opagu, sugu oveja dedirimakū ĩāgū, gajerā noventa y nueve ovejare makā turo ĩgūsā baarogue duripīkōā, dediriadire āmagū waakumi. ¹³ Diayeta mūsārē werea. Īgūrē bokagu, gajerā noventa y nueve dediribiranerā nemorō ĩgūrē usuyakumi. ¹⁴ Āsūta Marīpu ūmugasigue āārīgū ĩsā majrā irirosū āārīrārē dedirimakū gāāmebemi, ārīmi Jesús.

“Muyagu murē ñerō irimakū āsū irika!” ārīdea

(Lc 17.3)

¹⁵ Irasū ārī odo, āsū ārī werenemomi:

—Muyagu murē ñerō irimakū, gajerā péberogue ĩgū merā irire werenīka! Īgū irire ōārō merā āmudugu: “Murē ñerō iribu! Kātika yu irideare!” ārīmakū, mūsā dupaturi usuyarī merā gāme wapikurākoa. ¹⁶ Īgū irire āmudubirimakū, sugu o pērārē siiu, dupaturi ĩgū puro waaka! Īgūsā péurogue ĩgū murē ñerō irideare wereka! Irasiro Marīpuya werenīrī gojadea pūgue dorederosūta pērā o urerā iri ñerō irideare wererire pédero

puu: “Diayeta irasũ waabu”, ari masirakuma.
 17 Mure ñerõ iridi igũsã pèurogue amudwabirimakũ,
 aaripererã yure buremurã merã nerẽ, igũsarẽ
 igũ ñerõ irideare wereka! Igũsã pèuroguedere
 amudwabirimakũ iãrã, igũrẽ: “Marĩpũre buremubi,
 o romano marã opũre ñegũ niyeru wajaseabosari-
 masũ irirosũ aarĩmi”, ari iãka!

18 'Diayeta musãrẽ werea. Musã Marĩpu
 amugasigue aarĩgũ dorerosũta: “I amugũere asũ
 waabirikõãburo”, ari makũ, irire waabirimakũ
 irigukumi. Musã igũ dorerosũta: “I amugũere asũ
 waaburo”, ari makũ, irire waamakũ irigukumi.

19 'Gajidere musãrẽ werea. Musã pẽrã sũrosũ
 gũñarĩ merã: “Asũ Marĩpũre sërẽrã!” ari makũ, Yũpu
 amugasigue aarĩgũ musã sërẽrõsũta irigukumi.
 20 Pẽrã, o urerã yure buremurã nerẽmakũ, yude
 igũsã watopegue aãrã, ari mi Jesús.

21 Irasũ ari makũ pégũ, Pedro Jesús puo ejanugã,
 asũ ari sërẽñami igũrẽ:

—Yũ Opũ, ¿diikugora yaagu yure igũ ñerõ iri-
 makũ kãtigukuri? ¿Su mojõma pere gaji mojõ peru
 pẽrẽbejarigora igũ yure ñerõ irimakũ kãtigukuri?
 ari mi.

22 Jesús igũrẽ yujumi:

—“Su mojõma pere gaji mojõ peru pẽrẽbejarigora
 igũ yure ñerõ irimakũ kãtigukoa”, ari birikõãka! Igũ
 ñerõ irinarikũ kãtika! ari mi.

*Jesús sugũ moãboerimasũ igũ merãmũ ñerõ irideare
 kãtiduabi keori merã buedea*

23 Irasũ ari odo, keori merã buemi guare Jesús:

—Irasiro Marĩpu amugasigue aarĩgũ igũyarãrẽ
 doreri asũ aãrã. Sugũ opũ igũrẽ moãboerimasãrẽ

Īgūsā Īgūrē wajamorīrē wajaridorekumi. ²⁴ Īgūsā Īgūrē wajamorīrē āmunugāripoe gajerā Īgūyarā sugu wáro wajamogūrē Īgū puro āiakuma. ²⁵ Īgū wajamorīrē wajarimasibirimakū Īāgū, Īgū opu Īgūyarārē: “Īgūrē, Īgū marāpore, Īgū pūrārē Īgū opari āārīpereri merā gajerāguere duarā waaka!” ārīkumi. “Irasirigu Īgūsārē duari waja merā Īgū yure wajamorīrē wajarigukumi”, ārīkumi.

²⁶ 'Irasū ārīmakū pégu, wáro wajamogū gapu ñadukupuri merā ejamejā, Īgū opure buro sērēkumi: “Yu opu, guare gajerāguere duabirikōāka! Yúka dapa! Bopoñaka yure! Murē yu wajamorī āārīpererire wajaripeokōāgukoa”, ārīkumi.

²⁷ 'Irasū ārīmakū pégu, Īgūrē bopoñarī merā Īā, Īgūrē wiukumi. “Īgū wajamodea preakōāa”, ārī, irire kātipeokōākumi. ²⁸ Īgū irasiriadero paru, wáro wajamodi waa, gajigu Īgū merāmu Īgū opure moāboerimasūrē bokajakumi. Īgū merāmu gapu Īgūrē mérōgā wajamokumi. Īgūrē bokajagu, mata Īgūya wánugūrē buro ñeā: “Murīgora, yure mu wajamorīrē wajaripurumuka!” ārīkumi.

²⁹ 'Īgū irasū ārīmakū, Īgū merāmu gapu ñadukupuri merā ejamejā, Īgūrē buro sērēkumi: “Yúka dapa! Bopoñaka yure! Murē yu wajamorī āārīpererire wajaripeokōāgukoa”, ārīkumi. ³⁰ Īgū buro sērēmakū pékeregū, Īgūrē yujubirikumi. Irasirigu Īgūrē peresugue iridorekumi. “Yure Īgū wajamorīrē wajaripeomakūgue wiuka!” ārīkumi.

³¹ 'Wáro wajamodi Īgūrē mérōgā wajamogūrē irasirimakū Īārā, gajerā moāboerimasā buro bujawereri merā Īgū iriadea āārīpererire Īgūsā

opure wererã waakuma. ³² Irire pégu, ìgũsã opu wáro wajamodire siiu, ãsũ ãrĩkumi: “Mu ñetaria. Mu yure buro sêrēmakũ, mu yure wajamodeare kãtipeokõãbu. ³³ Yu irasirikerepuu, mu gapu mu merãmurẽ ìgũ murẽ mérõgã wajamodeare kãtibirayuro. Mu yure wajamodeare yu kãtiderosũta ìgũ murẽ wajamodeadere mu kãtimakũ õãtariboakuyo. ¿Nasirigu ìgũrẽ bopoñabirari mu?” ãrĩkumi.

³⁴ Irasũ ãrĩ odo, ìgũ merã buro guagu, ìgũrẽ peresu irikumi buro wajamoãdoregu. Ìgũ wajamorĩrẽ wajaripeobi neõ wiribirikumi, ãrĩ weremi Jesús.

³⁵ Puru ãsũ ãrĩnemomi:

—Yuru umugasigue ããrĩgũ musãrẽ irasũta wajamoãgakumi, musãyarã ìgũsã musãrẽ ñerõ irideare musã õãrõ merã kãtibirimakũ, ãrĩmi.

19

Jesús masakare: “Musã marãposã nomerẽ béobirikõãka!” ãrĩ buedea (Mr 10.1-12; Lc 16.18)

¹ Jesús irire wereadero puu, Galilea nikũgue ããrãdi guã ìgũ buerã merã Judea nikũgue waa, dia Jordán wãikũdiya gaji koepugue waami. ² Irogue waamakũ ìãrã, wãrã masaka ìgũrẽ tuyama. Irasirigu irogue pũrĩrikurãrẽ taumi.

³ Irasirimakũ ìãrã, surãyeri fariseo bumarã Jesús puro eja, ìgũrẽ ñerĩ ìgũ werenĩmakũ iriduarã, sêrẽñama:

—¿Sugu masaku ìgũ gããmerõ ìgũ marãpore béomakũ, marĩ doreri ããrĩkuri? ãrĩma.

⁴ Jesús ìgũsãrẽ yujumi.

—¿Marĩpaya werenĩrĩ gojadea pũrẽ buebiriri musã? Æsũ ãrĩ gojasũdero ããrĩbú: “Neõgoraguere Marĩpũ i ãmurẽ irigũ, ãmũũ, nomeõ iridi ããrĩmĩ”, ãrĩ gojasũdero ããrĩbú. ⁵ Æsũ ãrĩ gojanemosũdero ããrĩbú doja: “Sugũ ãmũũ ãgũ pagũsãmarãrẽ wiri, ãgũ marãpo merã ããrĩgũkumi. Irasirirã ãgũsã pẽrã ããrĩkererã, Marĩpũ ãũrõ su dupũta irirosũ ããrĩrãkuma”, ãrĩ gojasũdero ããrĩbú. ⁶ Irasirirã pẽrã irirosũ ããrĩbema. Su dupũta irirosũ ããrĩma. Marĩpũ ãgũsãrẽ su dupũta irirosũ ããrĩmakũ iridero pũrũ, gajigũ ãgũsãrẽ gãme béomakũ iribirikõãrõ gããmea, ãrĩmi Jesús.

⁷ ãgũ irasũ ãrĩmakũ pẽrã, fariseo bumarã sẽrẽñama doja:

—Mũ irasũ ãrĩkererũ, Moisés gapũ ãsũ ãrĩ gojadi ããrĩmĩ: “Sugũ ãgũ marãpore béodũagũ: ‘I waja merã murẽ béoa’, ãrĩ gojari pũrẽ sũrõ gããmea”, ãrĩ gojadi ããrĩmĩ. ¿Nasirigũ irasũ ãrĩ gojayuri? ãrĩma.

⁸ Jesús ãgũsãrẽ yũjumi:

—Musã ñekũsãmarã Marĩpũ dorerire iridũabirimakũ ããgũ: “Musã marãposã nomerẽ béomasã”, ãrĩ gojadi ããrĩmĩ Moisés. ãgũ irasũ ãrĩ gojakerepũrũ, neõgoragueta Marĩpũ musã marãposã nomerẽ béomakũ gããmebiridi ããrĩmĩ. ⁹ Musãrẽ werea. Sugo marãpũkũgo gajigũ merã ñerõ iribirikerepũrũ, igo marãpũ gapũ igoire béo, gajegore marãpokũgũ, igo merã ñerõ irigũ yãmi. Gajigũ béodeore marãpokũgũde igo merã ñerõ irigũ yãmi, ãrĩmi.

¹⁰ ãgũ irasũ ãrĩmakũ pẽrã, gũã ãgũ buerã ãrĩbũ:

—Īgūsā marāposā nomerē béo, gajego merā āārīmakū ōābea. Irasirirā marāpo marīmakū ōābokoa, ārībɛ.

¹¹ Jesús gɛare yɛjɛmi:

—Āārīpererā masaka marāpo, o marāpɛ marīrāta āārībokatīūbirikuma. Marīpɛ marāpokɔdorebirinerā, o marāpokɔdorebirinerā dita bokatīūmasīma. ¹² Surāyeri ūma marāpokumasībema. Īgūsā watopegue surāyeri ūma deyoarāgueta poyarimasā āārīnerā nomerē marāpokumasībema. Masaka gajerā ūmarē marāpokumasībirimakū yāma. Gajerā ūma, Marīpɛ ūmɛgasigue āārīgú ĩgūyarārē doreguya direta iridɛarā marāpokɛbema. Irasirirā marāpo, o marāpɛ marīrā āārībokatīūduarā, āsūta āārīnīkōāburo, ārīmi Jesús.

*Jesús majīrāya āārīburire Marīpɛre sērēbosadea
(Mr 10.13-16; Lc 18.15-17)*

¹³ Pɛɛ masaka majīrārē Jesús pɛro āījama, ĩgūsārē ñapeo, Marīpɛre ĩgūsāya āārīburire sērēbosadorerā. Īgūsā āījamakū ĩārā, gɛa ĩgū buerā ĩgūsārē bokatīrī: “Īgūrē garibobirikōāka!” ārībɛ.

¹⁴ Jesús gapɛ gɛare ārīmi:

—Majīrā yɛ pɛrogue aariburo. Kāmutabirikōāka ĩgūsārē! Ūmɛgasigue Marīpɛ ĩgūyarārē dorerogue āārīmurā, ĩsā majīrā yɛre ɛsuyari merā bokatīrīñeārā irirosū āārīma, ārīmi.

¹⁵ Irasirigɛ majīrārē ñapeo, Marīpɛre ĩgūsāya āārīburire sērēbosa odo, gajerogue waakōāmi doja.

Sugũ maamũ wári doebiri opagũ Jesús merã werenídea

(Mr 10.17-31; Lc 18.18-30)

¹⁶ Pũrũ sugũ maamũ Jesús pũroque eja, ìgũrẽ sêrẽñami:

—Õãgũ buegũ, yũ ãmũgasigue perebiri okari opadũagũ, ¿ñeéno òãrĩrẽ irigũkuri? ãrĩmi.

¹⁷ Jesús ìgũrẽ ãrĩmi:

—¿Nasirigũ yũre: “Õãgũ ããrã”, ãrĩrĩ? Marĩpũ sugũta òãgũ ããrĩmi. Mũ ãmũgasigue perebiri okari opadũagũ, Marĩpũ dorerire irika! ãrĩmi.

¹⁸ Ìgũ irasũ ãrĩmakũ pégũ, maamũ ãsũ ãrĩ sêrẽñami doja:

—¿Díi gapũre irigũkuri? ãrĩmi.

Jesús ìgũrẽ yũjũmi:

—Masakare wějẽbirikõãka! Gajigũ marãpo merã ñerõ iribirikõãka! Yajabirikõãka! Gajerãyamarẽ ãrĩgatori merã werebirikõãka! ¹⁹ Mũpũ, mũpore gopeyari merã bũremuka! Mũ basi maĩrõsũta mũ pũro ããrĩrãrẽ maĩka! ãrĩmi.

²⁰ Ìgũ irasũ ãrĩmakũ, maamũ Jesúre ãrĩmi doja:

—Iri doreri ããrĩpererire majìgũgueta neõ tarinũgãbiribũ yũ. ¿Ñeéno dũyari, yũre yũ irinemoburi? ãrĩmi.

²¹ Jesús ìgũrẽ ãrĩmi:

—Mũ, Marĩpũ ìũrõ ìgũ dorerire iripeodũagũ, mũ oparire duagũ waaka! Mũ duadea wajare bo-porãrẽ sĩa! Irasirigũ ãmũgasiguere wári òãrĩ opagũkoa. Irasiri odo, yũ merã aarika! ãrĩmi.

²² Ìgũ irasũ ãrĩmakũ pégũ, maamũ ìgũ wári oparire maĩsĩa, bũro bũjawereri merã waakõãmi.

23 Īgũ bujawereri merã waamakũ ããgũ, Jesús guare ĩgũ buerãrẽ ãrĩmi:

—Diayeta musãrẽ werea. Wári doebiri oparãrẽ Marĩpu umugasigue ããrĩgũ ĩgũyarãrẽ dorerogueru waamakũ diasagorãa. 24 Musãrẽ dupaturi werea. Camellu awiru gobegãrẽ ñajãtariweremasĩbirikumĩ. I nemorõ wári doebiri opagure Marĩpu ĩgũyarãrẽ dorerogueru waamakũ diasãa, ãrĩmi.

25 Īgũ irasũ ãrĩmakũ pãrã, gũa ĩgũ buerã pãgũka, ãsũ ãrĩ gãme sãrẽñabu:

—Iro merẽ, ¿noã gapu Marĩpu tausũmurã ĩgũ purogue waamurã ããrĩbokuri? ãrĩbu.

26 Jesús guare ãã, ãrĩmi:

—Masaka ĩgũsã basi ĩgũsã iriri merã Marĩpu purogue waamasĩbema. Marĩpu dita masakare ĩgũ puro ããrĩmurã waamakũ irimasĩmi. ããrĩpererire irimasĩmi, ãrĩmi.

27 Īgũ irasũ ãrĩmakũ pãgũ, Pedro ĩgũrẽ ãrĩmi:

—Gũa Opũ, gũa murẽ tuyarã, ããrĩpereri gũa opadeare pípeokõãbu. Irasirirã gũa gapu, ¿ñeonorẽ oparãkuri? ãrĩmi.

28 Jesús guare ãsũ ãrĩ yujumi:

—Diayeta musãrẽ werea. I umu peredero purũ ããrĩpereri maama gorawayuripoe yũ ããrĩpererã tĩgũ umugasi gosewasirogue Opũ doarogue doagũkoa. Yũ iro doamakũ, musãde yure tuyarã, pe mojõma pere su gubu peru pãrẽbejari oparã doarigue doarãkoa. Irasirirã musã Israel bumarãrẽ pe mojõma pere su gubu peru pãrẽbejari buri marãrẽ dorerãkoa. 29 Yũ merã waarã, ĩgũsãya wiirire, ĩgũsã pagupũrãrẽ, pagusãmarãrẽ, pũrãrẽ, ĩgũsãya pooerire pípeorã, wári õãrĩ wajatarãkuma.

Īgūsā iro dupuyuro opaderosū cien nemorō opanemorākuma. Irasū āārīmakū Marīpū merā perebiri okari oparākuma. ³⁰ Wārā daporare oparā āārīrā, pūpūguere ubu āārīrā dujarākuma. Wārā daporare ubu āārīrā gapū, pūpūguere oparā āārīrākuma, ārī weremi Jesús guare ĩgū buerārē.

20

Jesús igui pooe moārā keori merā buedea

¹ Irasirigū dupaturi Jesús keori merā buemi doja:

—Marīpū ūmugasigue āārīgū ĩgūyarārē doreri āsū āārā. Sugū igui pooe opū boyodujimejāripoe ĩgūya poovere moāmūrārē siiugū waakumi. Āsū ārīkumi: ² “Sunū moārī waja suti niyeru ti wajarigūra”, ārīkumi ĩgūsārē. Pūpū ĩgūsārē ĩgūya poogue moādoregū iriukumi. ³ Pūpū goeripoe dupuyuro nueve hora āārīmakū, makā dekogue waa, gajerā moārī opamerārē bokajakumi. ⁴ ĩgūsārē bokaja, ārīkumi: “Mūsāde yaa poovere moārā waaka! Keoro wajarigūra”, ārīkumi. Irasirirā ĩgūya poogue moārā waakuma. ⁵ Pūpū pooe opū goeripoe āārīmakū, ñamika tres hora āārīmakūdere gajerārē moādorekumi doja. ⁶ Pūpū ñamikague cinco hora āārīmakū, makā dekogue waakumi doja. Irogue eja, gajerā moārī opamerārē bokaja, ĩgūsārē sērēñakumi: “¿Nasirirā dapagārē moābirikererā doaneākōārī mūsā?” ārīkumi. ⁷ “Neō sugū guare: ‘Moārā waaka!’ ārībirami”, ārī yujakuma. Irasirigū pooe opū ĩgūsārē: “Mūsāde yaa poovere moārā waaka!

Keoro wajarigura”, ārīkumi. Irasirirā īgūsāde īgūya poore moārā waakuma.

⁸ 'Abe ñajāripoegue āārīmakū, pooe opu īgūya poore siiu moāgūrē āsū ārīkumi: “Moārārē siiu, moārā ejatūnunerārē wajaripurori, īgūsā ejaburi dupuyuro ejanerārē wajari odo, ejarurorianerārē wajaritūnuka!” ārīkumi. ⁹ Irasirigū, cinco hora āārīmakū moānugānerārē sunu moārī wataropā suti niyeru ti wajarikumi. ¹⁰ Īgū irasū wajarimakū iārā, moāpurorianerā: “Gua gapure īgūsā nemorō wajarigukumi”, ārī gūñadikuma. Īgūsādere surosūta wajarikōākumi. ¹¹ Irasū wajarimakū iārā, pooe opu merā gua, īgūrē ārīkuma: ¹² “Īsā gua purugue ejanerā gapu su horata moāama. Gua gapu sunu oārō moāneākōābu. Buro abe asiripoe moābu. Gua irasū moāneākerepuru, surosū wajarikōābu m”, ārīkuma. ¹³ Īgūsā irasū ārīmakū pégu, pooe opu gapu sugu īgūsā watope āārīgūrē ārīkumi: “Yū merāmu, yū mūrē ñerō irigū meta yāa. Yū mūrē: ‘Suti niyeru ti wajarigura’, ārīmakū pégu: ‘Jáu’, ārābu m. Irasirigū yū ārāderosūta mūrē keoro wajariabu. ¹⁴ Irasirigū yū wajariadeare āi, waakōāka! Īrē m purugue ejadidere mūrē wajariaderopāta wajarigura. ¹⁵ I yaa niyeru āārā. Irasirigū yū gāamerō wajarimasā. Gajerārē yū oārō sīmakū iāgū, ¿yure iaturiri m?” ārīkumi pooe opu.

¹⁶ 'I keori ārīrōsūta Marīpu īgūyarā āārīpurorinerārē, īgūsā puru īgūyarā āārīrādere surosū oārīrē sīgukumi, ārī weremi Jesús guare.

*Dupaturi Jesús īgū boaburire weredeā
(Mr 10.32-34; Lc 18.31-34)*

17 Jesús Jerusalén waarí maague waagú, guare pe mojõma pere su gubu peru pērēbejarã ãgũ buerãrē gajerã péberogue siiuwãgã, ãrĩmi:

18 —Õãrõ péka! Marĩ Jerusalēgue waarã yáa. Irogue yu ããrĩpererã tĩgũ, paía oparãguere, irasũ ããrĩmakũ Moisés gojadea buerimasãguere wiasũgũkoa. Ìgũsã yure: “Boaburo”, ãrĩrãkuma.

19 Irasirirã judío masaka ããrĩmerãguere yure wiarãkuma. Ìgũsã yure bũrida, tãrã, curusague pábiatú wējērãkuma. Ìgũsã yure wējēadero puru, urenu waaró merã masãgũkoa, ãrĩmi Jesús.

Santiago, Juan pago Jesúre sērēdea

(Mr 10.35-45)

20 Puru Zebedeo marãpo igo pũrã Santiago, Juan merã Jesús purogue eja, ãgũrē sērēbo ñadukupuri merã ejamejãmo.

21 Igo irasirimakũ, Jesús igore sērēñami:

—¿Ñeénorē gããmerĩ mu? ãrĩmi.

Igo ãgũrē yujũmo:

—Mu, Opu ñajãgũ, ñisã yu pũrã pērãrē mu merã doremurã sóoka! Sugure mu diaye gapu, gajigure kúgapu doadoreka! ãrĩmo Jesúre.

22 Igo irasũ ãrĩmakũ pégu, Jesús igo pũrãrē ãrĩmi:

—Musã yure sērērĩrē pémasĩbea. Yu burõ ñerõ tarigũkoa. ¿Yu ñerõ tarirosũ musãde ñerõ tarirã, bokatĩũrãkuri? ãrĩmi.

Ìgũsã yujũma:

—Bokatĩũkõãrãkoa, ãrĩma.

23 Jesús ãgũsãrē ãrĩmi:

—Diyeta ããrã. Yu irirosũ musãde ñerõ tarirãkoa. Yu gapu musãrē yu diaye, kúgapu doamurãrē beyemasĩbea. Yuru ãmusiadi ããrĩmĩ

irire. Irasirirã ĩgũ beyenerã dita yu diaye, kúgaru doarãkuma, ãrĩmi.

²⁴ Gna pe mojõmarã ĩgũ buerã gapu Santiago, Juan ĩgũsã Jesúre sērērĩrē pérã, ĩgũsã merã guabu.

²⁵ Gna guamakũ ĩãgũ, Jesús ããrĩpererãrē guare siiu neeõ, ãsũ ãrĩ weremi:

—I nikũ marã oparã Marĩpue buremumerã gapu ĩgũsãyarãrē dorerã, turaro merã dorema. ĩgũsã doka marãde irasũta dorema. Irire masĩa musã. ²⁶ Musã tamerã ĩgũsã irirosũ iribirikoa. Musã watopeguere opu ããrĩduagu, musãrē moãboegu irirosũ ããrĩburo. ²⁷ Sugũ musã watopegue ããrĩgũ, gajerã nemorõ ããrĩduagu, moãboegu irirosũ ããrĩburo. ²⁸ Yude irasũta ããrã. Yu ããrĩpererã tĩgũ masaka yure iritamuburo, ãrĩgũ meta aaribú. Yu gapu ĩgũsãrē iritamugũ aaribú. Irasirigu wãrã masakare yu boari merã ĩgũsã ñerõ iridea wajare wajaribosagu aarigũ iribu, ãrĩmi Jesús guare.

Jesús pērã koye ĩãmerãrē taudea

(Mr 10.46-52; Lc 18.35-43)

²⁹ Puru Jericõgue ããrãnerã gua wirimakũ, wãrã masaka Jesúre tuyama. ³⁰ Gna waarĩ maa turo, pērã koye ĩãmerã doama. Jesús iro tariwãgãrĩrē péñarã ãsũ ãrĩ gainĩma:

—Gna Opu, David parãmi ããrĩturiagu, guare bopoñaka! ãrĩma.

³¹ ĩgũsã irasũ ãrĩ gainĩmakũ, masaka gapu ĩgũsãrē: “Toeaka!” ãrĩma. ĩgũsã irasũ ãrĩkerepuru, ĩgũsã gainĩadero nemorõ gainĩnemoma:

—Gna Opu, David parãmi ããrĩturiagu, guare bopoñaka! ãrĩma.

32 Īgūsā irasū ārīmakū pé, Jesús dujanugāja, Īgūsārē siiu, āsū ārī sērēñami:

—¿Ñeénorē yu musārē irimakū gāāmerī? ārīmi.

33 —Gua Opu, guare koye ĩāmakū irika! ārī yujama.

34 Īgūsā irasū ārīmakū, Jesús ĩgūsārē bopoña, ĩgūsāya koyere moañami. Īgū moañamakūta, ĩākōāma. Irasirirā Jesúre tuyama.

21

Jesús Jerusalēgue ejadea

(Mr 11.1-11; Lc 19.28-40; Jn 12.12-19)

1 Gua Jesús merā Jerusalēgue ejaburo dupuyuro Betfagé wāikuri makāgue ejapuroribu. Betfagé, buúru Olivos wāikuri buúru puro āārībá. Jesús iroque ejagu, gua merāmarā pērārē² āsū ārī iriumi:

—Si makā marī bokatūrō āārīrī makāgue waaka! Iroque ejarā, burra ĩgūsā sianúadeore majīgū merā bokajarākoa. Īgūsārē bokajarā, ĩgūsā siadeadare kura, āirika! ³ Musārē: “¿Nasirimurā ĩgūsārē kurari?” ārīmakū pērā: “Marī Opu gāāmeami. Dapora wiagukumi doja”, ārīka! ārī iriumi.

⁴ Ire irasū irigu, Marīpuya kerere weredupuyudi gojaderosūta irimi. Āsū ārī gojadi āārīmí:

⁵ Jerusalén marārē āsū ārī wereka: “Musā Sión* marā ĩāka! Musā Opu musā purogue musārē iritamugū aarími.

* 21:5 Zacarías 9.9: Iripoegue marā Jerusalén wāikuri makārēta “Sión” ārīnerā āārímá.

Ubu ããrĩgũ irirosũ burra majĩgũ weka peyawãgãrimi”, ãrĩ gojadi ããrĩmĩ.✠

6 Irasirirã Jesús iriuanerã iri makãgue waa, ĩgũ iridoreaderosũta iriñurã. 7 Burrore, pago merã Jesús pãrogue ãĩjamakũ, gũaya surĩ wekamarẽ túwea, ĩgũsã weka peobũ. Gũa irasirirãdero pũũ, Jesús, majĩgũ wekague mũrĩbejami. 8 Mũrĩbeja, Jesús Jerusalẽgue peyawãgãmakũ ĩãrã, masaka wãrã ĩgũsãya weka sãñarĩ surĩre túwea ãĩ, ĩgũ waarĩ maarẽ sãõpĩdupuyuma ĩgũrẽ buremurã. Irasũ ããrĩmakũ, gajerã yuku dupũri pũrikũrire diti ãĩ, maarẽ pĩdupuyuma, ĩgũ waarĩ maa õãrĩ maa ããrĩburo, ãrĩrã. 9 Irasirirã ĩgũ dupuyuro waarã, ĩgũ pũũ tũyarã ãsũ ãrĩ gainĩma:

—Opũ David parãmi ããrĩturiagure usũyari sĩrã! ĩĩ Marĩpũ marĩrẽ taugũ iriudi õãrõ aariburo. Marĩpũre: “Õãtaria mũ ããrĩpererã Opũ ãmũgasigue ããrĩgũ”, ãrĩ, usũyari sĩrã! ãrĩma.

10 Jesús Jerusalẽgue ejamakũ, irogue ããrĩrã ĩãgũkapereakõãma. Wãrã ĩgũsã basi ãsũ ãrĩ gãme sãrẽñama:

—¿Noã ããrĩrĩ ĩĩ? ãrĩma.

11 Gajerã masaka yũjũma ĩgũsãrẽ:

—Ĩĩ Marĩpũya kerere weregũ Jesús wãĩkũgũ ããrĩmĩ. Galilea nikũma makã Nazaretmũ ããrĩmĩ, ãrĩma.

*Jesús Marĩpũya wiigũe duarãrẽ béowiudea
(Mr 11.15-19; Lc 19.45-48; Jn 2.13-22)*

12 Pũũ Jesús Marĩpũya wiigũe ñajãmi. Ñajãa, doebiri duarãrẽ, ĩgũsã duarire wajarĩrãdere bokajũ, ĩgũsãrẽ béowiumi. Niyeru gorawayurimasãya

✠ 21:5 Zac 9.9

niyeru sãñarĩ kũmarĩrẽ yomeéwiunokõãmi. Bujare dua doanírãya doaripẽrĩdere irasũta irimi.

¹³ Ìgũsãrẽ àsũ ãrĩmi:

—Marĩpũ Ìgũya werenírĩ gojadea pũgue àsũ ãrĩdi ããrĩmĩ: “Yaa wii, yũre bũremurã yũre sërẽrĩ wii ããrã”, ãrĩdi ããrĩmĩ. Mũsã gapũ yajarimasãya wii irirosũ ããrĩmakũ yáa, ãrĩmi.

¹⁴ Jesús Marĩpũya wiigũe ããrĩripoe koye Ìãmerã, waamasĩmerãde Ìgũ pũrogũe ejama. Ìgũsã ejamakũ Ìãgũ, Ìgũsãrẽ taumi. ¹⁵ Paía oparã, Moisés gojadeare buerimasã gapũ Ìgũ turari merã iri Ìmumakũ Ìãrã, iri wiigũe majĩrã Ìgũrẽ: “Opũ David parãmi ããrĩturiagũ õãtaria mũ”, ãrĩ gainĩmakũ pãrã, Ìgũ merã guama. ¹⁶ Irasirirã Jesũre àsũ ãrĩma:

—¿Ìĩsã majĩrã ãrĩrĩrẽ pãri mũ? ãrĩma.

Jesũs yũjami:

—Pãa. ¿Marĩpũya werenírĩ gojadea pũrẽ ire buibiriri mũsã? Àsũ ãrĩ gojasũdero ããrĩbũ:

Mũ majĩrãrẽ, mirĩrãgãrẽ õãrõ usũyari merã mũrẽ bayapeomakũ iribũ, ãrĩ gojasũdero ããrĩbũ, ãrĩmi Jesús Ìgũsãrẽ.✠

¹⁷ Irasũ ãrĩ odo, Ìgũsãrẽ béowãgã, Betania wãĩkũri makãgue waakõãmi. Irogũe eja, kãrĩmi.

Jesũs higuera gũre ñãĩngãmakũ iridea

(Mr 11.12-14, 20-26)

¹⁸ Gajinũ boyoripoe Jesús Jerusalẽgue goedujãagũ, mũaboakõãmi. ¹⁹ Irasũ mũaboagũ, maa tũro nídi higuera wãĩkũdire Ìãgũ, irigũ dukare ãmagũ waadimi. Dũka marĩbũ irigũ gapũ. Pũrĩ dita ããrĩbũ. Dũka marĩmakũ Ìãgũ, Jesús àsũ ãrĩmi:

—Iḡu yuku neō dupaturi dukakubirikoa, āĩmi.

Īḡū irasū āĩrĩ merāta, irigu ñaĩnugākōābu. ²⁰ Irigu irasū waamakū ĩārā, ḡuā ĩḡū buerā ĩāḡukakōābu.

—¿Nasiriro mata irigu ñaĩakōāĩ? āĩ sērēñabu Jesúre.

²¹ Jesús ḡuare yujumi:

—Diayeta musārē werea. Musā: “Marĩpu āsū irimasĩbirikumi”, āĩ ḡūñarō marĩrō ĩḡūrē buremurā, yu irigure ñaĩmakū iriaderosū musāde irimasĩrākoa. Irigure yu iriadero nemorō diasarire irimasĩrākoa. Irasirirā Marĩpue: “I buúrure dia wádiyague béoka!” āĩmakū, musā āĩrōsūta waarokoa. ²² Musā Marĩpue buremurĩ merā sērēmakū, musā sērērōsūta Marĩpu musārē irigukumi, āĩmi Jesús.

Judío masaka oparā Jesúre: “¿Noā mūrē doreri?”
āĩ sērēñadea

(Mr 11.27-33; Lc 20.1-8)

²³ Puru Jesús Marĩpuya wiigue ñajāmi. Īḡū iroque bueripoe paía oparā, gajerā judío masaka mūrā ĩḡū purogue waa, ĩḡūrē sērēñama:

—¿Noā mūrē doreri, mu irire irasirimakū? ¿Noā mūrē: “Āsū irika!” āĩrĩ? āĩma.

²⁴ Jesús ĩḡūsārē yujumi:

—Yude musārē sērēñagura. Musā yujumakū, yude musārē yujugura. ²⁵ Juan masakare deko merā wāiyemakū, ¿noā ĩḡūrē wāiyedoreḡu iriuri, Marĩpu, o masaka? āĩmi.

Īḡū irasū āĩmakū pérā, ĩḡūsā basi āsū āĩ ḡāme wereníma:

—¿Naásū āĩ yujurākuri marĩ? “Marĩpu Juārē doredi āāĩmĩ”, marĩ āĩmakū, Jesús marĩrē:

“¿Nasirirã ĩgũ weredeare b̄remubiriri m̄sã?”
 ãrĩbokumi. ²⁶ ããrĩpererã masaka: “Juan Marĩp̄ya
 kerere weredupuyudi ããrĩmĩ”, ãrĩ gũñama. Marĩ:
 “Masaka Juãrẽ wãiyedorenerã ããrĩmã”, ãrĩmakũ,
 masaka marĩ merã guabokuma, ãrĩma. ²⁷ Irasirirã
 Jesúre ãsũ ãrĩ yuj̄ma:

—Juãrẽ wãiyedoredire gua masĩbea, ãrĩma.

Ĩgũsã irasũ ãrĩmakũ, Jesús ĩgũsãrẽ ãrĩmi:

—M̄sã ȳre: “¿Noã m̄rẽ irire iridoreri?” ãrĩ
 s̄rẽñadeare ȳde m̄sãrẽ yuj̄bea, ãrĩmi.

Jesús suḡ p̄rã p̄rã keori merã buede

²⁸ Jesús irasũ ãrĩ odo, ĩgũsãrẽ keori merã buemi:

—¿Naásũ ãrĩ gũñarĩ, ȳ ãsũ ãrĩ weremakũ
 p̄rã? Suḡ p̄rã p̄rã opakumi. Suḡre ãsũ
 ãrĩkumi: “Makũ, igui otedea poogue moãgũ
 waaka!” ãrĩkumi. ²⁹ “Waabea”, ãrĩ yuj̄kumi. P̄r̄:
 “Waaḡra”, ãrĩ gũña, poogue moãgũ waakumi.
³⁰ P̄r̄ ĩgũsã paḡ gajiḡ ĩgũ magũ p̄ro waakumi.
 ĩgũ ãrãderosũta ĩgũdere: “Poogue moãgũ waaka!”
 ãrĩkumi. ĩgũ: “Jáũ”, ãrĩkereḡ, waabirikumi. ³¹ ¿Nĩĩ
 gap̄ paḡ dorerire iriyuri? ãrĩ s̄rẽñami Jesús.

—Ĩgũ moãdorep̄roriadi gap̄ iriyup̄, ãrĩ
 yuj̄ma.

Ĩgũsã irasũ ãrĩmakũ, Jesús ãrĩmi:

—M̄sãrẽ diayeta werea. M̄sã romano marã
 op̄re niyeru wajaseabosarimasãrẽ, ũma merã
 gãmebira wajatarimasã nomerẽ: “Ñerã ããrĩma”,
 ãrĩkerep̄r̄, ĩgũsã gap̄ m̄sã nemorõ Marĩp̄
 ĩgũyarãrẽ doreroguere waarãkuma. ³² Juan
 masakare wãiyedi m̄sãrẽ: “Ãsũ irika, Marĩp̄
 dorerire irirã!” ãrĩ bueḡ aarikerep̄r̄, m̄sã ĩgũ

buerire neõ b̄remubirib̄. Ìsã romano marã op̄re niyeru wajaseabosarimasã, ùma merã gãnebira wajatarimasã nome gap̄ Ìgũ buerire pérã, irire b̄remuma. Ìgũsã irasirimakũ ìakererã, m̄sã gap̄ m̄sã ñerõ iririre b̄jawere, m̄sã gãñarĩrẽ neõ gorawayubirib̄. Ìgũ buerire neõ b̄remubirib̄, ãrĩmi Jesús.

Jesús ñerã moãrã keori merã buedea

(Mr 12.1-12; Lc 20.9-19)

³³ Jesús dupaturi ãsũ ãrĩ werenemomi:

—Gaji keori merã ȳ weremakũ péka doja! Suḡ masakũ Ìgũya nikũrẽ poee opakumi. Iri poeere iguidarire otekumi. Ote odo, iri poee t̄rore s̄rĩsãkõäkumi. Iro ùtãyegue igui k̄rabipiri gobere irikumi. Wii ùmarĩ wiigãrẽ irikumi, iri poeere korerã õãrõ ìã koreburo, ãrĩgũ. Irasiri odo, gajerãrẽ iri poeere wayukumi. “Yaa oteri dukare deko merã s̄rãkoa, ȳ m̄sãrẽ iri poeere wayuri waja”, ãrĩkumi. Irasũ ãrĩ odo, gajerogue waakõäkumi. ³⁴ P̄rũ igui ñĩripoe ejamakũ, Ìgũrẽ moãboerãrẽ Ìgũya poeere moãrã p̄rogue Ìgũya oteri dukare deko merã s̄rẽdoreḡ iriukumi. ³⁵ Iri poeere moãrã gap̄ Ìgũ iriuanerã irogue ejamakũ ìãrã, Ìgũsãrẽ ñerõ irikuma. Suḡre b̄ro pá, gajiḡre wẽjẽ, gajiḡre ùtãyeri merã deakuma. ³⁶ Ìgũsã irasiriadeare péḡ, iri poee op̄ gajerã Ìgũrẽ moãboerãrẽ Ìgũ iriup̄rorianerã nemorõ iriukumi. Ìgũsã ejamakũ ìãrã, iri poeere moãrã Ìgũsãdere irasũta ñerõ irikuma doja.

³⁷ Ìgũsã irasiriadero p̄rũ, poee op̄ Ìgũ magũrẽ iriukumi. “Ȳ magũ gap̄re b̄remurãkuma”, ãrĩ gãñadikumi. ³⁸ Iri poeere moãrã gap̄ Ìgũ magũ

⁴⁵ Paía opará, fariseo bumarã iri keori merã Jesús irasũ ãrĩ weremakũ pérã: “Marĩrẽ ãrĩgũ irasũ ãrĩkumi”, ãrĩñurã. ⁴⁶ Irasirirã ãgũrẽ ñeãduadiñurã peresu irimurã. Irasũ ñeãduakererã, ãsũ ãrĩ gũñañurã: “Masaka Jesúre: ‘Marĩpuya kerere weredupuyugũ ããrĩmi’, ãrĩma”, ãrĩñurã. Irasirirã ãgũsãrẽ gũisã, Jesúre ñeãmasĩbiriñurã.

22

Jesús sugũ mojõsiari bosenu iriri keori merã buedeã

¹ Jesús dupaturi gaji keori merã ãgũsãrẽ buenemomi. ãsũ ãrĩmi:

² —Marĩpũ ãmũgasigue ããrĩgũ ãgũyarãrẽ doreri ãsũ ããrã. Su nikũ marã opu ãgũ magũ mojõsiari bosenu irikumi. ³ Irasirigũ opu ãgũrẽ moãboerãrẽ: “Yũ magũ mojõsiari bosenu ããrã aarika!” ãgũ ãrĩnerãrẽ siudoregũ iriukumi. ãgũsã siiumakũ ãgũsã gapũ: “Waabea”, ãrĩkõãkuma. ⁴ Irasirigũ opu gajerã ãgũrẽ moãboerãrẽ iriukumi doja. “Yũ siunerãrẽ ãsũ ãrĩ wererã waaka: ‘Yũre moãboerãrẽ yaarã wekũare, gajerã yaarã ejorã õãrõ diikũrãrẽ wẽjẽdoresiabũ. ããrĩpereri yũ magũ mojõsiari bosenu baaburi ãmu odosiabũ. Irasirirã: Bosebaarã aarika!’ ãrĩ wereka ãgũsãrẽ!” ãrĩ iriukumi.

⁵ ãgũ siunerã gapũ irire pékererã, bosenuãrẽ ããrã waabirikuma. Sugũ ãgũya poeegue waakõã, gajigu ãgũ moãrĩrẽ ããgũ waakõãkumi. ⁶ Gajerã gapũ opu moãboerãrẽ ñeã, pá, wẽjẽbéokõãkuma. ⁷ ãgũsã irasiririre pégũ, opu bũro guakumi. Irasirigũ ãgũyarã surarare iriukumi, ãgũsãrẽ wẽjẽanerãrẽ wajamoãdoregũ. Irasirirã ãgũyarã surara ãgũsãrẽ

wějēpeokōã, ĩgūsāya makārē soebéokōãkuma. ⁸ Pũru opũ gajerã ĩgũrē moãboerãrē ãsũ ãrĩkumi: “Yũ magũ mojõsiari bosenũmarē ãmusiabũ. Yũ siiunerã gapũ ñerã ããrĩsĩã, aaribirikuma. ⁹ Irasirirã ããrĩpererã makã dekoma maarĩgue ããrĩrãrē mũsã bokajarãrē siiurã waaka!” ãrĩkumi. ¹⁰ ĩgũ irasũ ãrĩmakũ, ĩgũrē moãboerã waa, ããrĩpererã ĩgũsã bokajarãrē: ñerãrē, õãrãrē siiu, opũya wiigue ãĩakuma. Irasirirã, ĩgũ bosenũ iriri taribure tũriakōãkuma.

¹¹ Pũru opũ ĩgũsãrē ĩãgũ ñajãgũ, sugure mojõsiari bosenũma surĩro sãñabire ĩãkumi. ¹² Irasirigũ ĩgũrē ãsũ ãrĩ sērēñakumi: “Yũ merãmũ, ¿nasirigũ mojõsiari bosenũma surĩro sãñabirikeregũ, ñajãriari mũ?” ãrĩkumi. ĩgũ irasũ ãrĩ sērēñamakũ pégu, ĩgũ gapũ yũjubirimakũ. ¹³ ĩgũ yũjubirimakũ ĩãgũ, opũ ĩgũrē moãboerãrē ãsũ ãrĩkumi: “Ĩrē ñeã, ĩgũya mojõrĩrē, guburidere sia, ãĩ wiria, naĩtĩãrõgue ĩgũrē béorã waaka! Irogue bũro pũrĩsũgũ ĩgũya guikare kũrĩduútũ oregũkumi”, ãrĩkumi, ãrĩ weremi Jesús.

¹⁴ Irasũ ãrĩ odo, ãsũ ãrĩnemomi:

—Ĩ opũ keori irirosũ Marĩpũ wãrã siiukerepũ, ĩgũ beyerã gapũ mérãgã ããrĩma, ãrĩmi.

*Romano marã opũ masakare niyeru
wajasearire Jesũre sērēñadea
(Mr 12.13-17; Lc 20.20-26)*

¹⁵ Jesús irasũ ãrãdero pũrũ, fariseo bumarã waakõãma. ĩgũrē weresãduarã: “Ĩgũrē diaye yũjubirimakũ irimurã ire sērēñarã!” ãrĩ gãme werenĩñurã. ¹⁶ Irasirirã surãyeri ĩgũsã buerire tũyarãrē, Herodeya bumarã merã Jesús pũrogue iriũñurã. ĩgũsã Jesús pũrogue ejarã, ĩgũrē ãrĩma:

—Buegu, gua mu iririkurire masia. Mu arigatoro mariro werenia. “¿Naasu gunari masaka yure?” arigunaro mariro Maripuyare diayeta igusare buea. Oparare, ubu aariradere aaripererare surosuta ia. ¹⁷ Irasirigu gare wereka! ¿Naasu gunari mu? Romano mara opu marire niyeru wajasearire mari wajarimaku, ¿ogorari, o oberi? arima Jesure.

¹⁸ Jesus gapu igusa igure nero iridurire masisa, asu arimi:

—Irigatorikura aara musa. ¿Nasirira yure nero yujumaku iriduri musa? ¹⁹ Niyeru tire musa romano mara opure wajariburi tire arika! arimi.

Igu irasu arimaku pera, sunu moari waja wataropa wajakuri tire aia. ²⁰ Igu iri tire aijamak, igusare sereni:

—I tiguere, ¿noya diapu keori, noya wai tuuyari? arimi.

²¹ —Romano mara opuya diapu keori, iguya wai tuuya, ar yuma.

Igu irasu arimaku pegu, Jesus igusare asu arimi:

—Iro mere romano mara opuya aaririre igure sika! Maripuya gapure Maripure sika! arimi.

²² Igu irasu arimaku pera, peguka, igure piriwagkoma.

Saduceo bumar, Maripu boanerare masuburire Jesure sereniadea

(Mr 12.18-27; Lc 20.27-40)

²³ Irinureta surayeri saduceo bumar Jesus purogue ejama. Igu: “Masaka boanerague masabirikuma”, ar bumer aarima. Irasirira Jesure asu arima:

24 —Buegũ, Moisés àsũ ārĩdi āārĩmĩ: “Sugũ marāpokadi pũrā marĩkeregũ ĩgũ marāpore boaweomakũ, ĩgũ pagũmũ igore dúunorēgũkumi. Irasirirā, igo merā ĩgũ pũrākũrā, ĩgũ tĩgũ dagũ pũrā irirosũta āārĩrākuma”, ārĩdi āārĩmĩ. 25 Iripoegue gũa watopeguere sugũ pũrā su mojõma pere gaji mojõ peru pērēbejarā āārĩunanerā āārĩmā. ĩgũsā tĩgũ garũ marāpokũ, pũrā marĩgũta boakõāyũpũ. Irasirigũ ĩgũ dagũ dokamũta ĩgũ marāpo āārĩdeore dúunorēyũpũ. 26 ĩgũde ĩgũ tĩgũ dagũ irirosũta pũrā marĩgũta boakõāyũpũ. ĩgũsā pērā dokamũde pũrā marĩgũta boakõāyũpũ. Irasũ dita pũrā marĩrāta boapereakõāñurā. 27 ĩgũsā pũrũ ĩgũsā marāpode boakõāyũpo pama. 28 ĩgũsā su mojõma pere gaji mojõ peru pērēbejarā ũma āārĩpererā igore marāpokũñurā. Irasirirā boanerā masāmakũ, ¿niĩno marāpogora āārĩgokuri? ārĩ sērēñama.

29 Jesús ĩgũsārē yũjũmi:

—Mũsā diaye gũñabea. Marĩpũya werenĩrĩ gojadeare, Marĩpũ turaridere masĩbea. 30 Boanerā ĩgũsā masādero pũrũ, ĩgũsā ũmũgasigue Marĩpũre wereboerā irirosũ āārĩrākuma. Iroguere marāpokũbirikuma. ĩgũsā pũrā nomedere nomesubirikuma. 31 ¿Marĩpũya werenĩrĩ gojadea pũgue boanerā ĩgũsā masāburire mũsā buebiriri? Āsũ ārĩdi āārĩmĩ: 32 “Yũ Abraham, Isaac, Jacob Opũ āārā”, ārĩdi āārĩmĩ. Irasirirā ĩgũsā boanerā āārĩkererā, Marĩpũ merā okarā āārĩma. Irasirigũ Marĩpũ okarā Opũ āārĩmi. Boanerā neõ dupaturi masābirikõāmũrā Opũ āārĩbemi, ārĩmi Jesús.

33 ĩgũ irasũ ārĩmakũ pérā, masaka: “Õārõ buemi”,

ãrĩ pégukakõãma.

*“¿Díí gapu Marĩpu doreri gaji doreri nemorõ
ããrĩrĩ?” ãrĩ sêrêñadea
(Mr 12.28-34)*

³⁴ Jesús saduceo bumarãrê ïgũsã ïgũrê sêrêñanemomasĩbirimakũ iririre pérã, fariseo bumarã nerẽma. ³⁵ Irasirigu sugu ïgũsã merãmu, Moisés gojadeare buerimasũ Jesúre diaye yujubirimakũ iridugũ, ãsũ ãrĩ sêrêñami:

³⁶ —Buegu, ¿díí gapu Marĩpu doreri gaji doreri nemorõ ããrĩrĩ? ãrĩmi.

³⁷ Jesús ïgũrê yujumi:

—Muya yujupũrã merã, mu ããrĩrikari merã, ããrĩpereri mu gũñarĩ merã Marĩpũre mu Opũre maĩka! ³⁸ I doreri, gaji nemorõ ããrĩtarinugãrĩ ããrã. ³⁹ I doreri puruma ãsũ ãrã: “Mu basi maĩrõsũta mu puro ããrĩrãrê maĩka!” ⁴⁰ Marĩ i pe dorerire irirã, ããrĩpereri Moisés doredeare, Marĩpũya kerere weredupuyunerã buedeare irirã yãa, ãrĩmi Jesús.

*“¿Noã parãmi ããrĩturiagu ããrĩrĩ Cristo?” ãrĩ
sêrêñadea
(Mr 12.35-37; Lc 20.41-44)*

⁴¹ Fariseo bumarã irogue nerẽanerã ããrĩripoe Jesús ïgũsãrê sêrêñami:

⁴² —¿Naásũ gũñarĩ musã Cristo, Marĩpu iriudire? ¿Noã magũ ããrĩrĩ ïgũ? ãrĩmi.

—Cristo, David parãmi ããrĩturiagu ããrĩmi, ãrĩ yujuma.

⁴³ ïgũsã irasũ ãrĩmakũ pégu, Jesús ïgũsãrê ãrĩmi:

—David, Cristo ñekũ ããrĩkeregũ, ¿nasirigu Õãgũ deyomarĩgũ ãgũrẽ weredorederosũta Cristore: “Yũ Opũ ããrĩmi”, ãrĩyuri? David ãsũ ãrĩ gojadi ããrĩmĩ:

⁴⁴ Marĩpũ yũ Opũre ãsũ ãrĩmi: “Õõ, yũ diaye gapũ doaka, yũ merã dorebu!

Irasiriripoe mũrẽ ãaturĩrãrẽ mũ dorerire tarinũgãnemobirimakũ irigũra”, ãrĩmi.*

⁴⁵ David, Cristo ñekũ ããrĩkeregũ, ãgũrẽ: “Yũ Opũ ããrĩmi”, ãrĩdi ããrĩmĩ. ¿Nasirigu, Cristo, David parãmi ããrĩturiagu ããrĩkerepũrũ, David ãgũrẽ irasũ ãrĩyuri? ãrĩmi Jesũs.

⁴⁶ ãgũ irasũ ãrĩrĩrẽ pãrã, neõ ãgũrẽ yũjumasĩbirima. Irasirirã gũirã, ãgũrẽ dupaturi sãrẽñanemobirima.

23

Jesũs fariseo bumarãrẽ, Moisãs gojadeare buerimasãrẽ ãgũsã ñerõ iririre weredeã

(Mr 12.38-40; Lc 11.37-54; 20.45-47)

¹ Pũrũ Jesũs masakare, gũã ãgũ buerãdere ãrĩmi:

² —Moisãs gojadeare buerimasã, fariseo bumarã, Marĩpũ Moisãre doreri pĩdeare: “Ãsũ ãrĩduaro yãa”, ãrĩ wererã ããrĩma. ³ Irasirirã ãgũsã wererire õãrõ iritũyaka mũsã! ãgũsã iririkũri gapũre ããkũĩbirikõãka! ãgũsã wererosũta iribema.

⁴ Masakare dorerã: “Ãsũ irika!” ãrĩrã, ãgũsãrẽ gajino bũro nukũrĩ kõãtãrĩrã irirosũ ããrĩmakũ yãma. Masaka ãgũsã dorerire bokatĩũbirikerepũrũ, ãgũsãrẽ neõ iritamubema, ãgũsã dorerire iriburo, ãrĩrã.

⁵ Masaka ããmakũ dita õãrĩrẽ iri ãmuma. Marĩpũya werenĩrĩ ãgũsã gojadeã pũrĩ sãrĩ kũmarĩgã gajerãya

* 22:44 Sal 110.1

nemorõ eyari kũmarĩgãrẽ ĩgũsãya diapuserorire, ĩgũsãya dukaridere siatũma, masaka ĩgũsãrẽ: “Marĩpũyare õãrõ masĩma”, ãrĩdorerã. Irasũ ããrĩmakũ, ĩgũsãya dipuru peyari gasirore gajerãya nemorõ yoari yuradari opari gasirire peyama, masaka ĩgũsãrẽ: “Marĩpure buremutarima”, ãrĩdorerã. ⁶ Bosenãrĩ ããrĩmakũ, oparã doarigue dita doadũama. Marĩ nerẽrĩ wiiriguedere ñajãrã, õãrĩ doaripẽrĩgue dita doadũama. ⁷ Makã dekoguere masakare õãrõ buremurĩ merã ĩgũsãrẽ bokatĩrĩ õãdoremakũ gããmema. Gajerãrẽ ĩgũsãrẽ: “Gũare buerã ããrĩma”, ãrĩmakũ gããmema.

⁸ ĩgũsã irasũ ãrĩkerekũrũ, mũsã gapũ masakare: “Mũsã gũare buerã ããrã”, ãrĩdorebirikõãka! Mũsã sugũ pũrãta ããrã. Yũ mũsãrẽ buegũ sugũta ããrã. ⁹ I ãmũguere neõ sugũ masakũre: “Gũarũ ããrĩmi”, ãrĩbirikõãka! ĩmũgasigue ããrĩgũ dita Marĩpũ ããrĩmi*. ¹⁰ Neõ sugũ mũsã watopegue ããrĩgũrẽ: “Marĩ opũ ããrĩmi”, ãrĩbirikõãburo. Yũ, Marĩpũ iriudi Cristo, sugũta mũsã Opũ ããrã. ¹¹ Mũsã watopegue ããrĩgũ gajerã nemorõ ããrĩgũ, mũsãrẽ moãboerimasũ irirosũ mũsãrẽ iritamugũ ããrĩgũkumi. ¹² Sugũ ĩgũ basi: “Gajerã nemorõ ããrã”, ãrĩ gũñagũnorẽ Marĩpũ ĩgũrẽ ubu ããrĩgũ dujamakũ irigũkumi. Gajigũ: “Gajerã nemorõ ããrĩbea”, ãrĩ gũñagũ gapũre Marĩpũ ĩgũsã opũ ããrĩmakũ irigũkumi.

¹³ 'Mũsã Moisés gojadeare buerimasã, fariseo bumarã irigatorikũrã ããrã. Mũsã bueri merã masakare ãmũgasigue Marĩpũ

* **23:9** Jesús irire ãrĩgũ: “I ãmũguere neõ sugũ masakũ Marĩpũ ããrĩnĩgũ irirosũ mami”, ãrĩgũ irimi.

Īgūyarārē dorerogue waabonerārē kāmutarā yāa. Mūsāde iroguere waabirikoa. Gajerā iroguere waaduarādere kāmutāa. Irasirirā ñerō tarirākoa.

14 'Mūsā Moisés gojadeare buerimasā, fariseo bumarā irigatorikurā āārā. Wapiweyarā nome wajamomakū ĩā, ĩgūsāya wiirire ēmanokōāa. ĩgūsārē bopoñabirikererā, yoaripoe Marīpure sērē ĩmugatoa, masaka mūsārē: “Marīpure oārō buremuma”, ārīburo, ārīrā. Irasirirā ñerō tarirākoa. Marīpure mūsārē gajerā nemorō wajamoāgukumi.

15 'Mūsā Moisés gojadeare buerimasā, fariseo bumarā irigatorikurā āārā. Dia wādiyague taribuja, yoaroma makārīgue mūsā buerire tuyabure āmarā waāa. ĩgūrē boka, mūsā bueri merā ĩgūrē mūsā nemorō perebiri peamegue waabu āārīmakū yāa. Irasirirā ñerō tarirākoa.

16 'Mūsā koye ĩāmerā gajerārē tūādupuyuwāgāmasīmerā irirosū masakare Marīpure keoro buebea. Irasirirā ñerō tarirākoa. ĩgūsārē āsū ārī buea: “Sugū: ‘Marīpure wii merā āsū irigura’, ārī wāīpeodeare iribirimakū, waja opabemi”, ārā. Idere āsū ārī buea: “Gajigu: ‘Marīpure wiima oro merā āsū irigura’, ārī wāīpeodeare iribirimakū, waja opami”, ārā. 17 Koye ĩāmerā irirosū Marīpure diaye gūñamerā, pémasīmerā āārā mūsā. Marīpure ĩgūya wiire, iri wiima oro nemorō oārī āārītarinugāmakū yāmi. Irasirigū marīrē, ¿dī gapure buremurī merā gūñamakū gāāmerī, orore, o ĩgūya wii gapure? 18 Mūsā idere āsū ārī buea: “Sugū: ‘Marīpure wiima soepeoro merā āsū irigura’, ārī wāīpeodeare iribirimakū, waja opabemi”, ārā. Idere āsū ārī

buea: “Gajigu: ‘Iri soepeoro weka peodea merã ãsũ irigũra’, ãrĩ wãipeodeare iribirimakũ, waja opami”, ãrã. ¹⁹ Koye ããmerã irirosũ Marĩpũyare diaye gũñamerã, pémasĩmerã ããrã musã. Marĩpũ ãgũya wiima soepeorore, marĩ iro weka peodea nemorõ õãrĩ ããrĩtarinugãmakũ yãmi. Irasirigu marĩrẽ, ¿diĩ gapũre bũremurĩ merã gũñamakũ gããmerĩ, soepeorore, o iro weka peodea gapũre? ²⁰ Irasirigu sugũ: “Marĩpũya wiima soepeoro merã ãsũ irigũra”, ãrĩ wãipeogu, ããrĩpereri iri soepeoro weka peyari merãdere wãipeogu irikumĩ. ²¹ Sugũ: “Marĩpũya wii merã ãsũ irigũra”, ãrĩ wãipeogu, Marĩpũ iri wiigũ ããrĩgũ merãdere wãipeogu irikumĩ. ²² Sugũ: “Ûmugasima merã ãsũ irigũra”, ãrĩ wãipeogũde, Marĩpũ irogue Opũ doarogue doagũ merãdere wãipeogu irikumĩ.

²³ ’Musã Moisés gojadeare buerimasã, fariseo bumarã irigatorikũrã ããrã. Irasirirã ñerõ tarirãkoa. Musã oteri mutãrĩgã: menta, anís, comino wãĩkũri baari morẽĩnorẽ sea neeõ, dukawa, pe mojõma diruri irikoa. Sudiru Marĩpũya wiigũ ããakoa, ãgũ dorerire irimurã. Irasirikererã, iri nemorõ õãrĩ gapũre iribea. Diayema iririre, gajerãrẽ bopoñarĩ merã ããrĩrẽ, Marĩpũre bũremurĩrẽ neõ iribea. Irasirirã musã oterire Marĩpũre sĩduũro marĩrõ diayemadere irika! Gajerãrẽ bopoñaka! Marĩpũre bũremuka! ²⁴ Koye ããmerã gajerãrẽ tũãdupuyuwãgãmasĩmerã irirosũ masakare Marĩpũyare keoro buebea. ããrĩpereri musã doreri gapũre irikererã, iri nemorõ doreri gapũre neõ iribea.

²⁵ ’Musã Moisés gojadeare buerimasã, fariseo

bumarã irigatorikurã ããrã. Irasirirã ñerõ tarirãkoa. Musã masaka iũrõgue dita õãrõ irirã, soropa weka gapu dita õãrõ koeadeapa irirosũ ããrã. Irasirirã musã basi wári opaduarã gajerãyare yajarã, iripa poekague koeña marĩrĩpa gurari utariripa irirosũ ããrã. ²⁶ Musã fariseo bumarã, koye iãmerã irirosũ, Marĩpuyare pémasĩmerã ããrã. Irasirirã musã gũñarĩrẽ gorawayupurorika, soropa poeka gapure õãrõ koeadeapa irirosũ ããrĩmurã. Irasirirã, soropa weka gapudere õãrõ koeadeapa irirosũ ããrĩrãkoa.

²⁷ Musã Moisés gojadeare buerimasã, fariseo bumarã irigatorikurã ããrã. Irasirirã ñerõ tarirãkoa. Musã masãgoberi irirosũ ããrã. Masaka, iri masãgoberire ütã majĩrĩ boreri merã õãrõ wũkãdea majĩrĩ merã biamakũ iãrã: “Õãrõ deyoa”, ãrĩ iãma. Iri õãrõ deyokerepuru, poekague boanerãya gõãrĩ, ããrĩpereri ñerĩ boadea sãñakoa. ²⁸ Musãde i irirosũta ããrã. Masaka musãrẽ iãmakũ, õãrã irirosũ ããrã. Irasũ ããrĩkererã, poekague musã gũñarĩguere ñerĩrẽ opataria. Irasirirã irigatorikurã, ñerõ iririkurã ããrã.

²⁹ Musã Moisés gojadeare buerimasã, fariseo bumarã irigatorikurã ããrã. Irasirirã ñerõ tarirãkoa. Musã, iripoegue marã Marĩpuya kerere weredupuyunerãya masãgoberire õãrõ ãmua. Gajerã õãrõ irinerãya masãgoberi weka weanúdeadere õãrõ ãmua. ³⁰ ãmu odo, ãsũ ãrĩ werenía: “Marĩ ñekūsãmarã darã Marĩpuya kerere weredupuyunerãrẽ wẽjẽnerã ããrĩmã. Gua iğũsã ããrĩdeapoegue ããrĩnerã tamerã iğũsãrẽ wẽjẽtamubiribokuyo”, ãrã. ³¹ Musã irire irasũ

ãrĩrã, musã basita: “Gua Marĩpuya kerere weredupuyunerãrẽ wějẽnerã parãmerã ããrĩturiarã ããrã”, ãrĩrã yáa. ³² Irasirirã musã ñekūsãmarã ñerõ iripuroriwãgãriderosũta iriyuwarikukõãka musãde!

³³ 'Musã ñerõ iririkurã ãña irirosũ ããrã. Musã ñerõ iriri waja Marĩpu musãrẽ peamegue béoburire neõ duribirikoa. ³⁴ Irasirigu yu musã purogue Marĩpuya kerere weredupuyurãrẽ, ãgũyare masĩrãrẽ, musãrẽ buerimasãdere iriugura. Yu irasũ iriukerepuu, musã gapu surãyerire wějẽrãkoa. Gajerãrẽ curusague pábiatú wějẽrãkoa. Gajerãrẽ musã nerẽrĩ wiirigue tãrã, noó ãgũsã waarĩ makãrĩ waamakũ tũyagorenarãkoa ãgũsãrẽ ñerõ iriduarã. ³⁵ Irasirirã ããrĩpererã masaka õãrãrẽ wějẽdea waja, musã waja opáa. Musã ñekūsãmarã Abel diayemarẽ iridire wějẽpuroriwãgãrirã, Zacarías Berequías magũguere wějẽtũnunerã ããrĩmã. ãgũrẽ Marĩpuya wiima soepeoro Marĩpu ããrĩrĩ taribu watopegue wějẽnerã ããrĩmã. ³⁶ Diayeta musãrẽ werea. ããrĩpererãrẽ ãgũsã wějẽdea waja dapora marã wajakurãkuma.

Jesús Jerusalén marãrẽ bujawereri merã were-dea

(Lc 13.34-35)

³⁷ 'Musã Jerusalén marã, Marĩpuya kerere weredupuyurãrẽ wějẽkõãa. Marĩpu iriunerãrẽ ãtãyeri merã dea wějẽa. Wãri yu musãrẽ ãgãbo igo pũrãrẽ igoya kẽdupuri merã neeõnũrõsũ neeõnú koredudibu. Musã gapu yu irasũ irimakũ neõ gããmebiribu. ³⁸ Irasiriro musã ããrĩrĩ makã,

béodea makã dujarokoa. ³⁹ Diayeta musãrẽ werea. Dapora merãta musã yãre ãñemobirikoa. Pũrugue musã: “Marĩpũ iriudi õãtarigũ ããrĩmi, õãrõ aariburo”, ãrĩrãgue, yãre dupaturi ããrãkoa doja, ãrĩmi Jesús.

24

*Jesús: “Marĩpũya wii béosũrokoa”, ãrĩ weredea
(Mr 13.1-2; Lc 21.5-6)*

¹ Jesús Marĩpũya wiigũe ããrãdi wiriadero pũrũ, gũã ãgũ buerã ãgũ pũro waa, ãsũ ãrĩbũ:

— Ìãka i wiire! Õãrĩ wii, wãri wii ããrã, ãrĩbũ.

² Jesús gapũ yũjũmi:

— Musã i wiire daporare ããdãã. Diayeta musãrẽ werea. I wiima ããrĩpereri musã ããdea, i ãtãyeride mutãdijapereakõãrokoa. Neõ suye ãtãye gajiyẽ weka weamũrĩadeade dujabirikoa, ãrĩmi.

*Jesús: “I ãmũ pereburi dupuyuro ãsũ waarokoa”,
ãrĩ weredea
(Mr 13.3-23; Lc 21.7-24; 17.22-24)*

³ Pũrũ Olivos wãĩkũri buúrũgue eja, irogue doami Jesús. Iro ãgũ doamakũ, gũã ãgũ buerã ãgũ pũroque eja, gajerã péberogue sãrẽñabũ:

— Gũare wereka! ¿Naásũ ããrĩmakũ, mũ ããrãderosũ waarokuri? ¿Ñeéno iri ãmũgũkuri, mũ dupaturi aarigũ? ¿Naásũ waarokuri, i ãmũ pereburi dupuyuro? ãrĩbũ.

⁴ Jesús yũjũmi:

— Õãrõ pémasĩka! Gajerã musãrẽ ãrĩgatorire pébirikõãka! ⁵ Wãrã ãrĩgatorimasã aarĩrãkuma. “Marĩpũ iriudi, Cristo ããrã yũ”, ãrĩrãkuma. Ìgũsã ãrĩgatomakũ pérã, wãrã masaka ãgũsãrẽ

buremurākuma. ⁶ Masaka musā puro gāmewējērīrē pérā, yoarogue marā gāmewējērī kerere pérā, gukabirikōāka! Irasūta waarokoa. Irasū waakerepuru, i umu pereburo duyarokoa dapa. ⁷ Su bumarā gaji bumarā merā gāmekēārākuma. Su nikū marā gaji nikū marā merā gāmewējērākuma. Masaka wārā uaboari merā boarākuma. Gajerā pūrīriku ñerō tarirākuma. Wári makārīguere nikū ñomerokoa. ⁸ I āārīpereri merā masaka ñerō taripuroriwāgārīrākuma.

⁹ 'Irasirirā gajerā musārē ñeā, āia, oparāguere ñerō iridorerā wiarākuma. Musārē wējērākuma. Yure buremurī waja āārīpererā i umu marā musārē iāturi doorākuma. ¹⁰ Irasū waaripoe wārā yure buremuadinerā buremuduúrākuma. Irasirirā gāme iāturi doo, ĩgūsā merāmarā āārādinerārē ĩgūsārē iāturirāguere wiarākuma. ¹¹ Wārā: “Marīpuya kerere weredupuyurimasā āārā”, ārīgatorākuma. Irasirirā wārā masaka ĩgūsārē buremurākuma. ¹² Masaka iro dupuyuro ñerō iridero nemorō ñerō irirākuma. Irasirirā wārā ĩgūsā gāme maīrīrē pirirākuma. ¹³ ĩgūsā musārē ñerō irikerepuru, musā yure neō buremuduúbirimakū, Marīpu musārē taugukumi, ĩgū puro āārīnīkōāburo, ārīgū. ¹⁴ Marīpuyare wererā āārīpererā i umu marārē ĩgūyarārē doregu āārīrī kerere wererākuma, āārīpereri bumarā irire masīburo, ārīrā. ĩgūsā āārīpererā iri kerere péperedero puru, i umu pererokoa.

¹⁵ 'Iripoegue Marīpuya kerere weredupuyudi Daniel i umu pereburo dupuyuro waaburire āsū ārī gojadi āārīmí: “Ñegū Marīpure iāturigu

Marĩpũya wii ñerĩ marĩrĩ wiigue ñajãgũkumi”, ãrĩ gojadi ããrĩmĩ. ((Irasirirã iri wiigue ãĩgũ ããrĩmakũ ããrã, i pũrẽ buerãno: “I ãmũ pereburo yãa”, ãrĩ masĩrãkuma.)) ¹⁶ Ñegũ iroque ããrĩmakũ ããrã, Judea nikũ marã buurĩgue ãmaduriburo. ¹⁷ Sugũ ãĩgũya wii wekague ããrĩgũ, wii poekague ãĩgũyare ãĩgũ ñajãbita ãmaduriburo. ¹⁸ Sugũ ãĩgũya poeque ããrĩgũde, ãĩgũya surĩre wiigue ãĩgũ dujãabita ãmaduriburo. ¹⁹ Irasũ waarĩnrĩrẽ nijĩpagosã nome, ãĩgũsã pũrã mirĩrãgã oparã nomede ñerõ tarirãkuma. ²⁰ Irasirirã Marĩpũre ãsũ ãrĩ sãrẽka: “Puĩbure, siuñajãrĩnũ* ããrĩmakũ, gũare i irasũ waabirikõãburo”, ãrĩka ãĩgũrẽ! ²¹ Irasũ waarĩnrĩrẽ masaka bũro ñerõ tarirãkuma. Marĩpũ i ãmurẽ irĩpũroridero pũrũre masaka ñerõ taridero nemorõ ñerõ tarirãkuma. I ãĩgũsãrẽ ñerõ waaburi neõ dupaturi irasũ waanemobirikoa. ²² Irasirigũ Marĩpũ masakare i ñerõ waarĩre: “Yoaripoe waabirikõãburo”, ãrĩgũkumi. ãĩgũ irasiribirimakũ, neõ sugũ masakũ taribiribokumi. Irasirigũ ãĩgũ beyenerãrẽ bopõñasã, ãĩgũsãrẽ ñerõ waarĩre: “Iropãta waaburo”, ãrĩgũkumi.

²³ Gajerã mũsãrẽ: “ããka! Õõta Cristo ããrĩmĩ”, ããrĩmakũ pãrã, o gajerã mũsãrẽ: “Cristo sõõgue ããrãmĩ”, ããrĩmakũ pãrã, bũremubirikõãka! ²⁴ Wãrã ãrĩgatorimasã aarĩrãkuma. Surãyeri: “Yũ Cristo ããrã”, ããrĩrãkuma. Gajerã: “Marĩpũya kerere weredupuyurimasã ããrã”, ããrĩrãkuma. Mũsãrẽ ãĩgũsã ãrĩgatorire bũremudorerã, wãri gajino iri ãmurãkuma. Irasirikererã, Marĩpũ beyenerãrẽ ãĩgũrẽ

* **24:20** Judío masaka siuñajãrĩnũ, sãbado ããrã.

buremuduúmakū irimasībirikuma. ²⁵ Iri waaburi dupuyuro yu mūsārē weresiáa, irire masīburo, ārīgū. ²⁶ Irasirirā gajerā masaka mūsārē: “Cristo sōō masaka marīrōgue āārāmi”, ārīmakū pérā, iārā waabirikōāka! Gajerā mūsārē: “Īāka! I wiima taribugue āārīmi”, ārīmakū pérā, īgūsārē buremubirikōāka! ²⁷ Yu āārīpererā tīgū gūñaña marīrō i ūmugue dupaturi aarigukoa. Ūmarōgue, abe mūrīro gapu, īgū űajārō gapu bupu miārō irirosū aarigukoa. ²⁸ Mimua nerēmakū iārā, masaka sugu waibu boadi āārīrōrē masīkuma. I irirosū yu aarimakū iārā, īgūsā wajamoāsūburire masīrākuma, ārī weremi Jesús.

Jesús āārīpererā tīgū: “Āsū aarigukoa”, ārī were-dea

(Mr 13.24-37; Lc 21.25-33; 17.26-30, 34-36)

²⁹ Irasū ārī odo, guare āsū ārīnemomi:

—Masaka űerō taririnarī purata abe ūmumu naītīākōāgukumi. Abe űamimu boyonemobirikumi. Neñukā ūmugasigue āārīrā yuridjarirākuma. Ūmarōgue marā turarāde naradari merā béosūrākuma. ³⁰ Irasū waaripoere masaka yu āārīpererā tīgū ūmugasigue merā aarimakū iārākuma. Irasirirā āārīpererē i ūmuma makārī marā yu wāri Marīpu turari merā, īgū gosewasiriri merā mikāyebori weka aarimakū iārā, gūirā orerākuma. ³¹ Yu aarigú, yure wereboerārē āārīperero i ūmuguere iriugukoa. Puridiru buro busumakū, īgūsā yu beyenerārē āārīpererogue āārīrārē neōrākuma.

³² 'Ire musã masĩburo, ãrĩgũ, higeragũ keori merã weregũra. Irigũ pũ maamamakũ ãrã: “Borori waaburo mérõgã duyãa”, ãrĩ masĩa. ³³ Irigũ waarõsũta i ããrĩpereri yũ ãrĩrĩ irasũ waamakũ ãrã: “Cristo dupaturi aariburo mérõgã duyãa”, ãrĩ masĩrãkoa. ³⁴ Diayeta musãrẽ werea. I ããrĩpereri yũ ãrĩrĩ, dapora marã pereburo dupuyuro irasũ waarokoa. ³⁵ Ɖmugasi, i nikũde pereakõãrokoa. Yũ werenĩrĩ gapũ neõ perebirikoa. ããrĩpereri yũ ãrĩrõsũta waayuwarikũrokoa.

³⁶ Yũ dupaturi aariburinãrẽ, iri horare neõ sugũ masĩbirikumi. Marĩpũre wereboerã ãmugasigue ããrĩrãde masĩbema. Yũ Marĩpũ magũde masĩbea. Yũpũ sugũta masĩmi.

³⁷ 'Noé ããrĩdeapoe marãrẽ waaderosũta yũ ããrĩpererã tĩgũ aariburo dupuyurogãrẽ waarokoa. ³⁸ Iripoere i nikũ Marĩpũ miũburo dupuyuro masaka õãrõ baa, iirĩ, mojõsia, ãgũsã pũrã nomerẽ nomesu ããrĩrikũnerã ããrĩmã. Noesã doódirugue ñajãrĩnugedere irasũta irinĩkõãnerã ããrĩmã. ³⁹ Gũñaña marĩrõ merã wãro deko merẽ, i nikũ mirĩpereakõãdero ããrĩbũ. ãgũsãde mirĩpereakõãnerã ããrĩmã. Irasũta yũ ããrĩpererã tĩgũde gũñaña marĩrõ merã i ãmuguerẽ dupaturi aarigũkoa. ⁴⁰ Irasũ waaripoere pẽrã poeegue moãrã ããrĩrãkuma. Sugũ yũre bũremugũ ãĩãsũgũkumi. Gajigũ yũre bũremubi irogueta béowãgãũgũkumi. ⁴¹ Nomede pẽrã nome ojodũka biurã ããrĩrãkuma. Sugo yũre bũremugõ ãĩãsũgũkumo. Gajego yũre bũremubeo irogueta béowãgãũgũkumo.

⁴² 'Õãrõ pémasĩka! Yũ musã Opũ dupaturi aariburi horare neõ masĩbea musã. ⁴³ Ire õãrõ

masĩka! Wii opu ĩgũya wiire sugu yajarimasũ ñami merã ejaburi horare masĩgũ, kãrĩrõ marĩrõ korekumi, ĩgũya wiire ñajãburire kãmutabu. ⁴⁴ Yu ããrĩpererã tĩgũ gũñaña marĩrõ aarigũkoa. Irasirirã, wii opu irirosũ musãde yu aariburire õãrõ yũro gããmea, ãrĩmi Jesũs.

*Jesũs pẽrã moãboerimasã keori merã buedea
(Lc 12.41-48)*

⁴⁵ Pũru Jesũs gaji keori merã guare buenemomi:

—Sugu moãboegu ĩgũ opure buremugũ, pẽmasĩgũ ãsũ irikumi. ĩgũ opu gajerogue waagũ, ĩgũrẽ ĩgũya wiire gajerãrẽ ĩgũrẽ moãboerãrẽ koredoregu pĩkumi. Irasirigu ĩgũrẽ ĩgũsãrẽ baarire keoro siiu baadoregu pĩkumi. ⁴⁶ Irasirigu ĩgũ opu ĩgũya wii goedujajamakũ ĩãgũ, ĩgũrẽ moãboegu ĩgũ dorederosũta iridi ããrĩsĩã, usuyakumi.

⁴⁷ Diayeta musãrẽ werea. ĩgũ pĩderosũta ĩgũ keoro irideare ĩãgũ, ĩgũ opu ĩgũrẽ ããrĩpereri ĩgũyare koredoregu pĩgũkumi. ⁴⁸⁻⁴⁹ ĩgũrẽ moãboegu ñegũ gapu ãsũ irikumi. “Yu opu mata goebirikumi”, ãrĩ gũñagũ, gajerã ĩgũ opure moãboerãrẽ ñerõ pãbira, mejãrikurã merã iiri baagorenakumi.

⁵⁰ ĩgũ irasirigorenarĩnrẽ gũñaña marĩrõ ĩgũ opu goejakumi. ĩgũrẽ moãboegu gapu: “Ĩgũ iri hora goegũkumi”, ãrĩ masĩbirikumi. ⁵¹ ĩgũ opu goejagu ĩgũrẽ moãboegu ñerõ irideare pẽgu, ĩgũrẽ buru wajamoãgũkumi. Irasirigu irigatorikurãrẽ bẽrogue ĩgũrẽ bẽogũkumi. Iroguere ĩgũ buru pũrĩsũgũ ĩgũya guikare kũrĩduútũ oregũkumi, ãrĩmi Jesũs.

25

Jesús pe mojõmarã maamarã nome keori merã buedea

¹ Pꝛꝛꝛ Jesús dupaturi keori merã guare ãsũ ãrĩ buemi doja:

—Marĩꝛꝛ ãmꝛgasigue ããrĩgũ ãgũyarãrẽ doreri ãsũ ããrã. Pe mojõmarã nõome ããrĩkuma. Su ñami ãgũsãya sããgori duparu merã mojõsiadire bokatĩrĩrã waakuma. ² Su mojõmarã nome sããgori duparu ãgũsã ããburire õãrõ ãmuyubirikuma. Gajerã su mojõmarã nome gapꝛ ãgũsã ããburire õãrõ ãmuyukuma. ³ ãmuyumerã nome ãgũsãya sããgori duparure ããakererã, ãgũsã gorawayuburire uye ããabirikuma. ⁴ ãmuyurã nome gapꝛ ãgũsãya sããgori duparure ãĩ, gaji uye ãgũsã gorawayuburire ããakuma. ⁵ Irasirirã, mojõsiadi mata ejabirimakũ, ãgũsãrẽ wũja ejamakũ kãrĩakõãkuma. ⁶ Pꝛꝛꝛ ñami deko ããrĩmakũ, gajerã masaka: “Mojõsiadi aarisiami. ãgũrẽ bokatĩrĩrã aarika!” ãrĩ gainĩmakũ pẽkuma. ⁷ ãgũsã gainĩmakũ pẽrã, yobe, ãgũsãya sããgori duparure ãmukuma. ⁸ Uye gorawayuburire ããabiranerã nome gapꝛ, gajerã gaji uye ãããnerã nomerẽ ãsũ ãrĩkuma: “Guaya sããgori duparu yariro yãa. Irasirirã mërõgã mũsãya uye gũadere sĩka!” ãrĩ sërẽadikuma. ⁹ ãmuyuanerã nome gapꝛ ãsũ ãrĩ yũjukuma: “Guaya uye mũsãrẽ sĩmakũ, mũsãrẽ, gũadere ejabiribokoa. Irasirirã uye duarã pꝛo mũsã basi wãjarirã waaka!” ãrĩkuma. ¹⁰ Irasirirã ãmuyubiranerã nome uye wãjarirã waakõãkuma. ãgũsã waadero pꝛꝛꝛ, mojõsiadi ejakumi. ãgũ ejamakũ ããrã, ãmuyuanerã nome

gapu ĩgũrẽ bokatĩrĩkuma. Irasirirã ĩgũ merã bosenu iriri wiigwe ĩarã ñajãkõãkuma. ĩgũsã ñajãperemakũ, iri wii marã disipurore biakõãkuma. ¹¹ Purugue ãmuyubiranerã nome gapu ejakuma. “Gua Opu, guadere tũpãsooka!” ãrĩkuma. ¹² ĩgũsã irasũ ãrĩmakũ pẽgu, mojõsiadi ãsũ ãrĩ yujukumi: “Diayeta yu musãrẽ masĩbea”, ãrĩkumi ĩgũsã nomerẽ, ãrĩ weremi Jesũs.

¹³ Irasũ ãrĩ odo, guare ãrĩmi:

—Yu ããrĩpererã tĩgũ dupaturi aariburinãrẽ, iri horadere neõ masĩbea musã. Irasirirã ãmuyunerã nome mojõsiadire bokatĩrĩrã waamurã ĩgũsãya sĩagori duparure ãmuyuderosũ musãde yu aariburire õãrõ ãmuyuka! ãrĩmi Jesũs.

Jesũs sugu opu ĩgũrẽ moãboerãrẽ niyeru sĩrĩ keori merã buedea

¹⁴ Irasũ ãrĩ odo, gaji keori merã guare ĩgũ buerãrẽ buenemomi doja:

—Marĩpu ĩgũyarãrẽ doregu, sugu wii opu irirosũ ããrĩmi. Wii opu gaji nikũgue waabu, ĩgũrẽ moãboerãrẽ siiu, ĩgũya niyerure koredoregu pĩkumi.

¹⁵ ’Irasirigu, ĩgũsãrẽ: “Õõpã merã wajatanemorãkuma”, ãrĩ ĩãmasĩsĩa, ĩgũya niyeru wajapari tirire dukawakumi. Sugure su mojõma tiri, gajigure pe ti, gajigure su ti sĩkumi. ĩgũsãrẽ sĩ odo, waakõãkumi. ¹⁶ Irasirigu su mojõma tiri opagu, mata iri tiri merã gajino wajari, dua, gaji su mojõma tiri wajatanemokumi. Irasirigu pe mojõma tiri opakumi. ¹⁷ Pe ti opagude irasũta gaji pe ti wajatanemokumi. Irasirigu wapikari tiri

opakumi. ¹⁸ Su ti opag_u gap_u yebague gobe má, iri gobegue ĩgũ op_u sñadea tire yáapíkõākumi.

¹⁹ Yoadero p_u_u, wii op_u goekumi. Goeja, ĩgũya niyeru tiri merã ĩgũsã wajatanemodeare âmubu, ĩgũrẽ moãboerãrẽ siiukumi. ²⁰ Irasirig_u su mojõma tiri sñsũdi ĩgũ op_u p_urogue eja, pe mojõma tiri ĩgũrẽ wiakumi. “Y_u op_u, su mojõma tiri y_ure sñb_u m_u”, ãrĩkumi. “Ĩãka! Iri tiri merã gaji su mojõma tiri wajatanemob_u”, ãrĩkumi ĩgũ op_ure. ²¹ ĩgũ irasũ ãrĩmakũ pég_u, ĩgũ op_u ãrĩkumi: “Õãgoráa. M_u y_ure moãboeg_u õãgũ ããrã. Y_u dorederosũta y_u méréogã m_urẽ pídea merã õãrõ iriyo. Irasirig_u wári yaare koredoreg_u píg_ura. Y_u merã ããrĩgũ, usuyari merã ããrĩka!” ãrĩkumi ĩgũ op_u ĩgũrẽ. ²² P_u_u pe ti sñsũdide ĩgũ op_u p_urogue eja, ĩgũrẽ ãsũ ãrĩkumi: “Y_u op_u, pe ti y_ure sñb_u m_u. ĩãka! Iri tiri merã gaji pe ti wajatanemob_u”, ãrĩkumi. ²³ ĩgũ irasũ ãrĩmakũ pég_u, ĩgũ op_u ãrĩkumi: “Õãgoráa. M_u y_ure moãboeg_u õãgũ ããrã. Y_u dorederosũta y_u méréogã m_urẽ pídea merã õãrõ iriyo. Irasirig_u wári yaare koredoreg_u píg_ura. Y_u merã ããrĩgũ, usuyari merã ããrĩka!” ãrĩkumi ĩgũ op_u ĩgũrẽ.

²⁴ P_u_u su ti sñsũdi gap_u, ĩgũ op_u p_urogue eja, ĩgũrẽ ãsũ ãrĩkumi: “Y_u op_u, m_urẽ moãboerãrẽ b_uro turaro merã moãdoreg_u ããrã. M_u basi moãbirikereg_u, ĩgũsãrẽ oterire otedore, ĩgũsãrẽ oteri dukare seadore, irire m_u basita opáa. M_urẽ moãboerãya moãrĩ merã wajatarire m_u basita opáa. Irire masĩa y_u. ²⁵ Irasirig_u m_urẽ gũig_u, yebague gobe má, iri gobegue m_uya niyeru tire yáapíkõãb_u. ĩãka! I ti ããrã m_uya niyeru ti”, ãrĩkumi

Īgũ opure.

²⁶ Īgũ irasũ ārĩmakũ pégu, Īgũ opũ ārĩkumi: “Mũ yure moãboegu ñegũ āārã. Téríkugũ āārã. Mũ yure āsũ ārã: ‘Mũ basi moãbirikeregu, mũrẽ moãboerãrẽ oterire otedore, Īgũsãrẽ oteri dukare seadore, irire mũ basita opáa. Mũrẽ moãboerãya moārĩ merã wajatarire mũ basita opáa. Irire masĩa yũ’, ārã mũ yure. ²⁷ Mũ irasũ ārĩgũ, ħnasirigũ, yũ mũrẽ sĩdea tire niyeru duripĩri wiigũ duripĩbiriri? Irogue duripĩmakũ, i wii moārã iri ti merã wáro wajatanemobosabokuma mũrẽ. Irasirigũ, yũ goejamakũ, mũ yure Īgũsã iriri merã wajatanemobosadeare wiaboakuyo”, ārĩkumi Īgũ opũ Īgũrẽ. ²⁸ Irasũ ārĩ odo, gajerãrẽ irogue āārĩrãrẽ ārĩkumi: “Īgũrẽ niyeru tire ěma, pe mojõma tiri opagu gapure sĩka! ²⁹ Sugũ wári opagu sĩnemosũgũkumi. Irasirigũ Īgũ wári opadero nemorõ opagũkumi. Gajigũ opabi Īgũ mérĩgã opadideare ěmapeokõāsũgũkumi. ³⁰ Īĩ yure moãboegu keoro iribire naĩtĩrõgue béokõaka! Iroguerẽ bũro pũrĩsũgũ Īgũya guikare kũrĩduútũ oregũkumi”, ārĩkumi Īgũsã opũ, ārĩ weremi Jesús.

Jesús i mũmũ marãrẽ wajamoãburire weredea

³¹ Irasũ ārĩ odo, gũare ārĩnemomi:

—Yũ āārĩpererã tĩgũ, āārĩpererã yure wereboerã merã i mũmũ marãrẽ doregu aarigũ, gosewasiriri merã Opũ doarogue doagũkoa. ³² Yũ irogue doamakũ, yure wereboerã āārĩpereri buri marã masakare yũ diaye neeõrãkuma. Īgũsãrẽ neeõ odomakũ, sugũ ejorã koregu ovejare, cabrare boje dukawanúrõsũ yũ Īgũsãrẽ dukawanúgũkoa.

33 Yure buremurārē oveja irirosū āārīrārē yu diaye gapu nūguko. Yure burenumerārē cabra irirosū āārīrārē yu kúgapu nūguko. 34 Yu irasiridero puu, yu āārīpererā Opu, yu diaye gapu nírārē āsū ārī wereguko: “Yupu musārē ōārō irisiami. I ūmurē irigueta musāya āārīburire ĩgūyarārē doreroguere āmuyusiami. Irasirirā ĩgū merā āārīrā aarika! 35 Yu uaboamakū ĩārā, musā yure baari ejobu. Yu űemesibumakū, musā yure iiriri tīābu. Yu musā puo gāmeñajāgū ejamakū, yure kārīrō wayubu. 36 Surí marīgū yu āārīmakū ĩārā, musā yure suríre sābu. Pūrīrikumakū, musā yure ĩārā ejabu. Peresugue yu āārīmakūdere yure ĩārā ejabu”, ārīguko. 37 Yu irasū ārīmakū pérā, yu diaye gapu nírā Yupu: “Ōārā, waja opamerā āārīma”, ārī ĩānerā yure sērēñarākuma: “Gua Opu, ¿naásū āārīmakū, mu uaboamakū gua murē baari ejobu? ¿Naásū āārīmakū, mu űemesibumakū murē iiriri tīārī? 38 ¿Naásū āārīmakū, mu gua puo gāmeñajāgū ejamakū, kārīrō wayuri? ¿Naásū āārīmakū, mu surí marīgū āārīmakū gua murē surí sārī? 39 ¿Naásū āārīmakū, mu pūrīrikumakū, o peresugue mu āārīmakūdere gua murē ĩārā ejari?” ārīrākuma yure. 40 ĩgūsā irasū ārīmakū pégu, yu āārīpererā Opu, ĩgūsārē āsū ārī yu ju guko: “Diayeta musārē werea. Musā sugu yaarā watopegue āārīpererā nemorō ubu āārīgūrē ōārō irirā, yureta ōārō irirā iribu”, ārīguko ĩgūsārē.

41 ĩgūsārē irasū ārī odo, yu kúgapu nírārē āsū ārī wereguko: “Yupu wajamoāsūmurā āārā musā. Yu puore wirika! Perebiri peamegue waaka! Yupu iri peamerē wātēa opu, ĩgūyarā

merã ããrĩburore ãmuyusiami. ⁴² Y_u _uaboamakũ ããrã, m_usã y_ure baari ejobirib_u. Y_u ñemesibumakũ, m_usã y_ure iirĩri tĩãbirib_u. ⁴³ Y_u m_usã p_uro gãmeñajãgũ ejamakũ, y_ure kãrĩrõ wayubirib_u. Surĩ marĩgũ y_u ããrĩmakũ, m_usã y_ure surĩ sãbirib_u. Y_u pũrĩrikumakũ, peresugue y_u ããrĩmakũdere m_usã y_ure ããrã ejobirib_u”, ãrĩg_ukoa ãgũsãrẽ. ⁴⁴ Y_u irasũ ãrĩmakũ pérã, ãgũsã y_ure sãrẽñarãkuma: “G_ua Op_u, ¿naásũ ããrĩmakũ, m_u _uaboamakũ, ñemesibumakũ, g_ua p_uro gãmeñajãgũ ejamakũ, surĩ opabirimakũ, pũrĩrikumakũ, peresugue m_u ããrĩmakũ g_ua m_urẽ iritamubiriri?” ãrĩrãkuma y_ure. ⁴⁵ ãgũsã irasũ ãrĩmakũ, y_u ããrĩpererã Op_u ãgũsãrẽ ãsũ ãrĩ wereg_ukoa: “Diayeta m_usãrẽ werea. M_usã sug_u yaarã watopegue ããrĩpererã nemorõ ubu ããrĩgãrẽ iritamumerã, y_ureta iritamumerã irib_u”, ãrĩg_ukoa ãgũsãrẽ. ⁴⁶ P_ur_u ãgũsã perebiri peamegue wajamoãsũrãkuma. Y_up_u: “Õãrã, waja opamerã ããrĩma”, ãrĩ ããnerã gap_u ãgũ p_uroguere perebiri okarire oparãkuma, ãrĩ weremi Jesús.

26

Oparã Jesúre ñeãburire ãmudea (Mr 14.1-2; Lc 22.1-2; Jn 11.45-53)

¹ Jesús iri ããrĩpererire bue odo, g_uare ãgũ buerãrẽ ãrĩmi:

² —P_un_u d_uyáa, pascua bosenu ejoburo. Irire m_usã masã. Iri bosenu ããrĩmakũ, y_u ããrĩpererã tĩgãrẽ ñeã, oparãguere wiarãkuma, curusague pábiatú wējẽdoremurã, ãrĩmi.

³ Iripoere paía oparã, Moisés gojadeare buerimasã, judío masaka m_urãde Caifás paía op_uya wii

disipuro ma yebague nerẽñurã. ⁴ Irogue nerẽrã, ãgũsã Jesúre ãrĩgatorĩ merã ñeã, wẽjẽburire ãmuñurã.

⁵ Irĩre ãmurã:

—Bosenũ ããrĩmakũ, ãgũrẽ ñeãbirikõãrã! Masaka marĩ merã guarã, marĩrẽ gainĩ turibokuma, ãrĩñurã.

Sugo nomeõ Jesúre sũrõrĩ piupeodea
(Mr 14.3-9; Jn 12.1-8)

⁶ ãgũsã ãgũrẽ wẽjẽburire ãmuripoere Jesús Beta-
nia wãĩkũrĩ makãgue Simón kãmi boadiya wiigüe
ããrĩmĩ. ⁷ Irogue ãgũ ããrĩmakũ, sugo nomeõ suru
sũrõdiru opago, Jesús puro ejamo. Igo opadiru
“alabastro” wãĩkũrĩ ãtãye merã iridiru, sũrõrĩ wa-
japari opadiru ããrĩbũ. Jesús baa doanĩripoe ãgũya
dĩpurure iri sũrõrĩrẽ piupeomo. ⁸ Igo irasũ piupeo-
makũ ããrã, gũã Jesús buerã guarã ãsũ ãrĩbũ:

—¿Nasirigo igo irĩre irasiriwasiribéokõãrĩ? ⁹ Iri
sũrõrĩrẽ duago, wãro niyerure wajataboakumo.
Iri niyeru merã boporãrẽ iritamuboakumo, ãrĩbũ.

¹⁰ Jesús, gũã irasũ ããrĩmakũ pégu, gũare ãrĩmi:

—¿Nasirirã igore garibori mũsã? Ire yũre
irasirigo, õãrĩrẽ irigo yãmo. ¹¹ Boporã mũsã
watopeguere ããrĩnikõãrãkuma. Yũ tamerãrẽ
mũsã merã ããrĩnĩmakũ ããbirikoa. ¹² Igo i sũrõrĩ
yũre piupeogo, yaa dupũre ãgũsã yũre yãaburo
dupuyuro ãmuyugo irirosũ irigo yãmo. ¹³ Diayeta
mũsãrẽ werea. Marĩpu masakare tauri kerere
wererã ããrĩperero i ãmũgue waagorenarã, igo yũre
irideadere gajerãrẽ wererãkuma, igore gũñaburo,
ãrĩrã, ãrĩmi Jesús gũare.

Judas Iscariote Jesúre wějědmarāguere ĩgūrē ĩmuburire āmudea

(Mr 14.10-11; Lc 22.3-6)

¹⁴ Jesús irasũ ārādero pũũ, sugũ gũa Jesús buerã pe mojõma pere su gubu peru pērēbejarã watopemũ Judas Iscariote wãĩkũgũ paía oparã merã werenígũ waayupũ. ¹⁵ ĩgūsārē ārĩyupũ:

—Yũ Jesúre mũsārē wiamakũ, ¿noópã niyeru wajarirākuri yũre? ārĩyupũ.

ĩgũ irasũ ārĩmakũ pérã, ĩgūrē treinta niyeru tiri plata merã iridea tirire wajariñurã. ¹⁶ ĩgūsã wajarimakũ, Judas: “¿Naásũ āārĩmakũ ĩgūsārē yũ Jesúre wiamakũ õākuri?” ārĩ gũñayupũ.

Jesús ĩgũ buerã merã baatũnudea

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Pũũ pã wemasārĩ morēña marĩĩ baari bosenu pũroririnũ āārĩmakũ, gũa Jesús buerã ĩgũ pũrogue waa, ĩgūrē sērēñabũ:

—¿Noógue mũ pascua bosenu baaburire āmumakũ gãāmekuri? ārĩbũ.

¹⁸ ĩgũ guare ārĩmi:

—Jerusalēgue waaka! Iro mũsã bokajagũre āsũ ārĩka: “Gũare buegũ mũrē āsũ ārĩ weredoreami: ‘Yũ ñerõ tariburo mérõgã dũyáa. Pascua bosenu āārĩmakũ, yũ buerã merã mũya wiigũe baagũkoa’, ārãmi”, ārĩka! ārĩmi Jesús.

¹⁹ Irasirirã, pascua bosenu āārĩmakũ, Jesús doreaderosũta gũa baaburire āmunerã āārĩmã.

²⁰ Naĩmejāripoe Jesús gũa ĩgũ buerã pe mojõma pere su gubu peru pērēbejarã merã baa doanĩmi.

²¹ Gũa baaripoe guare ārĩmi:

—Diayeta musārē werea. Sugũ musā watope ããrĩgá yũre wējēduarāguere yũre ĩmugũkumi, ãrĩmi.

²² Ĩgũ irasũ ãrĩmakũ pérã, gũa bũro bujawereri merã sugũno dita ĩgũrē sērēñayobũ:

—Gũa Opũ, ¿yũ ããrĩrĩ murē ĩmubu? ãrĩbũ.

²³ Gũa irasũ ãrĩ sērēñamakũ, gũare yũjumi:

—Yũ merã i pare pã yosa baagũta ããrĩmi yũre wējēduarāguere yũre ĩmubu. ²⁴ Marĩpũya werenĩrĩ gojadea pũgue gojaderosũta yũ ããrĩpererã tĩgũrē waaró yãa. Yũre ĩmubu gapũre ñetariro waarokoa. Ĩgũ deyoabirimakũ õãboyo, ãrĩmi Jesús.

²⁵ Ĩgũ irasũ ãrĩmakũ, Judas Jesũre wējēduarāguere ĩgũrē ĩmubu sērēñami:

—Gũare buegũ, ¿yũ murē ĩmubu ããrĩrĩ? ãrĩmi.

Jesús ĩgũrē yũjumi:

—Éũ, mũta ããrã, ãrĩmi.

²⁶ Irasũ ãrĩ odo, gũa baaripoe Jesús pãrē ãĩ, Marĩpũre: “Murē usũyari sĩa”, ãrĩ, pãrē pea, gũare ĩgũ buerãrē ãsũ ãrĩ gueremi:

—Ire baaka! Yaa dupũ ããrã, ãrĩmi.

²⁷ Pũru iirĩripare ãĩ, Marĩpũre: “Murē usũyari sĩa”, ãrĩ, gũare iripare sũu, ãsũ ãrĩmi:

—Musã ããrĩpererã ire iirĩka! ²⁸ I yaa dí ããrã. Yũ boagũ, dí béori merã wárã masaka ñerõ irideadea wajare wajaribosagũkoa. Irasirigũ yaa dí béori merã Yũpũ ĩgũsãrē: “Õãrõ irigũra”, ãrĩdeare iriyuwarikũgũkumi. Irasirigũ ĩgũsã ñerõ irideare kãtigũkumi. ²⁹ Musãrē werea. Igui dekore marĩ daporã iirĩrosũ yũ dupaturi neõ iirĩnemobirikoa. Pũru Yũpũ ĩgũyarãrē dorerogue musã merã maama igui dekore iirĩgũkoa, ãrĩmi Jesús gũare.

*Jesús Pedrore: “Yure masĩkeregu: ‘Masĩbea’,
ãrĩgũkoa”, ãrĩ weredea*

(Mr 14.26-31; Lc 22.31-34; Jn 13.36-38)

³⁰ Pũũ Marĩpũre bayapeo odo, gũa iri wiigũe
ããrãnerã wiria, Olivos wãĩkũri buúrugue waabu.

³¹ Irogue ejagu, Jesús guare ãrĩmi:

—Dapagã ñami mũsã ããrĩpererã gũñaturaro
marĩrõ yure béowãgãperekõãrãkoa. Mũsã
irasiriburire Marĩpũya werenĩrĩ gojadea pũgue
ãsũ ãrĩ gojasũdero ããrĩbũ: “Yũ oveja koregũre
wẽjẽmakũ irigũkoa. Irasirimakũ, ĩgũyarã oveja
ũmawasiriakõãrãkuma”, ãrĩ gojasũdero ããrĩbũ.

³² Yũ boadigue masãdero pũũ, mũsã dupuyuro
Galileague waadupuyugũkoa, ãrĩmi guare.

³³ ĩgũ irasũ ãrĩmakũ pégu, Pedro ãsũ ãrĩ yũjũmi:

—Gajerã ããrĩpererã mũrẽ béowãgãkererũ, yũ
gapũ mũrẽ neõ béowãgãbirikoa, ãrĩmi.

³⁴ Jesús Pedrore ãrĩmi:

—Diayeta mũrẽ werea. Dapagã ñami ãgãbo
wereburo dupuyuro mũ yure masĩkeregu, urea
gajerãrẽ: “Masĩbea”, ãrĩgatogũkoa, ãrĩmi.

³⁵ Pedro ĩgũrẽ ãrĩmi:

—Yũ mũ merã boabu ããrĩkeregu: “Masĩbea”,
ãrĩgatobirikoa, ãrĩmi.

Ããrĩpererã gũa ĩgũ buerã, Pedro ĩgũ ãrĩrõsũta
ãrĩbũ Jesũre.

Jesús Getsemanĩgue Marĩpũre sẽrẽdea

(Mr 14.32-42; Lc 22.39-46)

³⁶ Pũũ Jesús gũa ĩgũ buerã merã waa, Getsemanĩ
wãĩkũrogue eja, guare ãrĩmi:

—Õõta doaka mũsã dapa! Sõõgue Marĩpũre
sẽrẽgũ waagũ yáa, ãrĩmi.

37 Irasũ ãrĩ odo, Pedrore, Zebedeo pũrã pẽrãguereta siiuwãgãmi. Ìgũ bũro gũñariku, bũjawereyupũ. 38 Irasũ bũjaweregũ, Ìgũ siiuwãgãnerãrẽ ãrĩyupũ:

—Bũro bũjawereri merã kãmoma goero pẽñakoa. Õõta dujaka! Mũsãde yũ kãrĩberosũta kãrĩmerãta yũre yũka! ãrĩyupũ.

39 Irasũ ãrĩ odo, yoaweyaro waanemo, yebague ìgũya diapure moomejã, Marĩpũre ãsũ ãrĩ sẽrẽyupũ:

—Aũ, yũ ñerõ tariburire taudũagũ taumasĩa. Yũ irasũ ãrĩkerepũrũ, yũ gããmerõsũ iribirikõãka! Mũ gããmerõsũ gapũ yũre waaburo, ãrĩyupũ.

40 Irasũ ãrĩ sẽrẽ odo, Ƴrerã ìgũ buerã pũroque ejagũ, Ìgũsã kãrĩrãrẽ bokaja, Pedrore ãrĩyupũ:

—¿Nasirirã su horanogãgora mũsã yũre kãrĩmerãta yũmasĩberi? 41 Kãrĩmerãta! Marĩpũre sẽrẽka, wãtĩ ãrĩmesãrĩrẽ iribokoa, ãrĩrã! Mũsã gũñarĩ merã õãrĩrẽ iridũadãa. Irire iridũakererã, bokatĩũbea, ãrĩyupũ.

42 Irasũ ãrĩ odo, dupaturi waa, Marĩpũre sẽrẽyupũ doja:

—Aũ, i yũ ñerõ tariburire taudũabi, mũ gããmerõsũ irika! ãrĩyupũ.

43 Pũrũ ìgũ buerã Ƴrerã pũro dupaturi ejagũ, kãrĩrãrẽta bokajayupũ doja. Ìgũsãrẽ wũja pũrĩtariyuro. 44 Ìgũsãrẽ ìãkõã, dupaturi Marĩpũre sẽrẽgũ waayupũ doja. Ìgũ sẽrẽaderosũta sẽrẽyupũ.

45 Pũrũ ìgũsã pũro eja, ãrĩyupũ:

—¿Mũsã siuñajã, kãrĩrã yãri dapa? Yũre ããrĩpererã tĩgũrẽ ñerãguere ìgũsã wiari hora ejasiãa.

46 Wāgānugāka! Náka, waarā! Yure wējēduarāguere yure ĩmubu aarisiami, āriyupɛ Jesús.

Jesúre ñeãwãgãdea

(Mr 14.43-50; Lc 22.47-53; Jn 18.2-11)

47 Ĩgũ irasũ āri wereripoe Judas, gua Jesús buerã pe mojõma pere su gubu peru pērēbejarã watopemɛ āārãdi ejami. Wārã masaka sareri majĩri, yukɛ dukari oparã ĩgũ merã ejama. Ĩgũsã paía oparã, judío masaka mɛrã ĩgũsã iriuanerã āārĩmá. 48 Ĩgũsã ejaburi dupuyuro Judas ĩgũsãrē Jesúre ĩmubu àsũ āri weredi āārĩmi: “Yɛ ĩgũya wayupārã mimigũta āārĩgukumi. Ĩgũrē ñeaka!” ārĩdi āārĩmi. 49 Irasirigɛ Jesús pɛro ejagɛ, ĩgũrē ārĩmi:

—Gɛare buegɛ, ¿āārĩri mɛ? āri, ĩgũya wayupārãrē mimimi.

50 Ĩgũ irasirimakũ ĩãgũ, Jesús ĩgũrē ārĩmi:

—Yɛ merãmɛ, ¿nasirigu aarigú iriari? Mɛ irigura, ārãdeare irika! ārĩmi.

Irasirirã masaka Jesús pɛro eja, ĩgũrē ñeãwãgãkõãma.

51 Ĩgũsã ĩgũrē ñeãwãgãripoe sugɛ ĩgũ buegɛ ĩgũya sareri majĩrē tũãwea ãi, paía opɛre moãboeguya gãmipũrē dítítá dijukõãmi. 52 Ĩgũ irasirimakũ ĩãgũ, Jesús gapɛ ĩgũrē ārĩmi:

—Mɛya sareri majĩrē duripíkõãka! Sareri majĩ merã gajerã merã gãmewējērãno, sareri majĩ merãta wējēsũrākuma. 53 ¿Mɛsã masĩberí? Yɛpɛre yɛ sērēmakũ, daporata ĩgũrē wereboerãrē pe mojõma pere su gubu peru pērēbejari burigora yure iritamumurãrē iriubokumi. 54 Yɛ sērēmakũ,

Marĩpuya werenĩrĩ gojadea pũgue gojaderosũ waabiribokoa, ārĩmi Jesús.

⁵⁵ Irasũ ārĩ odo, masakare ārĩmi:

—¿Nasirirã sareri majĩrĩ merã, yukũ dukari merã sugũ yajarimasũrẽ ñeãrã aarirã irirosũ yũre ñeãrã aarĩri? Ɛmurikũ Marĩpuya wiigue yũ musãrẽ bue doanĩmakũ, musã yũre neõ ñeãbiribũ. ⁵⁶ Daporare i ããrĩpereri musã yũre irasirirã, Marĩpuya kerere weredupuyunerã gojaderosũta irirã yáa, ārĩmi Jesús.

Ɔgũrẽ ñeãmakũ ĩãrã, gua ĩgũ buerã ĩgũrẽ sugũreta ũmaweonúwãgãkõãbũ.

Jesúre oparã pũrogue ãĩadea

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Irasirirã Jesúre ñeãnerã paía opũ Caifáya wiigue ãĩãñurã. Iri wiiguere Moisés gojadeare buerimasã, judío masaka murãde nerẽsiañurã.

⁵⁸ Pedro gapũ yoaweyaro Jesúre tũyãñajãa, Caifáya wii disipũro ñajãrõma yebague eja, Marĩpuya wiire korerã surara merã doayupũ. “¿Naásũ iriyuwarikũrãkuri?” ārĩgũ, irogue ĩã doanĩyupũ.

⁵⁹ Paía oparã, judío masaka murã, ããrĩpererã oparã irogue nerẽanerã Jesúre ārĩgatori merã weresãmurãrẽ ãmarã iriñurã ĩgũrẽ wẽjẽmurã.

⁶⁰ Ɔgũsã pũrogue wárã masaka ārĩgatori merã ĩgũrẽ weresãrã ejakererã: “Ɔgũ i ñerõ iridea waja boaburo”, ārĩ weresãrĩrẽ neõ bokabiriñurã. Pũrũ gajerã pẽrã ĩgũrẽ ārĩgatori merã weresãrã ejañurã.

⁶¹ Ąsũ ārĩñurã:

—Ī āsū ārīmi: “Marīpuya wiire béomasīa. Ʋrenu waaró merāta iri wiire dupaturi iri odomasīa”, ārīmi, ārīñurā.

⁶² Īgūsā irasū ārīmakū pégu, paía opu wāgānugā, Jesúre ārīyupu:

—¿Īgūsārē yujuberi mu? ¿Nasirirā murē irasū ārī weresārī? ārīyupu.

⁶³ Jesús gapu yujubiriyupu. Īgū yujubirimakū ĩāgū, paía opu Īgūrē ārīyupu:

—Marīpu okanīgū péuro diaye wereka! ¿Muta āārīrī, Cristo Marīpu magū? ārīyupu.

⁶⁴ Jesús Īgūrē ārīyupu:

—Īgūta āārā mu ārīrōsūta. Idere musārē werea. Puru yu āārīpererā tīgūrē Ʋpu turagu diaye gapu doamakū ĩārākoa. Ʋmagasima mikāyebori weka yu aarimakūdere ĩārākoa, ārīyupu.

⁶⁵ Īgū irasū ārīmakū pégu, paía opu Īgū guarire ĩmugū, Īgūya surírore tūāyegue, āsū ārīyupu:

—Ī irasū ārī werenīgū, Marīpure ñerō ārīgū yámi. ¿Nasirimurā gajerā Īgūrē weresārīrē neō pénemobokuri marī? Musā, Īgū basita Marīpure ñerō ārīrīrē pésiáa. ⁶⁶ ¿Naásū gūñarī? ārīyupu.

—Marīpure Īgū ñerō ārīrī waja boaburo, ārī yujañurā.

⁶⁷ Irasū ārī odo, Īgū diapure síku eotú, Īgūrē doteñurā. Gajerā Īgūya diapure pá, ⁶⁸ āsū ārīñurā:

—Mu Cristo āārīgú, ārībokaka: “¿Noā murē pári?” ārīñurā.

*Pedro Jesúre masīkeregu: “Masībea”, ārīdea
(Mr 14.66-72; Lc 22.56-62; Jn 18.15-18, 25-27)*

69 Iri wii poekague ĩgūsã irasiriripoere Pedro disipuro ñajārōma yebague doanĩyuru. ĩgũ iroque doamakũ, sugo paía opure moãboego ĩgũ puro eja, ĩgũrẽ arĩyupo:

—Mũde Jesús Galileamũ merã ããrĩdita ããrã, arĩyupo.

70 Igo irasũ arĩmakũ pégu, Pedro ããrĩpererã iro ããrĩrã péurogue arĩgatori merã:

—Mũ irasũ arĩrĩrẽ pémasĩbirikoa yũ, arĩyupo.

71 Pũũ iri wii tũroma sãrĩrõ disipurogue waayuru. Iroque gajego ĩgūsãrẽ moãboego ĩgũrẽ ĩãgõ, iro ããrĩrãrẽ arĩyupo:

—Jesús Nazaretmũ merã ããrĩdita ããrĩmi ĩĩ, arĩyupo.

72 Pedro arĩgatori merã dupaturi yũjuyuru:

—Marĩpũ péuro diayeta werea. Yũ ĩgũrẽ masĩbea, arĩyupo.

73 Mérõgã pũrũta masaka iroque ããrĩrã Pedro purogue waa, ĩgũrẽ arĩñurã:

—Mũ diayeta Jesús buerã merãmũta ããrã. Pémasĩrõta ĩgūsã irirosũ werenía, arĩñurã.

74 ĩgūsã irasũ arĩmakũ, Pedro yũjuyuru:

—Marĩpũ péuro diayeta werea. Yũ mũsãrẽ diaye werebirimakũ, Marĩpũ yũre wajamoãburo. ĩgũrẽ neõ masĩbea yũ, arĩyupo.

Ĩgũ irasũ arĩripoeta ãgãbo wereyuru. 75 Pedro, ãgãbo weremakũ pégu, Jesús ĩgũrẽ: “Ãgãbo wereburo dupuyuro mũ yũre masĩkeregu, urea: ‘Masĩbea’, arĩgatogũkoa”, ãrãdeare gũñabokayuru. Irire gũñaboka, wiria, bũjawererĩ merã bũro oreyuru.

27

*Jesúre Pilato p̄ro ãĩj̄adea**(Mr 15.1; Lc 23.1-2; Jn 18.28-32)*

¹ Boyodujimej̄aripoe ããr̄ipererã paía oparã, judío masaka m̄urã merã nerẽ: “Ásũ iri, Jesúre w̄ej̄erã”, ãr̄ĩ ãmuñurã. ² Irasũ ãr̄ĩ ãmu odo, Jesúre sia, ãĩwãgã, Poncio Pilato wãĩk̄ugure Judea nikũ marã op̄re wiañurã.

Judas Iscariote boadea

³ Īḡsã Jesúre w̄ej̄erãkuma, ãr̄ĩr̄ir̄e p̄egu, Judas gap̄u b̄uro b̄ujawereri merã ĩḡu Jesúre ĩmuadeare ḡũñayup̄u. Irasiriḡu treinta niyeru tiri plata merã iridea tiri ĩḡsã ĩḡur̄e wajaridea tirire paía oparãr̄e, judío masaka m̄urãr̄e wiaḡu waayup̄u. Irogue eja, ĩḡsãr̄e ãr̄iyup̄u:

⁴ —Ȳu ñetariro iriakub̄u. Ȳu ñer̄ĩ iribire oparãguere wiadire: “Boaburo”, ãr̄añurã, ãr̄iyup̄u.

Īḡu irasũ ãr̄ĩmakũ, ĩḡur̄e ȳuj̄uñurã:

—M̄u irasiriadea ḡuaya meta ããrã. M̄uaya ããrã, ãr̄ĩñurã.

⁵ Īḡsã irasũ ãr̄ĩmakũ p̄egu, Judas Mar̄ĩp̄uya wi-iḡue niyeru tirire meéwasiribéo, waakõãyup̄u. Waa, p̄ũgubudare siasiu, ĩḡu basi ĩḡuya wánuḡur̄e túsãnú, parimadija, boakõãyup̄u.

⁶ Paía oparã niyeru tirire sea neeõrã, ãsũ ãr̄ĩñurã:

—I niyeru ĩḡsã masak̄ure w̄ej̄eburi waja wajariadea ããrã. Irasirirã i niyerure Mar̄ĩp̄uya wi-ima durip̄iri k̄umague p̄imas̄ibirikoa. Mar̄ir̄e doreri irasiridorebea, ãr̄ĩñurã.

⁷ P̄ur̄u ãsũ ãr̄ĩñurã: “I niyeru merã diari sorori weaḡuya nik̄ur̄e wajarimakũ õãrokoa. Irasirirã gajero marã õõgue boamakũ, iri nikũ ĩḡsãr̄e

yáaburi nikũ ããrĩrokoa”, ãrĩñurã. ⁸ Irasirirã masaka iri nikũrẽ: “Dí béodea nikũ ããrã”, ãrĩ wãiyema. Daporaguedere irasũta wãikukõãa. ⁹ Ìgũsã irasirimakũ, Jeremías Marĩpũya kerere weredupuyudi gojaderosũta waabũ. Æsũ ãrĩ gojadi ããrĩmĩ: “Israel bumarã treinta niyeru tiri plata merã iridea tirire ìgũrẽ wajarideare ãĩma. ¹⁰ Irasirirã iri tiri merã diiari sorori weagũya nikũrẽ wajarima. Irasirirã, Marĩpũ yũre: ‘Æsũ irirãkuma’, ãrĩ gojadorederosũta yáma”, ãrĩ gojadi ããrĩmĩ.

Pilato Jesúre sêrêñadea

(Mr 15.2-5; Lc 23.3-5; Jn 18.33-38)

¹¹ Pilato, Jesúre ìgũ pũroque ìgũsã ãĩjamakũ, ìgũrẽ sêrêñayupũ:

—¿Mũta ããrĩrĩ judío masaka Opũ? ãrĩyupũ.

—Mũ ãrĩrõsũta ìgũta ããrã, ãrĩ yujũyupũ Jesús.

¹² Paía oparã, judío masaka mũrã ìgũrẽ weresãrĩ gapũre yujũbiriypũ. ¹³ Irasirigũ Pilato ìgũrẽ ãrĩyupũ:

—¿Æãrĩpereri ìgũsã mũrẽ weresãrĩrẽ péberi mũ? ãrĩyupũ.

¹⁴ Jesús gapũ neõ yujũbiriypũ. Ìgũ yujũbirimakũ ìãgũ, Pilato ìãgũkakõãyupũ.

Jesúre wêjêdoredea

(Mr 15.6-20; Lc 23.13-25; Jn 18.38–19.16)

¹⁵ Bojorikũ pascua bosenu ããrĩmakũ, Pilato sugũ peresugue ããrĩgũrẽ masaka wiudoregũre wiunayupũ. ¹⁶ Iripoere sugũ Barrabás wãikũgũ peresugue ããrĩyupũ. Masaka ìgũ ñerõ irideare masĩñurã. ¹⁷ Irasirigũ ìgũsã nerẽmakũ ìãgũ, Pilato ìgũsãrẽ sêrêñayupũ:

—¿Níí gapure yu wiumakū gāāmerĩ musā? ¿Barrabáre, o Jesús: “Cristo” ĩgūsā āřĩgū gapure? āřĩyupũ.

18 Wárā masaka Jesúre buremumakū ĩārā, oparā ĩgūrē ĩāturisĩā, Pilato pũrogue āĩānerā āārĩmá. Pilato gapũ ĩgūsā ĩāturire masĩkōāyupũ. Irasirigu Jesúre wiudũadiyupũ.

19 Pũrũ Pilato masaka weresārĩrē beyerimasũ doarogue doaripoe, ĩgū marāpo ĩgūrē kere iriuyupo: “Ĭgū diayema irigure gajerosũ neō iribirikōāka! Dapagā ñami ĩgūrē waaburire bũro goero kēākubũ”, āřĩ kere iriuyupo.

20 Paía oparā, judío masaka mūrā gapũ masakare āsũ āřĩdoreñurā: “‘Barrabáre wiuka, Jesús gapure wějēka!’ āřĩka!” āřĩdoreñurā. 21 Pũrũ Pilato masakare dupaturi sērēñayupũ doja:

—¿Ĭgūsā pērārē níí gapure yu wiumakū gāāmerĩ musā? āřĩyupũ.

—Barrabás gapure wiuka! āřĩ yujũñurā.

22 Ĭgūsā irasũ āřĩmakū pégu, Pilato sērēñayupũ:

—¿Nasirigukuri yu, ĩĩ Jesús: “Cristo” ĩgūsā āřĩgū gapure? āřĩyupũ.

Āārĩpererā:

—Curusague pábiatú wějēka ĩgūrē! āřĩ yujũñurā.

23 Irasirigu Pilato āsũ āřĩyupũ:

—¿Ñeéno ñerĩrē iriari ĩĩ, musā irasũ āřĩmakū? āřĩyupũ.

Masaka gapũ dupaturi gainínemoñurā:

—Curusague pábiatú wějēka ĩgūrē! āřĩñurā.

24 Ĭgūsā ĩgūrē péduabirimakū, ĩgūsā guari merā gainĩmakū pégu, Pilato dekore āřĩwāgāřĩdoreyupũ. Iri merā masaka ĩũrō mojōkoe, āsũ āřĩyupũ:

—Īrē waja opabire wējēdoreri, yu doreri meta āārā. Musā doreri āārā, ārīyupu.

²⁵ Īgū irasū ārīmakū pérā, āārīpererā masaka āsū ārīñurā:

—Gua murē Īrē wējēdoreri waja, gua, gua pūrā āārīpererā merā waja oparākoa, ārīñurā.

²⁶ Īgūsā irasū ārīmakū pégu, Pilato Barrabáre peresugue āārīgārē wiuyupu. Puru surarare Jesúre tārādore, Īgūrē Īgūsārē wiayupu, Īgūrē curusague pábiatú wējēdoregu.

²⁷ Irasirirā surara Jesúre Pilatoya wiima yebague āijañurā. Iroque āārīpererā surarare Jesús puro neeññurā. ²⁸ Puru Īgūya surírore túwea āi, opaya suríro irirosū deyoríne diariñerē Īgūrē sāñurā. ²⁹ Pora merā iriadea berore Īgūya dipurure peoñurā. Irasiri odo, yukure diaye gapu moāsua, Īgū puro ñadukupuri merā ejamejā, Īgūrē āsū ārī buridañurā:

—Buremurā aarika judío masaka Opure! ārīñurā.

³⁰ Īgūrē síku eotú, Īgūsā moāsuadire tūāwea āi, irigu merāta Īgūya dipurure pánañurā. ³¹ Īgūrē burida odo, Īgūsā sādea surírore túwea, Īgūya suríro gapure sāñurā doja. Sā odo, curusague pábiatú wējēmurā Īgūrē āi wiriakōñurā.

Jesúre curusague pábiatúdea

(Mr 15.21-32; Lc 23.26-43; Jn 19.17-27)

³² Īgūsā Īgūrē āiwāgārā, sugu masakure Simón wāikugu Cirenemurē bokatīrīma. Īgūrē Jesús kōādea curusare kōādorema.

³³ Īgūrē irasū āiwāgārā, Gólgota wāikurogue āijama. “Gólgota”, ārīrō: “Masaku dipuru

boaweadea pero”, āriḍuaro yāa. ³⁴ Irogue eja, igui deko sūīrī merā morēdeare Jesúre tīādima. Jesús irire iiríña, p̄uḥu iirībirimi.

³⁵ Īgūrē curusague pábiatú āīwāgūnú odo, surara Īgū surí sāñadeare: “Ubu āīrboka birarā: ‘¿Noārē dujarokuri?’ ” āīma, irire Īgūsā basi gāme dukawamurā. Īgūsā irasirirā, Marīp̄uya kerere weredupuyudi gojaderosūta irima. Āsū āī gojadi āārīmí: “Yaa suríre Īgūsā basi āīrboka bira dukawarākuma”, āī gojadi āārīmí. ³⁶ Irasiriadero p̄uḥu, surara curusa p̄uro eja doama, Jesúre korerā. ³⁷ “Īī āsū iridea waja boami”, āīrā: “Īīta judío masaka Op̄u āārīmí”, āī gojadea majīrē curusague Jesúya dipuru weka pábiatúma.

³⁸ Pērā yajarimasādere curusarigue pábiatú āīwāgūnúma. Suḡure Īgū diaye gap̄u, gajiḡure Īgū kúgap̄u pábiatú āīwāgūnúma. ³⁹ Masaka Jesús p̄uro tariwāgānarā, ñerō āī b̄urida, Īgūsāya dipure yure, āīma:

⁴⁰ —M̄u āsū āī wereníbu: “Marīp̄uya wiire béo, p̄uḥu urenu waaró merāta iri wiire dupaturi iri odoḡukoa”, āību. Irasiriḡu m̄u basi tauka! M̄u diayeta Marīp̄u magū āārīgū, curusague merā dijarika! āīma.

⁴¹ Irasūta paía oparā, Moisés gojadeare buerimasā, fariseo bumarā, judío masaka m̄urāde āī b̄uridama. Āsū āī gāme wereníma:

⁴² —Gajerā gap̄ure taumi. Īgū basi gap̄u tau-masībemi. “Israel bumarā Op̄u āārā”, āīmi. Irasirirā, curusague merā Īgū dijarimakū Īārā, marī Īgūrē b̄uremurākoa. ⁴³ Īgū: “Marīp̄ure b̄uremua, Īgū magū āārā”, āīmi. Irasiriḡu Īgū

ãrĩderosũta Marĩpũ ãgũrẽ maĩgũ, iritamuburo, ãrĩ buridama.

⁴⁴ Yajarimasã Jesũs pũro curusarigue pábiatũ ãiwãgũnũsũanerãde irasũta ãgũrẽ ñerõ ãrĩ buridama.

Jesũs boadea

(Mr 15.33-41; Lc 23.44-49; Jn 19.28-30)

⁴⁵ Goeripoe ããrĩmakũ, i nikũ ããrĩpererogue naĩtĩãkõãbũ. Ære hora gora naĩtĩãbũ. ⁴⁶ Ære hora ejamakũta Jesũs bũro gainĩmi:

—Elĩ, Elĩ, ¿lama sabactani? ãrĩmi. Irasũ ãrĩgũ: “Yũ Opũ, yũ Opũ, ¿nasirigũ yũre béori mũ?” ãrĩgũ irimi.

⁴⁷ Surãyeri iroque ããrĩã, ãgũ irasũ ãrĩ gainĩmakũ pérã:

—Marĩpũya kerere weredupuyudire Eliare si-iugũ yãmi, ãrĩma.

⁴⁸ Mata sugũ ãgũsã merãmũ ãmawãgã, igui deko piari yosadea yũsure yukũ yuwague siatũ, ãiwãgã, Jesũre iirĩburo, ãrĩgũ, soemuúmi. ⁴⁹ ãgũ irasirimakũ ããrã, gajerã gapũ ãsũ ãrĩma:

—Iropãta irika! Elias ãgũrẽ taugũ aarimakũ ããñarã ðapa marĩ, ãrĩma.

⁵⁰ Jesũs dupaturi bũro gainĩnemo, kõmoakõãmi.

⁵¹ ãgũ kõmomakũta, Marĩpũya wii poekama taribu disipũro kãmutari gasiro ãmarõ gapũ merã yegue dijari, deko merã yeguesiajayuro. Nikũ bũro ñomebũ. Ætãyeri pagayeride waariakõãbũ.

⁵² Masãgoberi tũpãkõãyuro. Wãrã Marĩpũre bũremurã boanerã masãñurã. ⁵³ Jesũs masãdero pũru, ãgũsã masãgoberigue ããrĩnerã wiria, Marĩpũya makãgue Jerusalẽgue waañurã. ãgũsã iroque ejamakũ, masaka wãrã ãgũsãrẽ ããñurã.

54 Romano marã surara opu ïgũyarã surara merã Jesúre koreanerã, nikũ ñomemakũ, ããrĩpereri irasũ waarire ïãrã, bũro gũka, gũiri merã ãsũ ãrĩma: — Ñĩ diayeta Marĩpu magũ ããrãdañumi, ãrĩma.

55 Wãrã nome yoaweyarogue Jesúre ïũníma. Ñgũsã Galileague Jesúre iritamugorenanerã nome ããrĩmã. 56 Ñgũsã nome watopeguere María Magdalena wãikũgo, gajego María wãikũgo Santiago, José pago, gajego Zebedeo marãpo ããrĩmã.

Jesúya dupũre masãgobegue pídea
(Mr 15.42-47; Lc 23.50-56; Jn 19.38-42)

57 Pũru naĩmejãripoe ããrĩmakũ, José wãri opagu, Arimatea wãikũri makãmu irogue ejami. Ñgũ Jesús buerire tũyagu ããrĩmĩ. 58 Irasirigu Pilato pũrogue waa, Jesúya dupũre yáabu sērēyupu. Ñgũ ãrĩ sērēmakũ pégu, Pilato surarare Jesúya dupũre sídoreyupu ïgũrē. 59 Irasirigu José waa, Jesúya dupũre ãĩdiju, õãrĩ surĩro gasiro gũrari marĩrĩ gasiro merã ïgũya dupũre õmayupu. 60 Õma odo, ïgũrē yáabodea masãgobegue píyupu. Iri gobe, maama gobe ãtãyegue mádea gobe ããrĩyuro. Irogue Jesúya dupũre pí odo, wãri majĩ ãtã majĩ merã iro ñãjãrõrē õãrõ biakõã, waakõãyupu. 61 Ñgũ irasiriripoe María Magdalena, gajego María merã iri gobe bokatĩũrõ ïũdoanĩñurã.

Surara Jesúya dupũre pídea gobere koredea

62 Gajinu gapu judío masaka siuñãjãrĩnu* ããrĩmakũ, paía oparã, fariseo bumarã Pilato pũrogue waañurã. 63 ãsũ ãrĩñurã Pilatore:

* 27:62 Judío masaka siuñãjãrĩnu, sábado ããrã.

—Gua opu, sōō āārīdi okagugue ārīgatorikugu ārīdeare gua gūñáa. Āsū ārīmi: “Yu boa, urenu puru masāgukoa”, ārīmi. ⁶⁴ Irasirigu muyarā surarare urenugora ĩgūya dupure píaderogue koredoregu iriuka, ĩgū buerā ñami merā ĩgūya dupure yajabirikōāburo, ārīgū! ĩgūsā yajadero puru masakare: “Jesús boadigue masākōāmi”, ārībokuma. Irasiriro ĩgū ārīgatodea nemorō ĩgūsā ārīgatori gapu ñetarirokoa, ārīñurā.

⁶⁵ ĩgūsā irasū ārīmakū, Pilato yujuyuru:

—Jáu, ñisā yaará surara oōgue āārīma. ĩgūsārē āiaka, iri masāgobe gajerosū waari, ārīrā! Irasirirā masā bokatiūrō ĩgūsārē koredoreka! ārīyuru.

⁶⁶ ĩgū irasū ārīmakū, ĩgūsā waa, iri gobe biadea ūtā majirē oārō wītābiatoñurā, masaka ĩgūsā ñajādeare ĩāmasīrāra, ārīrā. Irasū āārīmakū, surarare iri gobere oārō koredoreñurā.

28

Jesús masādea

(Mr 16.1-8; Lc 24.1-12; Jn 20.1-10)

¹ Judío masaka siuñajārīnu puru, gajinu boyodujimejāripoe gaji semana ñajārīnu āārīmakū, María Magdalena, gajego María merā Jesúre pídea gobere ĩārā waañurā. ² Gūñaña marīrō nikū buro ñomeyuro. Irasū waaripoe marī Opure wereboegu ūmagasigue merā dijari, masāgobere ĩgūsā biadea ūtā majirē tūpā, iri majī weka doayuru. ³ ĩgū bupu miārōsū oārō gosewasirigu āārīyuru. ĩgūya suríro oārō borero āārīyuro. ⁴ Surara iri gobere koreanerā ĩgūrē ĩārā, buro güiri merā narada,

kōmorã irirosũ waañurã. ⁵ Pɥɥ Marĩpɥe wereboegɥ irogue ãrã waanerã nomerẽ ãrĩyupɥ:

—Güibirikõãka! Yɥ masĩa, mɥsã Jesús ãgũsã curusague pábiatú wějẽadire ãmarã yáa. ⁶ ãgũ õõrẽ mámi. ãgũ ãrĩderosũta masãsiami. ãgũya dupɥe ãgũsã píaderore ãrã aarika! ⁷ Pɥɥ mumurõ merã ãgũ buerãrẽ: “ãgũ boadi ããrĩkeregɥ, masãmi. Mɥsã dupuyuro Galileague waagukumi. Irogue ãgũrẽ ãrãkoa”, ãrĩ wererã waaka! Irire mɥsãrẽ weregɥ aarigú iriabɥ, ãrĩyupɥ Marĩpɥe wereboegɥ.

⁸ ãgũ irasũ ãrĩmakũ pérã, masãgobere ãrã waanerã nome güikererã, mumurõ merã ɥɥyari merã Jesús buerãrẽ wererã ãmadujáañurã. ⁹ ãgũsã ãmadujáarã nomerẽ Jesús ãgũsãrẽ bokatĩrĩ, õãdoreyupɥ. ãgũrẽ ãrã, ãgũ pɥro ñadukɥpuri merã ejamejã, ãgũya guburire ñeã, ãgũrẽ buremuñurã.

¹⁰ Jesús ãgũsãrẽ ãsũ ãrĩyupɥ:

—Güibirikõãka! Yaarã yɥ buerãrẽ: “Galileague waaka!” ãrĩ wererã waaka! Irogue yɥre ãrãkuma, ãrĩyupɥ.

Surara ãgũsã ããdeare weredea

¹¹ ãgũsã nome Jesús buerãrẽ wererã waaripoe surãyeri surara masãgobere koreanerã Jerusalẽgue waañurã. Irogue eja, paía oparãrẽ ããrĩpereri masãgobegue waãdeare werepeokõãñurã. ¹² ãgũsã irasũ ãrĩ weremakũ pérã, paía oparã, judío masaka mɥrã merã nerẽñurã. Irasirirã ãgũsã: “¿Nasirirãkuri?” ãrĩ ãmu odo, surarare wáro niyerure sĩ, ¹³ ãsũ ãrĩñurã:

—Masakare āsū āriika: “Ñami merā għa kārīripoe Jesús buerā masāgobegue eja, ĩgūya dupure yajakōānerā āārāma”, āriika! ¹⁴ Pilato māsā irasū āri kerere pémakū, għa ĩgū merā werenírākoa, māsārē wajamoābirikōāburo, ārīrā, ārīñurā.

¹⁵ ĩgūsā irasū ārīmakū pérā, surara niyerure ñeā, waakōāñurā. Pŕŕ paía oparā ĩgūsārē weredoreaderosūta gajerārē wereñurā. Irasirirā, ĩgūsā irasū ārīrī kerere wārā judío masaka pénerā āārīmá. Daporaguedere ĩgūsā ārīgatodeare bŕremukōāma dapa.

*Jesús ĩgū buerārē ĩgūyare buedoregħ pída
(Mr 16.14-18; Lc 24.36-49; Jn 20.19-23)*

¹⁶ Pŕŕ għa Jesús buerā pe mojōma pere su gubu suru pērēbejarā Galileague waa, buúrugue ĩgū għare waadoredea buúrugue waabu. ¹⁷ Irogue eja, Jesúre ĩārā, ĩgūrē bŕremubu. Surāyeri għa merā waanerā gapŕ: “¿ĩgūta āārīkuriye ĩ?” āri gūñama. ¹⁸ Irasirigħ Jesús għa pŕro aari ejanugā, āsū ārīmi:

—Yŕpŕ yure āārīpererogue i nikū, ũmŕgasiguedere dorebure sóosiami. ¹⁹ Irasirirā āārīpereri buri marā masakare yaa kerere buerā waaka, ĩgūsāde māsā irirosūta yaa buerire tŕyaburo, ārīrā! Yŕpŕ wāi merā, yŕ wāi merā, Ōāgū deyomarīgū wāi merā ĩgūsārē deko merā wāiyeka! ²⁰ Āārīpereri yŕ māsārē doredeare ĩgūsārē bueka, irire iriburo, ārīrā! Ire masīka māsā! Yŕ māsā merā āārīnikōāgŕkoa. I ũmŕ pereadero pŕrŕguedere māsā merā āārīnikōāgŕkoa, āri weremi għare Jesús.

Iropāta āārā.

Marĩpuya Kerere Wereri Turi New Testament in Siriano

copyright © 2009 Wycliffe Bible Translators, Inc.

Language: Siriano

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Siriano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022
1a0774e8-d152-5929-891b-95e0d2238786